
This is a reproduction of a library book that was digitized by Google as part of an ongoing effort to preserve the information in books and make it universally accessible.

Google[™] books

<https://books.google.com>





A propos de ce livre

Ceci est une copie numérique d'un ouvrage conservé depuis des générations dans les rayonnages d'une bibliothèque avant d'être numérisé avec précaution par Google dans le cadre d'un projet visant à permettre aux internautes de découvrir l'ensemble du patrimoine littéraire mondial en ligne.

Ce livre étant relativement ancien, il n'est plus protégé par la loi sur les droits d'auteur et appartient à présent au domaine public. L'expression "appartenir au domaine public" signifie que le livre en question n'a jamais été soumis aux droits d'auteur ou que ses droits légaux sont arrivés à expiration. Les conditions requises pour qu'un livre tombe dans le domaine public peuvent varier d'un pays à l'autre. Les livres libres de droit sont autant de liens avec le passé. Ils sont les témoins de la richesse de notre histoire, de notre patrimoine culturel et de la connaissance humaine et sont trop souvent difficilement accessibles au public.

Les notes de bas de page et autres annotations en marge du texte présentes dans le volume original sont reprises dans ce fichier, comme un souvenir du long chemin parcouru par l'ouvrage depuis la maison d'édition en passant par la bibliothèque pour finalement se retrouver entre vos mains.

Consignes d'utilisation

Google est fier de travailler en partenariat avec des bibliothèques à la numérisation des ouvrages appartenant au domaine public et de les rendre ainsi accessibles à tous. Ces livres sont en effet la propriété de tous et de toutes et nous sommes tout simplement les gardiens de ce patrimoine. Il s'agit toutefois d'un projet coûteux. Par conséquent et en vue de poursuivre la diffusion de ces ressources inépuisables, nous avons pris les dispositions nécessaires afin de prévenir les éventuels abus auxquels pourraient se livrer des sites marchands tiers, notamment en instaurant des contraintes techniques relatives aux requêtes automatisées.

Nous vous demandons également de:

- + *Ne pas utiliser les fichiers à des fins commerciales* Nous avons conçu le programme Google Recherche de Livres à l'usage des particuliers. Nous vous demandons donc d'utiliser uniquement ces fichiers à des fins personnelles. Ils ne sauraient en effet être employés dans un quelconque but commercial.
- + *Ne pas procéder à des requêtes automatisées* N'envoyez aucune requête automatisée quelle qu'elle soit au système Google. Si vous effectuez des recherches concernant les logiciels de traduction, la reconnaissance optique de caractères ou tout autre domaine nécessitant de disposer d'importantes quantités de texte, n'hésitez pas à nous contacter. Nous encourageons pour la réalisation de ce type de travaux l'utilisation des ouvrages et documents appartenant au domaine public et serions heureux de vous être utile.
- + *Ne pas supprimer l'attribution* Le filigrane Google contenu dans chaque fichier est indispensable pour informer les internautes de notre projet et leur permettre d'accéder à davantage de documents par l'intermédiaire du Programme Google Recherche de Livres. Ne le supprimez en aucun cas.
- + *Rester dans la légalité* Quelle que soit l'utilisation que vous comptez faire des fichiers, n'oubliez pas qu'il est de votre responsabilité de veiller à respecter la loi. Si un ouvrage appartient au domaine public américain, n'en déduisez pas pour autant qu'il en va de même dans les autres pays. La durée légale des droits d'auteur d'un livre varie d'un pays à l'autre. Nous ne sommes donc pas en mesure de répertorier les ouvrages dont l'utilisation est autorisée et ceux dont elle ne l'est pas. Ne croyez pas que le simple fait d'afficher un livre sur Google Recherche de Livres signifie que celui-ci peut être utilisé de quelque façon que ce soit dans le monde entier. La condamnation à laquelle vous vous exposeriez en cas de violation des droits d'auteur peut être sévère.

À propos du service Google Recherche de Livres

En favorisant la recherche et l'accès à un nombre croissant de livres disponibles dans de nombreuses langues, dont le français, Google souhaite contribuer à promouvoir la diversité culturelle grâce à Google Recherche de Livres. En effet, le Programme Google Recherche de Livres permet aux internautes de découvrir le patrimoine littéraire mondial, tout en aidant les auteurs et les éditeurs à élargir leur public. Vous pouvez effectuer des recherches en ligne dans le texte intégral de cet ouvrage à l'adresse <http://books.google.com>

Ch. 1488.

BIBLIOTHECÆ AUGUSTINI
GANDENSIS.

367

K

UNIV

GENT



Digitized by Google

LE VOYAGE SPIRITUEL DU PELERIN CATHOLIQUE.


Dressé par le B. PIERRE DE LUXEMBOURG,
Cardinal, Evêque de Metz, & Protecteur
de la Ville d'Auignon.

Liurett vraiment d'or.

Où en premier lieu sont marquées les journées neces-
saires pour reuenir à Dieu, s'en estant fouruoyé.
Puis est adioustée la poursuite du droit voyage au
Ciel, où sont cōtenus les moyēs d'entretenir, & aug-
menter la grace recourée, & fomentier la deuotion.

*Avec la vie autant imitable qu'admirable,
du mesme Bien-heureux.*

*Bib.
Aug.
gards.*



*367
K*

A LYON,
Chez ANTOINE CHARD, en rue Merciere,
à l'Enseigne du saint Esprit.

M. DC. XXIV.
AVEC PRIVILEGE DV ROY



100

100

100

100



A T R E S-H A V T E
ET TRES-ILLVSTRE
Princesse, Madame M A R I E
L I E S S E D E L V X E M B O V R G,
Duchesse de Vantadour, &c.



A D A M E,

*Il me semble q*u*'il
seroit bien mal-aisé de trou-
uer aucune chose dans le sein
de la riche Nature, qui nous
peignist plus naïuement la*

grandeur de vostre Maison
tres-illustre, que ce qu'on dit
d'un miracle du monde. En
Barbarie (au conte de quel-
ques Historiens) les sablo-
nieres qui sont naturellement
steriles, deuiennent miracu-
leusement fertiles & plantu-
reuses par le benefice d'une
fontaine, qui va serpentant
ces deserts : si qu'on y void
en certain endroit un grand
Oliuier d'excellente beauté,
sous lequel est un Palmier,
qui a sous soy un Grena-
dier, au tronc duquel se ma-
rie

rie une belle Vigne , sous laquelle on sème du bled , qui blondissant bien tost, est moissonné, & y fait-on venir en sa place des herbes , & des fleurs le reste de l'année. Tout cela vivant, germant, & florissant à l'ombre de l'Olivier, & à la faueur des eaux de la belle fontaine.

C'est bien, ce me semble, un riche crayon de ce que les Soleils de plusieurs siècles ont vus par merueille en la tres-illustre famille de Luxembourg , de laquelle comme

d'une vine & noble source
sont issus tant de grands &
renommez Capitaines, char-
gez des palmes glorieuses de
leur insigne valeur : tant de
Roys, & d'Empereurs, qui
comme autant de belles Gre-
nades couronnées, & empour-
prées d'honneur, ont illustré
les plus releuez thrones de
l'Occident : tant & tant de
grandes Dames d'excellente
beauté & vertu, qui, ou à
guise de fleurs odorantes, ont
parfumé le Ciel & la terre
de la perfection de leurs
belles

belles mœurs : ou comme de nobles & plantureuses Vignes se sont meflées par alliances aux plus illustres familles de l'Europe. Mais toute cette pompe d'honneur & de gloire, par un bon-heur particulier, est à l'ombre de la protection de ce grand Oliuier, ie veux dire du tres-illustre Prelat & bien-heureux Cardinal Pierre de Luxembourg, qui la couure de ses branches, la decore de sa sainteté, & l'arrose de ses favorables influences.

C'est ce qui m'a aisément
persuadé (MADAME) que
vous verriez de bon œil, avec
la vie pleine de merueille de
ce grand Protecteur, & sin-
gulier ornement de vostre
Maison, un Traicté de de-
votion, composé par le mesme
bien-heureux Cardinal, en
faveur de Madame Jeanne
de Luxembourg sa sœur, la-
quelle il instruit sous le titre
de Voyage spirituel du Pe-
lerin Catholique, à tenir cou-
rageusement la route de la
perfection spirituelle, qui con-
duit

duit au bien-heureux repos
du Ciel : en laquelle elle fit
de grands & notables pro-
grez, sous un si sçauant in-
structeur, & fauorable guide,
coronnant en fin sa ver-
tueuse & chaste vie d'une
belle & glorieuse mort. Par
ainsi ie ne doute point que la
denotion singuliere de vostre
ame, & ces rares qualitez
qui vous acquierent la bien-
ueillance du Ciel, & les hon-
neurs de la terre, s'accordans
honorablement à la memo-
rable vertu de ceux, à qui

J S

*vous touchez de si prez, ne
vous fassent volontiers pren-
dre ce Liuret en main, où elle
est depeinte comme en deux
Tableaux racourcis : & en
l'un d'iceux du pinceau mes-
me & de la main de ce Bien-
heureux, où il a tiré une par-
tie des traits de sa perfection
en l'object de sa propre beau-
té, ainsi que Lala cette vier-
ge tant renommée se peignit
elle-mesme, en se regardant
dedans un miroir.*

*Que si par tous ces titres
(MADAME) ie peux iusti-
fier,*

*fier, & tirer hors de blasme
la hardiesse qui m'a porté à
vous consacrer cet escrit de
pieté : ie remerciéray mon
bon-heur, qui m'a presté l'oc-
casion de vous rendre un tes-
moignage de ma deuotieuse
volonté, par laquelle ie me
sois peu signifier,*

MADAME,

**Vostre tres-humble, & tres-
obeissant seruiteur,**

ANTOINE CHARD

*A Lyon ce 26.
Aoust, 1624.*

J 6



Au Lecteur.

LE païs d'Hercinie nour-
rit (ce dit-on) des oy-
seaux , les plumes des-
quels brillent, & luisent au fort
des tenebres ; si que les gens
du païs s'en seruent comme de
flambeaux, à la lueur & faueur
desquels ils marchent de nuit
par les lieux du plus difficile
accez , & se guident assuremé-
ment en leurs voyages. Nous
pouons bien veritablement
dire,

dire , que les plumès pieufes & ſçauantes, des Eſcriuains ſacrez, qui iettent plus d'eſclat des veritez du Ciel, que de pompe de vanité , ſont autant de flambeaux eſclairans , qui nous arroutent heureuſement parmy les tenebres de ce mortel pelerinage. Mais aduoüez-moy (mon cher Lecteur) que le Voyage ſpirituel, tracé par le Bien-heureux Pierre de Luxembourg, Cardinal, en faueur de Madame Ieanne de Luxembourg ſa ſœur, peut eſtre meritoirement appellé vne plume flambante , ou vn flambeau haut-volant & emplumé, pour dresser, & aſſeurer les routes des
per

personnes spirituelles, qui font
voye à la perfection.

Ce bon Sainct , d'un style
simple & naïf, mais confit dans
les douceurs de sa deuotion, &
allumé des ardeurs de son zele,
va marquant fidelement les
iournées d'une ame deuote qui
aspire à la perfection, & pre-
tend à la felicité eternelle, qui
est le terme de son voyage.
Il fraye franchement les plus
courts & assurez sentiers, pour
les faire suyure ; marque les
destours , & les perils , pour
les faire fuyr ; instruit de tout
l'equipage necessaire à un si
grand & important voyage.

Celuy qui donna ce pieux
Ouurage

Ouvrage au public, il y a soixante ans passez, porté d'un bon zele contre les heresies naissantes de son temps, brisa souvent la suite du discours, par quelques remarques & faillies qu'il fait contre les dogmes pernicioeux des Heretiques, selon l'occasion que luy en donnoient les sentimens contraires du Bien-heureux Cardinal : ce qu'il fit neantmoins en caracteres differens, pour faire recognoistre ce qu'il avoit adiousté & inferé dans le Traicté de l'Auteur. Nous auons toutesfois creu qu'un chacun verroit plus volontiers la suite non interrompue de
tout

tout le discours , que nous auons laissé en la naïueté de son air naturel, & en la simplicité de son style, esloigné vn peu de la politesse recherchée par les curieux du temps, auquel nous viuons; mais il en est souuent de la verité, comme de certaines beautez qui ne plaisent , & ne paroissent iamais mieux qu'en leur naïue simplicité, & hors de fard & d'affetterie. Nous y auons seulement changé vn mot, ou deux, & vne certaine transposition de mots extraordinaire, qui eussent sans doute offensé la molle delicatresse de quelques Lecteurs, sans perte neantmoins, ny interest quelconque du sens.

D'abondant , pour donner d'avantage d'autorité à cet Ouvrage, nous auons mis au deuant la vie toute excellente & admirable de l'Auteur , qui est vn parfaict exemplaire de toute vertu, sur lequel iettans les yeux, tous les vrayes Pelerins du Ciel pourront fidelement prendre les reglemens infailibles de leur vie , & de leur voyage.

Finalemēt , ay-ie pensé estre à propos d'instruire dès cette entrée ceux qui se pourroyent offenser, de ce que nous donnons à ce Bien-heureux le titre de Cardinal, qu'il n'a receu que d'un Pape schismatique;

tique; lesquels ie prie de considerer en premier lieu, qu'il est bien difficile de changer l'usage qui a vsurpé quelque autorité par vne longue possession: il grossit, & s'ennoblit en roulant comme les riuieres; si qu'il est mal-aisé, & quelquesfois dangereux de le ramener à sa premiere naissance. Si nous l'appellons Cardinal, nous luy baillons le titre que luy donne la commune voix du peuple, les Historiens Ecclesiastiques, & tous ceux qui parlent de luy; & en outre, la bonne foy semble luy deuoir conseruer ce titre. Il adheroit de vray au Pape schismatique, qui print le nom
de

de Clement VII. comme aussi
Saint Vincent Ferrier, & plu-
sieurs autres grands person-
nages remplis de vertu & de
saincteté; mais parmy les trou-
bles, & la grande confusion
des affaires de la Chrestienté,
ils ne le recognoissoient point
pour tel. Et puis souuent les
desguisemens de l'erreur, & de
la fausseté, surprennent la sim-
ple & innocente creance des
bons. Ce Pape ^{pil.} pourrissoit en
apparence de louables desseins
à la gloire de Dieu, & ne refu-
soit point d'entrer en traicté, &
de se soumettre à la determi-
nation d'un Concile; il sem-
bloit mesme fomentier les bons
desirs

desirs qu'auoit le Bien-heureux
Pierre , d'employer tout son
pouuoir enuers l'Empereur ,
& les autres Roys , & Princes
ses parens , pour desmesler ce
grand differend , & redōner sa
paix à l'Eglise ; il l'y exhortoit,
& luy ouuroit les expediens,
pour mettre à chef son entre-
prise : dont il formoit , & im-
primoit dans l'esprit franc &
innocent de ce ieune seruiteur
de Dieu, per^uerf^é aux affaires
du monde , de grandes appa-
rences de sa bonne foy. Toutes
ces belles raisons , avec le tai-
sible consentement du sainct
Siege, peuuent defendre de re-
proche le titre de Cardinal ,
que

que nous auons donné à ce
Bien-heureux. Si quelqu'un
desiroit de plus d'estre instruit
du delay de sa canonization
complete, il en trouuera les
raisons sur la fin du discours
de sa vie.

A P P R O B A T I O N
du Voyage spirituel du B.
PIERRE DE LUXEMBOURG.

V*Eu, & diligemment examiné, &
approuué par le Reuerend Pere en
Dieu, BERNARD BERALD, de
l'Ordre des Freres Prescheurs, exactissime
Inquisiteur de la Foy. Faict en Auignon
l'an de grace 1562.*

E X

Ex Epistola Ducis Burgundie ad Concilium Basileense anno 1436.

REVERENDISSIMI, Reuerendique Patres, & iam hora est, & nunc tempus idoneum venit, ut negotium diu desideratum super canonizatione, & eleuatione dignæ per secula memoriæ Domini PETRI DE LUXEMBURGO S. R. E. quondam Cardinalis, meique consanguinei, ad extremam manum, & operam, si duxeritis intendendum, deducatur: hoc enim variis in Conciliis generalibus Ecclesiæ, temporibus retroactis fuit inceptum. Sed quibus mediis, vel modis, ignoro, vel interruptum, vel aliàs quomodolibet imperfectum semper remansit, & ita remansurum (quod absit) existimò, nisi diuina super hoc prouidentia vestros in idipsum animos excitans prouideat, quæ vobis (ut arbitror) tantum decus, & laudis titulum specialiter reseruauit: quemadmodum ea sacro Constantiensi Conci

Concilio fuit, vt audiui, olim referuata
canonizatio quorundam Sanctorum, &c.
Quid vestro cœtui, ô veri pugiles, ve-
ræque bases Ecclesiæ, plus honoris, &
gloriæ accedere possit, quàm ad cano-
nizationem, & eleuationem prædictam
procedere; & eum, quem suis ex meritis
gloriosis, & tot miraculis velut inau-
ditis, quibus quotidie coruscat, aliorum
Christi Confessorum collegio constat
aggregari, ac cum his palàm, & publicè
adorandum eleuare, ipsîsque in catalogo
Sanctorum inscribendis ad perpetuam
eius laudem, & memoriam appo-
nere? Quas ob res V. P. R.

obnixè deprecor,

& hortor,

&c.

*

Contenu

Contenu de cet œuvre.

L A vie du Bien-heureux Pierre de Luxembourg,
Cardinal, Euesque de Mets, Protecteur de la
ville d'Auignon. Page 1

Le Voyage spirituel du Pelerin Catholique, dressé par
le mesme Bien-heureux: où est contenu ce qui suit.
Auant-propos, & comme l'entrée du Voyage, par la
demonstration du mal-heur de ceux qui ne tendent
à Dieu, & ne voyagent au Ciel: avec la proposition
des trois iournées necessaires pour retourner à
Dieu, & au chemin du Ciel, apres s'en estre
fournoyé. 97

Premiere iournée du voyage spirituel, pour reuenir
à Dieu, & se remettre au chemin du Ciel. 104

Seconde iournée du voyage spirituel, pour reuenir à
Dieu, & se remettre au chemin du Ciel. 111

Troisiesme iournée du voyage spirituel, pour reuenir
à Dieu, & se remettre au chemin du Ciel. 126

Poursuite du droict voyage au Ciel, apres estre reue-
nu à Dieu, ou des moyens d'entretenir la grace re-
couvrée par la penitence, & fomenter la deuotiõ. 133

Adresse pour la deuotion, & aduancement en la
voye du Ciel. 144

Autres adresses pour s'aduancer en la voye du Ciel,
& se garder de fournoyer d'icelle, & recheoir au
mal: données à sa sœur, Madame Ieanne de Lu-
xembourg, & comprises en diuerses Considera-
tions, tres-propres pour les ames plus espurées.

Consideration I. 161

Consideration II. 167

Consideration III. 182

Consideration IV. 193

Consideration V. 202

Consideration VI. 216



LA VIE DV B. PIERRE

CARDINAL DE
LUXEMBOURG, EVESQUE
de Mets, Protecteur de la Ville
d'Auignon.



LE premier & le plus
grand de tous les dons
du Ciel (disoit yn An-
cien) c'est de naistre
heureux, & se trouver aussi tost
dans la felicité que dans la nature.
C'est bien dit, s'il l'entendoit du
bon-heur de la sainteté, qui con-
tient en soy les qualitez qui doiuent
former la vraye grandeur & la feli-
cité d'une ame. Car d'ailleurs, à

A

vray dire, on n'est pas plus heureux pour estre recueilly en naissant sur vne escarlatte semée de couronnes, ou dans la chambre dorée, entre les bras de la fortune : puis qu'on void souvent que les enfans qui naissent riches des dons de fortune, ne se soucient point des biens de l'esprit, & vivent vicieux parmy les grandeurs & les delices que la naissance leur a fait eschoir en partage; tellement qu'il semble que par les loix auxquelles leur naissance les a afferuis, le vice ne regne en eux que par nature; & si la vertu & la sainteté s'y retrouve, on dit communement qu'elle n'y est que par miracle. D'où est artiué, que tous ceux qui ont tenu vne route extraordinaire de sainteté dans le chemin prophane des grandeurs du monde, ont esté prisez de la posterité, comme des miracles & des parangons de leur siècle.

Or

Or entre ceux qui ont mérité ce bel éloge d'honneur, le B. Pierre de Luxembourg s'est singulièrement rendu memorable par les fortes & rares preuues qu'il a données de sa sainteté, en tout le cours & aux actions de sa vie. Il estoit descendu de la tres-illustre & ancienne race des Princes de Luxembourg, qui a fourny quantité de Roys à la Hongrie & à la Boheme, vne Reine à la France, quatre Empereurs à l'Occident : de laquelle encore est issu nostre Roy Tres-Chrestien, Louys le Iuste, à presenr regnant, par le mariage de François de Vendosme son trisayeul, avec Marie de Luxembourg : & qui en fin selon le cours des choses du monde, comme vn tronc ja fort ancien, apres auoir longuement & heureusement ombragé toute l'Europe de ses branches, a defaillly pour le regard des masles en l'année 1616. se cou-

servant neantmoins encor en six tres-illustres Princesses, comme en autant de nobles rejettons de ce grand Arbre; plus glorieux incomparablemēt, pour avoir porté nostre Bien-heureux, & avoir plié de ses branches vne couronne à la Sainteté, que pour avoir en diuers endroits du mōde peuplé la Royauté.

Le B. Pierre donc naquit de ceste illustre & renommée tige à Ligny en Barrois, ville du Diocèse de Toul, le 20. Juillet, iour de la Feste Sainte Marguerite, en l'année 1360. lors que le Pape Gregoire XI. gouvernoit l'Eglise; Charles iv. de Luxembourg l'Empire, & Charles v. surnommé le sage, la France. Son pere fut Guy de Luxembourg, Comte de So Paul en Picardie & dudit Ligny; sa mere Mathilde de Chastillon des Comtes de Champagne. Heureuse couple, qui s'accordant honorablement

ment en humeurs, & en perfection de mœurs, rendoit vne tres-douce odeur de vertu, qui les faisoit singulierement aymer au Ciel, & honorer en la terre. Monsieur le Côte en toutes ses actions estoit vn vray modelle de sagesse & de pieté: Il vaquoit à l'oraison vocale ou mentale la plus grand part du iour & de la nuict, assistant à la Messe chaque iour avec attention & deuotion, les deux genoux en terre: ieusnant souvent outre les temps, & les iours ordonnez par l'Eglise, & notammēt le Védredy, auquel iour il ne mangeoit chose quelconque qui eust pris vie: d'où se peuuent aysément coniecturer les autres belles qualitez qui estoient en luy: le grand zele qu'il auoit pour la foy, & sa fidelité enuers son Roy, pour lequel il demeura quelque temps ostage en Angleterre. Madame la Comtesse de mesme s'accommodant au

La vie du glorieux

naturel & à la vie toute exemplaire de son mary, tenoit les exercices de pieté pour ses plus cheres grandeurs : Elle prenoit vn soin tres-affectueux des pauvres, desquels elle estoit communement appelée la mere, les sustentant, trauaillant & coufant de ses propres mains leurs habits, les consolant, visitant, portant ses pieds, ses mains, son cœur là où elle pensoit pouuoir rendre seruite à I E S V S- C H R I S T, qu'elle honoroit caché dedans ses pauvres.

Ainsi Dieu voulut faire contribuer singulierement la naissance & la nourriture de nostre Bienheureux, à la sainteté de sa vie. Car le rencontre de si bons & vertueux parens ne luy seruit pas de peu, pour luy faire receuoir dès son enfance les premiers traicts de la vertu, par l'instruction, & par l'exemple de ses pere & mere.

Ceste

Ceste bonne mere auoit prins vn soin tres-particulier pour façonner ses premiers ans à la vertu : mesme qu'elle ne voulut nullement permettre qu'il succast autre lait que le sien, craignant qu'avec le lait estranger il ne fust inbu de mauuaises inclinations. Mais comme elle s'addonnoit à cultiuer amoureusement ce ieune tendron, Dieu par sa secrette prouidence la voulut appeller, & priver l'enfance du petit Pierre de ce doux support.

A peine auoit-il alors atteint l'age de trois ans, quand son pere diuisé d'avec sa chere moitié, & se voyant chargé de cinq enfans, resolut d'en partager le soin avec la Comtesse d'Oargieres sa sœur. Il luy consigne doncques le petit Pierre, comme celuy qui entre tous ses enfans flattoit ses esperances, qu'il seroit vn iour l'honneur & le lustre de sa famille, luy recomman-

dant toute sa conduite & instruction. La Comtesse accepta librement ; & avec grande ioye ceste douce charge , & s'en acquitta dignement : car comme elle apperceut qu'il articuloit distinctement les mots , elle fit diligente recherche de personnes capables pour son instruction és principes des lettres, & és bonnes mœurs ; sçachant bien que les esprits & les mœurs, s'ils ne sont deuëment cultiuez demeurent en friche ; & ne produisans que par nature , ne germent , & ne jettent que des espines. Le rencontre en fut heureux ; & en suite l'auancement du petit Pierre tres-notable. Il comprenoit & retenoit tout ce qu'iluy estoit enseigné, avec vne facilité si grâde, qu'on iugeoit qu'il y auoit du surnaturel : & ce qui augmentoit l'admiration , estoit qu'il accompagnoit toutes ses actions d'une si rare modestie & retenue, qu'en

qu'en ce bas aage il seruoit desia d'exemplaire à tous ceux qui vouloyent jetter les yeux sur luy, & y prendre le reiglement de leur vie, qui tous coniecturoyent desia bien de la belle aube de ceste enfance, quel seroit l'esclat de ce Soleil en son plus haut ascendant, & en la perfection de son iour.

Son pere, après quelque temps, l'ayant retiré chez soy avec son Precepteur, ne demeura pas beaucoup de sauouer les doux fruiçts d'une enfance si bien esleuée, en vne merueille qui arriua dans sa maison memorable à toute la posterité. Nostre B. Pierre auoit succé la compassion des pautres avec le lait de sa mere: ses plus tendres delices estoient de distribuer le pain aux mendians qui assiegeoient les portes du chasteau, les innocens & saints artifices de picorer sur les reliefs de table, en la cuisine, en la

credence, & par tout où il pensoit attraper quelque chose pour leur apporter; iusques là que ne pouuant souffrir de les voir en attente, il tiroit de la marmite qui estoit sur le feu la chair qui y cuisoit pour le disner de ceux de la maison. Monsieur le Comte print vn iour garde à ce dechet; & vne autre fois trouuant à dire à sa table d'une perdrix, & de quelques restes de la hure d'un sanglier, il apprint des officiers ausquels il en faisoit plainte, que c'estoyent des effets de la charité de Monsieur son fils enuers les paures; & qu'il auoit respondu, comme on luy representoit, qu'il leur seroit demandé compte de ce qu'il prenoit, que son pere le scauoit bien. Ces propos estonnerent Monsieur le Comte, & luy firent dire par admiration, voicy vn nouveau Architecte d'aumosnes, qui oste le morceau de la bouche de son

son pere pour le donner aux pauvres. En suite, il commanda qu'on prinst vne autre fois garde à luy, & qu'on l'en aduertist, parce qu'il desiroit de le surprendre en semblable fait. Peu de iours apres, nostre ieune aumosnier ne manqua point à son accoustumée de faire ses reueuës à la porte, & y ayant apperceu bonne trouppes de ses pensionnaires, il s'achemina à la cuisine à pas desrobez, en bonne deuotion d'enleuer tout ce qui seroit exposé à sa main, & de bonne prise. Il chercha & fureta par tout, & enfin n'ayant trouué rien mieux, il larda la meilleure piece de chair qui estoit preparée pour le disner, & l'emporta ainsi sans autre ceremonie dans le pan de sa robe, qui estoit de toile d'argent pourfilée d'or. Monsieur le Comte en estant aduertie y accourut, & l'abordant à la porte, luy demanda qu'estoit ce

qu'il portoit dans le reply de sa robe. Le saint enfant se treuant surpris, tout couuert d'une rose pudeur, eut bien voulu treuver quelque defaite ; mais en fin se rassurant vn peu, il fit ceste responce, que Dieu sans doute luy inspira , qu'il portoit des roses aux pauvres. C'est bien dit, repart son pere , & vous estes donc vn petit menteur ? & en outre vous dites que ie le sçay biẽ ? & vous en comptez ainsi à mes gens ? Ouy dea, Monsieur (repliqua le saint enfant tout modestement, jettant vne douce & innocente œillade deuers le Ciel) i'ay dit que mon Pere le sçauoit bien , l'entendant d'un Pere que i'ay autre que vous , qui est nostre Pere commun qui est aux Cieux. Ces paroles frapperent Monsieur le Comte au cœur , qui curieux de voir ce que son fils feroit dans son sein , deployant sa robe , treuva vn prodige

ge

ge admirable, la chair changée en belles roses, quoy que ce fust en temps d'hyuer, & la robbe nullement souillée. Il tint à peu qu'il ne demeurast pasmé d'estonnement, à la veüe d'une si inopinée merueille: Il print les roses, & les baïsa, & se separant d'avec son fils sans parler, les porta dans son cabinet pour en faire thresor: mais peu apres elles ne se treuvoient plus. Deslors il ne fit nulle doute que Dieu ne se voulust seruir de cet enfant pour en faire vn grand Sainct, & le planter vn iour, comme vn beau Soleil, dans le ciel de son Eglise.

Au demeurant nostre B. Pierre en cet aage, tout Innocent (car à peine auoit-il atteint la neuuesme années) profita encor grandement du miracle qu'il auoit veu: il s'en humilia, & commença à nourrir des desseins vertueux à la gloire de Dieu, au soulagement des pauvres, & au

& au salut de son prochain. Il se mit à faire le predicateur, taschant d'allumer le feu de deuotion dans le cœur de ses freres. Son zele se desploya particulièrement sur sa sœur vnique, nommée Ieane, qui le deuançoit en aage d'environ deux ans, laquelle il pressa si beau & si bien, qu'il luy persuada de quitter tous ces petits esbats & amusoirs de ieunesse, pour se consacrer entièrement à Dieu, & s'adonner sérieusement à la pieté, & aux saintes exercices de la deuotion : il la fit mesme resoudre à garder perpetuelle virginité, & à donner ses saintes amours au souuerain Espoux I E S V S. C'estoit vn petit paradis que de voir ces deux Anges enfermez dans quelque cabinet, ouurir la fenestre, jeter leurs yeux au Ciel, & leurs cœurs par les yeux, & parler à Dieu d'vn langage que le S. Esprit leur auoit appris, entre-

tre-couppé

tre coupé de doux & sacrez souf-
pirs, qui coup sur coup leur eschap-
poyent. Ils en vindrent mesmes ius-
ques là, que de se leuer souuent à la
minuict, & s'occuper deux heures
durant à la priere, & à la sainte
meditation, avec de doux trans-
ports, & des priuautez innocentes
qui les entretenoyēt tout ce temps
sans ennuy.

La vie du B. Pierre, en l'aage
seulement de dix ans, estoit desia
vn tableau d'honneur & de vertu,
si plein, qu'il n'y auoit rien qui n'ar-
restast l'œil, & ne tirast l'admiratiō.
Pource, Monsieur son pere resolut
de l'enuoyer à Paris, comme à la
foire des arts & des sciences, où il
peust meubler son esprit des belles
cognoissances qui pouuoient d'a-
uantage faire esclatter sa vertu, &
son excellent naturel. Là doncques
il fut mis sous la conduite de deux
hommes fort doctes & capables, &
pleins

pleins de probité, avec l'ayde desquels il fit en peu de temps de tres-grands auancemens aux lettres humaines. Il passa à la philosophie, qui fit brauement la pointe à son esprit, & luy ouurit le iugement pour entendre en suite le droit Canon. En tout lequel temps, bien que quantité de vertus entroyent comme en concurrence, pour le rendre admirable, & saintement venerable à tous ses condisciples, son obeyssance, sa debonnaireté, son zele, sa studiosité, sa diligence, & sa deuotion singuliere: toutes fois par dessus toutes parut le mespris de soy & de l'opinion du monde, & la simplicité esloignée d'ostentation & de faste, qui luy faisoit souuent congедier ses seruiteurs qui estoient à son train, pour ne paroistre quelque chose par dessus les autres.

Il estoit pres d'acheuer heureusement ses estudes, quand deux grandes

grandes disgraces vindrent trauffer & ses estudes & son repos, qui estoÿent capables d'abatre son saint courage, si sa pieté singuliere n'eust seruy de contrepoids à ces sinistres euonemens, pour les rendre supportables. Car en premier lieu son Pere qu'il naymoit & honoroit grandement vint à deceder, le laissant ainsi orphelin, sous la charge & protection de son frere aîné, nommé Valerian, qui comme chef de la maison de Luxembourg, en fut appellé Comte, & de S. Paul. L'autre affliction qui suivit bien tost, fut, que ce sien frere soustenant diuerfes guerres qui estoient en ce temps, nommément entre les François & les Anglois, il fut prins prisonnier par l'ennemy Anglois, & en danger de perdre la vie, s'il ne pouuoit fournir à la grosse rançon qu'on luy demandoit pour sa deliurance. Mais ce malheur seruit de
fonds

fonds à l'esclat de la vertu du B. Pierre, qui ressentant cordialement le danger auquel estoit exposé son bien-aimé frere, se transporta à Calais où son frere estoit detenu prisonnier, & se liura en ostage pour luy, à fin qu'estant eslargy, il peust plus aysément moyenner la somme qui luy estoit demandée. Neuf mois se passerent avant que la somme de la rançon fust prestee : pendant lequel temps le B. Pierre gaigna le cœur de tous ces estrangers, par les traicts admirables de ses rares vertus ; & sur tout de sa modestie, qui comme vn sacré & secret aymant, attira à soy la bien-vueillance de ces cœurs de fer, si qu'ils ne le tenoyent point dans les seueritez gardées à vn prisonnier, ains ils le laissoyent en pleine liberté d'aller par tout où bon luy sembloit, se relyingans entierement sur sa vertu reconnüe.

En

En fin la rançon apportée, le B. Pierre sortit de Calais pour s'en retourner à Paris, & y acheuer ses estudes interrompus, infiniment aise d'auoir eschappé à tous ces ennuys qui l'auoyent trauaillé tout ce temps qu'il auoit discontinué ses occupations ordinaires. Reuenu il renouella avec ses estudes ses ferueurs, voire il les augmenta, entreprenant au surplus de grandes & rudes mortifications pour mater & captiuer son tendre corps, l'exposant à la rigueur des disciplines, des haïres, des cilices, des ieunes, & à toutes les autres especes de materations & d'austeritez, desquelles les Saints ont accoustumé d'une sainte cruauté d'outrager leurs corps: ausquels exercices ce ieune Bachelier en l'apprentissage de l'amour de Dieu, eut commis de grâds excez, s'il n'eust esté redressé par la sage conduite & les bons aduis

aduis d'un grand seruiteur de Dieu Monsieur Philippe de Mazieres, qui de Chancelier du Royaume de Chypre, ennuyé du tracas & des inquietudes qui accompagnent ceux qui vivent à la Cour des Princes, s'estoit lié aux loix d'une vie solitaire, menant en habit seculier une vie retirée & religieuse dans le Conuent des Peres Celestins de Paris. Ce grand personnage doncques bien versé en la science des Saints, par quelques conferences qu'il eut avec le B. Pierre, modera l'excez des austeritez violentes où le portoyent les premieres flammes de la diuine charité, & le rendit en peu de temps bien sçauant des plus hauts principes de la vie spirituelle.

Ainsi sous la conduite de ce sage Pilote, & à la faueur des douces halénées du S. Esprit, le B. Pierre alloit heureusement s'auançant à pleines voiles dans les routes de la
perfe

perfection; quand voicy vn soudain orage qui se souleue, & vient choquer furieusement ses desseins. Le Comte de Luxembourg son frere, se voyant tous les iours exposé aux perils, auxquels son deuoir & l'honneur l'engageoyent, & pource le desirant à son défaut son successeur, ou parce qu'il l'aymoit tendrement, le souhaitte en sa compagnie ne se contenta point de le faire solliciter par ses maistres, & par des personnes religieuses, à quitter ceste humeur sombre dans laquelle la deuotion & les estudes entretenoyent; mais luy-mesme l'en treprint vn iour ouuertement; & luy en parla en ces termes: Il est veritable (mon tres-cher frere) que ie vous ay veu volontiers iusqu'à ces temps dans l'occupation des ostades, qui sert sans doute grand bien pour donner la trempe d'une bonne nourriture aux enfans; & les

oste

este de la portée de quantité de vices, qui accueillent ceux qui negligent la cognoissance des lettres. Mais ie ne peux maintenant souffrir de voir que ces années precieuses de vostre adolescence, que vous deuez prester à l'instruction des affaires du monde, s'escoulent sans aucun fruit dans la poussiere des escholes, & ne seruent que pour accroistre vostre aage, & diminuer vostre fortune. Nous sommes en vn temps auquel les merites sont la mesure des belles fortunes; & les merites dignes de vostre naissance, & de vostre ambition, ne s'estoffent point des ergots d'une classe, ou des pointilles d'une loy, mais d'autres plus glorieuses actions, auxquelles les beaux & renommés exemples de nos ayeuls vous appellent, vous obligans à ne forligner point de la route d'honneur, qu'ils ont glorieusement battue. Il se faut donc
resou

resoudre sans plus à nourrir d'autres pensées que celles qui vous ont entretenu jusqu'à présent, & vous esuertuer de viure, non tant pour vous, que pour les vostres, & pour la splendeur & establissement de vostre maison: non tant pour vostre contentement que pour le public, pour les autels, & pour l'honneur de vostre patrie. Ces paroles prononcées d'un accent ferme, eussent esbranlé vn autre courage que celuy du B. Pierre: qui sans tesmoigner d'auoir esté émeu, repartit à son frere d'une contenance grane & modeste. Messieurs, les representations que vous venez de me faire sont trop foibles pour me faire rompre les resolutions que i'ay prises par le conseil de Dieu. I'aduoue que l'espée est l'artisan de ces belles & luisantes fornyes auxquelles aspirent ceux qui ont esté persuadés de la vanité, que les
gran

grandeurs terrestres sont le souverain bien de l'homme: Mais la vérité m'a instruit que ie devois milleurs porter la visée de mes ambitions, où la foy assigne mes plus certaines esperances. Et partant ne me flattez plus du costé de ces apparences pleines d'illusions, d'alarmes, & de dangers: & ne blasmez plus l'oisiveté de mes occupations (ce vous semble) inutiles aux miens, au public, & à ma patrie. Je suis assez honorablement occupé, n'ayant que le soin de mon ame, & pensant, non comme ie dois passer le temps, & m'accommoder aux humeurs du monde; mais comme ie dois finir ma vie, & sortir du monde. Dieu sans moy: pouruoit il suffisamment au reste par les autres moyens qui seruiroient à l'employ de sa providence.

Le Comte de Luxembourg, suffisamment payé de ceste belle response,

sponse, & d'ailleurs craignant d'offenser les secrets de la providence diuine, & d'irriter Dieu, en contrecarrant l'obeyssance que son frere rendoit à ses saintes inspirations, se resolut de le laisser viure selon la pente de ses inclinations. Comme il estoit neantmoins en apprehension qu'il ne prinst le parti d'un Cloistre, ou de quelque solitude escartée, il s'aduisa de l'attacher à des benefices Ecclesiastiques. Dont vne Chanonle s'estant en mesme temps treuée vaquante en l'Eglise Cathedrale de Nostre Dame de Paris, il l'en fit sur le champ pouruoir : à quoy le B. Pierre s'accorda tres-volontiers, & s'en estima grandement honoré, quelque petit que fust le benefice, en esgard au rang que sa naissance luy auoit acquis dans le monde, & aux biens qu'elle luy gardoit dans les partages de sa maison : mais, luy ne regardoit qu'à

B

l'honneur qu'il auoit d'estre député au seruice de Dieu, de se treuuer pres des Autels, & de pouuoir en vertu de sa profession mettre à d'employ ses deuotes volonte. Ce qu'il fit bien paroistre en vne action remarquable, qui attira l'admiration de tout le Clergé. Car estant arriué, que celuy qui estoit destiné pour porter la Croix en vne procession generale, surpris de quelque orgueil secret, auoit fait refus de la prendre : le B. Pierre allumé d'un genereux desir de s'humilier en la presence de Dieu, & deuant le monde, print avec demonstration d'une singuliere allegresse ceste marque de nostre redemption, & la porta la procession durant, avec un maintien angelique, la veüe abaissée, & le visage coloré d'une chaste flamme, qui arrestoit les yeux, & attiroit l'amour, & l'admiration de tous ceux qui sçauoyent son extraction,

Etion, & le rang que luy donnoyent
ses merites.

La belle renommée de ses vertus s'espandit par toute la France, & iusqu'à Auignon, où le Pape Schismatique qui print le nom de Clement VII. s'estoit retiré; Urbain VI. legitime Pontife de l'Eglise, demeurant cependant dans Rome: mais pour lors les affaires estoient tellement enuêloppées, que la plus grande partie des Princes Chrestiens, & vn grand nombre de personnes eminentes en sainteté & en doctrine, pour ce temps adheroient à Clement. Ce Pape donc ayant appris que le B. Pierre estoit orné de si belles mœurs, & donnoit tant de preuues de sa sainteté, pour resmouuer sa bonne affection en son endroit, & en attendant que les occasions naissantes luy donnassent le moyen de le pouruoir d'une plus haute dignité,

le pourueut de son propre mouuement du benefice d'Archidiacre de Dreux en Normandie:lequel en fin il accepta, & en alla prendre la possession, apres plusieurs difficultez, & vn commandement reïteré qu'il attendit du Pape; demeurant neantmoins en grande apprehension que ceste dignité ne luy seruiſt de marche pour monter à de plus hautes, ce qu'il redoutoit autant que les autres le desirent. Desireux neantmoins de ne paroistre point incapable des charges qu'on luy auoit imposées, il s'en retourna bien tost à Paris pour estudier en Theologie.

Et tout ainsi que la simple colombe a tousiours les yeux & le cœur à son nid, où est tout ce qu'elle ayme: de mesme le B. Pierre tout ennuyé de ce tracas d'affaires qui distraisoÿt son pauvre cœur, n'eut rien de plus doux que de reprendre
au

au plustost les exercices ordinaires de ses estudes & de ses deuotions, qui estoient tous ses esbats & tout son desiré repos. Ce fut pour lors qu'il se sentit viuement frappé au cœur d'un grand desir de la plus sublimè perfection; à laquelle il estoit attiré par vne incroyable violence d'amour. Ce qu'ayant apperceu ce maudit ennemy de la vertu & de la saincteté, il se glissa en serpent dans le petit paradis de son cœur; il le flattoit, il le chatoüilloit, il le pinçoit; il l'eschauffoit de son haleine ensouffrés; il l'excitoit à mille vaines complaisances; il luy donnoit de sentimens voluptueux; il le remplissoit de frayeurs & d'alarmes; bref il fectant par ses maudits artifices qu'il fit vn petit purgatoire du paradis de ceste belle ame. Toutesfois la forte & vigoureuse resistance que le diable trouua dans la volonté de nostre Bien-

heureux , le fit presque repentir de l'auoir attaqué; car pour vaincre ces tentations, & assouplir entieremēt, & rendre obeyffans les sens à la raison, il chastia si rigoureusement son corps , & l'outragea d'vne sainte cholere en tant de manieres , par longues disciplines , ieusnes continuels, veilles, haires, cilices, qu'il recouura en fin sa paix , & tira du souffre de ces souffrances le bel or de plusieurs grands & riches merites.

Despuis il conceut vne grande crainte , que la conuersation du monde ne blessast & n'entamast l'innocence de sa conscience , & que les charmās attraiçts des voluptez molles & lasciuës ne l'attirassent dans quelque gouffre de malheur : pource il faisoit dessein de quitter entierement le monde , & de se confiner dans quelque solitude, où retiré hors de la portée de ces

ces tentations, il n'eust autre occupation que de dresser ses pensées au ciel, & de ranger toutes ses affections à son service. Mais il reconnut bien en vn discours que luy en fit le sieur de Mazieres, duquel nous auons parlé cy dessus, qu'il n'y auoit point d'ouuerture pour executer son desir, tant à cause de son bas âge, que de la difficulté que luy apporteroient ses parens. C'est pourquoy il se resolut de s'vnir parfaitement à son Dieu, iouyr tousiours de sa presence, & se donner en proie à son saint amour: dont on le trouuoit souuentefois, tantost pâmé entre les embrassemens d'vn Crucifix, tantost desbordant vn torrent de ses larmes, tantost soupirant doucement vers le ciel, le seul sejour de tout son bien. Il prenoit vn grand contentement en la lecture des vies des Saints, d'où comme vn sçauant peintre spirituel

il alloit traçant sur son cœur le tableau de la vertu , accomplie sur tant de belles idées que ce liure luy fournissoit. Bref, il ne laissoit nulle occasion de bien faire en arriere, en laquelle il peust donner tesmoignage de sa fidelité enuers Dieu.

Cependant le Pape Clement desireux de l'attirer aupres de soy , & de tirer sa lampe de dessous le boisseau de l'humilité , pour la mettre sur le chandelier de l'honneur , espioit toutes les occasions de le pourvoir de quelque dignité Episcopale. Sur quoy l'Euesché de Mets estant venu à vaquer , il l'en pourueut nonobstant son bas âge, qui n'estoit encore que de quinze à seize ans. Dont nostre Bien-heureux se sentit saisi de crainte , se iugeant trop foible pour porter vn si pesant fardeau, sous lequel les vertus mesmes du ciel trembleroyent, & non seulement les hommes qui
sont

sont esleuez aux plus hauts degrez du merite. Et d'ailleurs son humilité le pressoit de fuir ces dignitez & ces prelatures, & de les repousser aussi viuement que l'aymant blanc rejette le fer, fer que l'aymât noir attire avec tant d'auidité & tant de force. S'y voyant neantmoins contraint par le commandement du Roy de France, il accepta la charge, & s'achemina à Mets pour en prendre la possession, & s'acquitter d'une partie des obligations qu'elle luy auoit imposées.

Estant arriué à Mets, & receu avec applaudissement d'un chacun, pour soustenir en soy avec plus de merite ceste eminente condition; il porta incontinent ses desirs à une perfection toute Apostolique, y volât de toutes les aîles de son zele. Car ayant ramassé quelques Prestres des plus pieux & âgez de son Diocese, il commença

d'un grand soin avec son Suffragant de faire les visites, espendant par tout les semences de pieté, & exterminant la racine des vices. Il mettoit peine que les Eglises fussent proprement ornées & bien seruies; & fit vne liste des plus pauvres, auxquelles il voulut que le tiers du reuenu de son Euesché fust employé, l'autre tiers estant destiné aux pauvres du Diocèse, & le reste pour l'entretien de sa famille. Lequel mesnagement de son reuenu temporel il voulut estre rigoureusement observé; donnant ordre que pas vn denier n'en fust soustrait pour estre employé en faueur de ses parens. Il luy arriua vn iour faisant ses visites par son Diocèse, qu'il ressentit quelque émotion de sa chair, causée par l'agitation du cheual, qu'il reprima aussitost par des esclans vigoureux qu'il fit d'amour enuers Dieu, & par d'autres

d'autres saintes pensées qu'il mit comme vn frein dans la bouche de la concupiscence. Il fut neantmoins en doute si en quelque façon il y auoit de sa faute : & sur ces entre-faites continuât tousiours son chemin , il se treuua à l'orée d'un bois, occasion qu'il fit auancer sa compagnie : & y estant entré il se disciplina si rudement, qu'usant du mot de S. François , son asne demeura lassé & matté de coups : & retournant au petit pas apres ses gens , & leur ayant demandé s'il auoit beaucoup demeuré, ils luy respondirent (ce qui le hontoia grâdement) qu'il n'auoit pas demeuré oysieux dans le bois.

Il chastioit rigoureusement les plus petits pechez veniels , esquels il se treuuoit par fois estre cheu plustost par fragilité que par affection. Car pour les mortels , Dieu l'en preserua tout le temps de sa

vie, ainsi qu'attesterēt apres sa mort tous les tesmoins ouys sur ses mœurs & conuersation. Quand il se vouloit confesser, il faisoit vne tres-exacte recherche de ses defauts, & apres icelle il ne manquoit à chastier son corps avec la discipline; encore que d'ordinaire il portast le cilice qui meurtrissoit tout son pauvre corps, avec vne grosse ceinture de crin de cheual à nœuds, de laquelle il se serroit si fort, que par fois elle s'incarnoit dans la chair, & le sang en decouloit en abondance. Ceste rude ceinture, ensemble vne discipline, furent treuuées par vn sien domestique deffous la natte de sa chambre, teintes en plusieurs endroits de son sang, desquelles il se faisoit, & les luy ayant monstrées estant seul, le pria de luy dire à quoy cela seruoit. Le Bien-heureux Sainct, tout honteux qu'on eust surprins les chers outils de sa

de sa penitence, luy respondit, avec vn doux soufrire, que c'estoit pour chastier les chiens. lors qu'ils faisoient du mal. Alors cet officier, touché d'un tendre ressentiment, luy repliqua; la larme à l'œil, avec beaucoup de respect, qu'il estoit trop rigoureux ennemy de sa chair, & qu'un corps rabotté d'une souche, ou basti de bronze & de fer, ne pourroit supporter de si violentes seueritez; & partant, qu'il le prioit instamment de relascher vn peu de ses rigueurs, & qu'il luy fist don de ceste discipline, & qu'il la prendroit de bon cœur pour l'amour de luy. Mais le Bien-heureux ne le voulut faire, & retira sa discipline, obligé à estreittement de priere ce sien seruiteur, de n'en parler à personne, parce qu'il ne s'en vouloit plus seruir. Mais le seruiteur se doutant bien qu'il ne s'espargneroit pas en ses austeritez accoustumées, & le voyant

voyant vn iour à raison dē ses ieunes; le visage tout haue, passe, & de-
teint, il en voulut aduertir par com-
passion son Confesseur, qui eut
l'autorité de moderer vn peu les
bouillons de ses ferueurs exces-
sives.

Pendant le peu de temps que
nostre Bien-heureux sejourna en
son Euesché, il s'acquit singuliere-
ment la bien-vueillance du ciel, le
respect & l'admiration de ses Dio-
cesains, la gloire & la reputation de
saincteté par tout. Le Pape Clemēt
tout glorieux du digne choix qu'il
auoit fait d'une personne si pleine
de vrays & solides merites, & desi-
reux d'en decorer sa Cour, luy
manda de le venir treuuer à Aui-
gnon, à quoy il obeit tres-volon-
tiers. Il fut receu dans ceste noble
Ville avec ioye & applaudissement
de tous les Seigneurs de la Cour
du Pape, & des habitans, qui n'a-
gueres

guerres y auoyent magnifiquement receu l'Empereur Charles I V. de Luxembourg ; & ſpecialement du Pape qui l'embraſſa fort cordialement, luy r dant toute ſorte d'honneur & de bon accueil. Et apres luy auoir dit que la cauſe pour laquelle il l'auoit mand , eſtoit pour iouyr de ſa preſence , & le faire Cardinal. Le Bion heureux Sain t, avec toute l'humilit  qu'il peut , le ſupplia de ne le point eſleuer en cet honneur , qu'il ne pouuoit eſperer par merite, ny poſſeder ſans conſuſion, ſe voyant remply de tant d'indignitez, ieune, infirme, & ja aſſez accabl  ſous le faix & la foule des charges qu'il luy auoit de ſa grace donn es. Le Pape toutesfois ſans s'arreſter   ſes excuſes, & ſans delay, le lendemain celebrant la Meſſe, il le crea Diacre Cardinal , ſous le tiltre de S. George au voile d'or, en preſence de tous les Cardinaux , Seigneurs,

gneurs & Princes de la Cour, qui tous conceuoient de grandes esperances de ce ieune Prince, & applaudissoient cordialement à son eslection. Mais luy parmy ces grâds applaudissemens, & au milieu des chatoüillemens de l'honneur, n'en paroïssoit pas plus ioyeux ny content, ains plustost il portoit en son visage les marques de l'alienation que son humilité nourrissoit en son ame des prelatures & des grandeurs du siecle.

Estant donc fait Cardinal, & se voyant obligé de suiure la Cour du Pape; & en suite craignant de se voir engagé dans plusieurs dangereux rencontres, il prescriuit de rigoureuses reigles à ses sens, & les arma à prouue des plus poissans & charmans appas de la bobance & volupté mondaine. Car outre les ieunes communs de l'Eglise qu'il obseruoit au pain & à l'eau, il ieus-

noit

noit encor tous les Mecedys à l'honneur de l'offrâde que fit le Fils de Dieu de luy mesme à ses ennemis au iardin des oliues; les Védredys en memoire de sa sainte Passiõ & mort; & les Samedys à l'honneur de la Vierge Marie, appliquant à ce d'ordinaire les sujets de ses meditations: & en ses autres repas il pratiquoit vne abstinence incroyable, craignant, ce disoit-il, que la chaleur du boire & du manger n'engendrast dans la corruption de la nature quelque petit serpenteau de volupté qui luy rongeast le cœur. On peut dire de luy veritablemēt, que dans l'affluence des grandeurs il estoit comme vn chien en la maison de son maistre, viuotant presque seulement avec du pain & de l'eau, & se couchant apres sur le paué couuert d'vne simple natte de joncs, où il vaquoit à l'oraison la plus grande partie de la nuit, laissant

sant son liſt mollet & de parade
vuide, & ſans s'en ſeruir, ores que le
lendemain il paruſt qu'il y euſt
couché. Ce qu'en ſin fut deſcou-
uert par vn de ſes domeſtiques, qui
en aduiſa ſon Confeſſeur, au con-
ſeil duquel il defera quelque choſe
pour le regard de ſon coucher. Le
Pape encor fut prié de luy com-
mander qu'il relachast vn peu de
ces grandes auſteritez qui fletrif-
ſoyent ſon pauvre corps, & le pre-
cipitoient à la mort: ce qu'il promit
de faire. Comme donc il l'eut man-
dé venir à ce deſſein, incontinent
qu'il mit le pied dans la chambre
du Pape, il parut eſtincelant tout à
l'entour de ſon corps d'une douce
clarté, qui fut apperceüe du Pape,
& de tous les Prelats qui eſtoient
là preſens. Lors le Pape congediant
le Cardinal de Cambray avec le-
quel il traittoit, print noſtre Bien-
heureux par la main, & le tirant à
part,

part, demeura quelque temps comme esblouy du brillement de la lumiere qui croissoit alentour de luy, & iaillissoit en abondance; mais en fin ceste grande clarté qui l'auoit comme esperdu, estant vn peu perduë, il luy tint ce discours. Il est veritable (mon fils) que c'est vn grand sujet de benir Dieu, quād les exemples des belles mœurs sont frequens & familiers aux gens d'Eglise, & particulièrement à ceux qui sont esleuez en dignité & Prelature, dans les actions desquels le peuple s'instruit plus volontiers que dans les discours: dont i'ay occasion de me flatter, au digne choix que i'ay fait de vostre personne, la mettant sur le chandelier de l'Eglise, à fin que vos vertus luisent à tous les enfans de sa maison. Toutesfois comme ce m'est vn precieux contentement de voir en presence vos vertus en exercice, lequel

lesquelles auparavant ie ne cognoissois que par reputation; aussi me feroit-ce beaucoup de regret, que vos ferueurs apportassent quelque dommage à vostre santé, que ie tiens si chere. Et partant ie vous prie d'estre vn peu plus indulgent à vostre corps, qui doit par nécessité seruir aux fonctions de l'ame, & de donner quelques trefues à ces grandes austeritez, qui ont desiaminé ses forces, & ruiné tout son embonpoint; en quoy il est à craindre que vous ne vous rendiez coupable deuant Dieu, qui vous ayant sans doute appelé par sa prouidence aux charges que vous possédez, vous a obligé à ne vivre point tant pour vous que pour son peuple, & pour le seruice de son Eglise.

Ces paroles estonnerent grandement le bon Cardinal, & le rendirent tout honteux, pour se voir ainsi descouuert; si qu'à peine peut-il pro

il proferer ce peu de mots en tremblant : Pere Sainct, ie ne fay aucun bien en ce monde, y estant trop inutile, ce qui est à ma grande confusion. Et ce dit, il se mit à genoux pour prendre la benediction de sa Saincteté. Le Pape le baïsa, & comme il l'eut baisé, il s'etit vne soüefue odeur de son corps : toutesfois pensant par apres que c'estoit de ses habits, ou pour quelque autre necessité qu'il portoit ces odeurs, il en voulut faire enqueste secrette de l'un de ses plus anciens & priez domestiques, duquel il apprint, que despuis douze ans qu'il estoit à son seruice il n'auoit iamais vsé de parfums, les deffendant mesmes à tous ses domestiques ; & leur disant que les parfums seruoïent à couvrir la puanteur des pechez. Il y eut vn Cardinal, lequel parlant au Pape de nostre Bien-heureux, disoit, qu'il admiroit grandement sa maniere

niere de viure , mais qu'il s'estonnoit comme il se seruoit de parfums. Sa Saincteté le corrigea aussi tost, & luy dit qu'il se trompoit, que ce n'estoyent parfums recherchez, mais la bonne odeur de sa saincteté & de ses bonnes œuvres ; ce que le Cardinal encore voulut apprendre par la relation de ses domestiques.

Tout Auignon parloit des excellentes vertus du B. Cardinal , & n'estoit personne qui ne se persuadast que sa pieté seroit comme le precieux aymant , qui tireroit les benedictions du ciel sur ceste ville, qui estoit ainsi bien-heurée de sa presence. A luy seul c'estoit du tourment de se voir tant honoré & respecté de tous , mesmes des plus anciens Cardinaux, ce que son humilité ne pouuoit souffrir , se reputant digne de toute sorte de mespris & de confusion , & desirant de rencontrer quelque personne qui le punist

punist & chastiaist selon ses merites. Il s'affligcoit souuent de ce que ceste pourpre luy desroboit tant de sujets de s'humilier, pource il se fust volontiers deguisé en garçon d'estable, ou en galopin de cuisine, s'il en eust eu le pouuoir, estant tousiours plus content de se treuuer dans l'ombre du mespris, que de paroistre au soleil, & en l'esclat des honneurs. Les tesmoins oculaires de sa conuersation, & qui ont signé les actes de sa vie, ont tesmoigné qu'il estoit plus humble que la fragilité humaine ne pouuoit permettre. Il disoit souuent à ses domestiques que chacun loüe l'humilité, mais que peu la veulent posseder, parce que le iuste prix & l'excellence de sa perfection n'est cogneüe que de ceux qui la possedent. Sa racine, disoit-il, descend iusqu'aux enfers, & la pointe de ses rameaux se cache dans le ciel. Il reprenoit vn iour

iour vn de ses domestiques, qui s'excusoit tousiours encor qu'il eust failly, & luy disoit que c'estoit faute d'humilité; le seruiteur luy repliqua: Monseigneur, ie voudrois estre bien humble, mais ie ne sçay par où il faut commencer pour le deuenir: alors le B. Cardinal le tirant à part, luy dit, fais vn recueil par escrit de tous tes defauts & miseres, tant corporelles que spirituelles; & puis fais en vne lecture attentive tous les iours au matin, & ne doute nullement que tu ne deuieunes humble: car la superbe n'est autre chose qu'un auuglement d'esprit, & vn amour desordonné de soy-mesme; comme au contraire, l'humilité se deriue de la sincere cognoissance de ses propres defauts & imperfections. En vertu de cet aduis, ce bon seruiteur fit de grâds progresz en l'humilité, & quoy que despuis il fut souuent tasté, &

essayé

essayé de toutes parts , il s'humilia neantmoins tousiours sans se plaindre , & endura tout patiemment ; à quoy luy seruoit de beaucoup ce viuant exemplaire d'humilité, qu'il ne perdoit iamais de veüe.

Il est veritable que toutes les vertus esclattoient à merueilles dans sa vie , & les deportemens de nostre Bien-heureux Cardinal, tout ainsi que dans vn opale reluisent, (ce dit-on) les feux & les couleurs de toutes les pierreries. Mais particulièrement esclattoit à tout le monde sa charité bien-faisante enuers les pauvres. Ces belles ames, & vraiment royales, qui sont liberales des affections de leur cœur enuers Dieu , le sont aussi enuers leurs prochains. Il ne se contentoit pas de satisfaire au vœu qu'il auoit fait, de donner aux pauvres la tierce partie de ses reuenus : mais en outre, apres auoir pourueu aux ne-

C

cessitez de sa famille , & au maigre ordinaire de sa table, il vouloit que le surplus leur fust secrettement distribué. Il espargnoit encor pour eux sur la despense de ses habits, n'ayant iamais qu'un vestement qu'il portoit tousiours tant qu'il fust usé. Bien souuent il ne se treuuoit aucun argent pour la despense de sa maison , parce qu'il donnoit tout aux pauvres. Son Argentier vn iour fasché de ce que les gueux escumoyent toutes les cōmoditez de la maison, print courage de luy faire vne remōstrance, que la prudence humaine requeroit, qu'il pourueust premierement à sa famille, & qu'il demeurast tousiours quelque peu de reserue pour suruenir aux necessitez qui arriuent. Ce qu'il porta patiemment, & luy dit, que la meilleure reserue se faisoit dans les coffres de l'espargne du Paradis. Quand il sortoit du logis il faisoit
tousiours

toufiours aumosner les pauvres qui se treuuoyent à la porte:& ayant vn iour apperceu qu'on en rudoyoit quelques-vns , & qu'on les renuoyoit mescontens, il voulut luy mefme faire la distribution de fa main , en quoy il prenoit vn fingulier contentement. Il luy arriuoit mefme par fois, ayant efpie le temps auquel fes feruiteurs estoyent occupez, de se defguifer sous quelque malotru habit , & de jetter de l'argent aux pauvres par les fenestres les plus hautes , de peur d'estre cognu. Cheminant vn iour par la ville, quelques pauvres luy demanderent l'aumosne pour l'amour de Dieu. Ce cœur tendre , piqué de cette parole , comme d'un trait de feu , chercha incontinent dequoy leur donner , mais ne treuuant rien sur soy , il dit à vn de sa suite qu'il donnast l'aumosne à ces pauvres: lequel n'appreuant point ce mes-

nage, respondit tout fasché : Il n'y a pas , Monsieur , pour vous donner à disner : mais le B. Cardinal sans s'esmouuoit , tira l'anneau qu'il portoit à son doigt, & commanda à vn de ses seruiteurs de l'aller vendre , & luy apporter l'argent , car il estoit resolu de n'esconduire iamais les pauvres. Alors vn autre seruiteur luy bailla deux sols qu'il distribua luy-mesme: estant (ce croyie) prest à leur donner de son sang, s'ils luy en eussent demandé. Il estoit si grand aumosnier , qu'il ne se treuua que vingt sols apres sa mort , ainsi qu'il fut attesté par ses domestiques , avec l'habillement seul qu'il portoit , qui estoit desia fort vsé. Aussi estoit-ce l'vn de ses desirs de mourir, à l'exemple de son Sauueur , comme vn necessiteux, entre les bras de sa bien-aymée pauvreté.

Il est tres-certain que nostre
Bieu-

Bien-heureux avoit puisé toutes les vertus solides de son ame dans l'exemple de nostre Sauveur : car sçachant bien que toute vertu est vaine, qui n'est marquée à ce coin ; & qu'elle n'est receuable en la gloire, qu'entant qu'elle est vnice au merite du sang du Fils de Dieu ; il estoit rousiours occupé à la pensée de son Sauveur crucifié , c'estoit l'object de ses amours , & le sujet de ses plus chers entretiens. Combien de fois l'a-on veu se païmer, & comme se mourir entre ses saincts embrassemens ? combien de fois, lors mesme qu'il se treuvoit en compagnie d'autres personnes, se fondre en larmes parmy les embrassemens de ses ardentes affections ? combien de fois, estant interrogé de quelque chose, respondre d'une autre , ou demeurer comme abstraict de ses sentimēs , ou ne parler que du sang , des playes , & de l'a-

mour de I E S V S ? Vn iour apres s'estre plongé bien auant par meditation dans les playes de son Sauueur, & estant fortý de son hostel pour entendre la Messe à Saint Pierre d'Auignon, comme il auoit encor ses pensers amoureux viuement empreints dans son cœur, & qu'il alloit par les rues soupirant au Ciel, & euentant par ses soupirs ses douces flammes, voyla qu'il apperçoit vne grande lumiere, & au milieu d'icelle I E S V S CHRIST crucifié: tellement que tout extasié, les yeux du corps & de l'ame tendus contre ce cher obiect de son cœur, il demeura sans parler quasi demy heure, iusqu'à ce que comme defaillant en cet amoureux transport, on fut contraint de le mettre dans vne maison la plus proche, & dit-on que ce fut dans l'Hospital Saint Antoine. Vne autre fois le Pape, pour le faire vn peu distraire, l'ayant

l'ayant pressé de faire vne promenade iusques à Chasteauneuf du Pape, (ainsi s'appelloit ce lieu) où il faisoit bastir, distant de deux lieux d'Auignon, disant qu'il vouloit auoir son aduis de quel costé il deuoit poser l'Autel de la Chapelle. Le Bien-heureux Pierre y alla, pour donner ce contentement au Saint Pere; & comme il se promenoit autour du Chasteau, enfoncé par pensée dans les souffrances de son Sauueur, il eut la mesme vision de son I E S V S crucifié : ce qui le fit tomber à genoux au lieu où il se trouua, qui estoit tout sanglant, où il demeura plus d'un quart d'heure saintement transporté des esians de son affection enuers son bien-aymé ; auquel temps ceux de sa compagnie le voyoyent tout environné de clarté. Et ce qui augmenta la merueille, fut que lors qu'il se releua de ce lieu plein de bouë, ses

vestemens n'en furent nullement souillez. Le Pape depuis bien informé du miracle, mesme par la confession du Bien-heureux, pour en conseruer la memoire, le fit peindre dans vne salle de ce Chasteau, où il se void encor aujourd'huy : & depuis en tous ses pourtraits on l'a tousiours représenté avec vn Crucifix, en lueur & en gloire deuant luy, debout, ou à genoux.

Depuis que nostre Bien-heureux eut prins quelque cognoissance des affaires de la Chrestienté, il porta tousiours vn secret & sensible desplaisir dans son ame, de voir l'honneur & la cause de Dieu desdaignée des hommes, & son Eglise non seulement trauaillée de l'oppression des Barbares en la Terre sainte, mais deschirée par le grand schisme qui estoit pour lors, entretenu par les factions des Princes, & particulièrement par la diuision

uision qui estoit entre les Roys de France & d'Angleterre. Dont il conceut vn extreme desir de faire quelque signalé seruice à la Chrestienté, en quoy il ne treuuoit autre difficulté, que le peu de zele qu'il voyoit entre ceux qui faisoient profession de la foy Catholique. Il fit donques des ieusnes particuliers, & de chaudes prieres à Dieu, à fin de l'inspirer, & de l'assister en l'exécution de ce qu'il auoit proietté en son esprit, pour desbroüiller l'affaire du schisme, qu'il communiqua sincerement au Pape, Son intention estoit de se transporter deuers l'Empereur son parent, & de là passer avec son consentement vers les Roys de France & d'Angleterre, à fin de faire assembler vn Cōcile general, vnique remede pour decider ce grand differend, puisque les autres n'auoyēt de rien seruy; & de coniurer ces

Princes à se départir de leurs ambitions, & à ne s'aider point, à l'appetit de quelques menus interets, à deschirer la robbe & les entrailles de l'Eglise leur mere. Il pria en fuite le Pape d'acquiescer, & se soumettre à ce Concile, duquel reüssiroit vn autre bien, qui est, que n'y ayant plus qu'un Chef visible reconnu en l'Eglise, les partis des Potentats Chrestiens vnis ensemble, iroyent choquer le Croissant Turquois, qui auançoit de iour à autre ses conquestes dans la Chrestienté, & le debouteroyent de la faisie du premier patrimoine de l'Eglise: auquel dessein il vouloit luy-mesme sacrifier son sang & sa vie.

Touté cette entreprise fut grandement louée & approuvée du Pape, qui luy donna encon quelques aduis pour pouuoir mieux conduire à chef vne si sainte œuvre. Mais son trespas, hélas ! trop soudain luy desroba

desroba la gloire de l'exécution; Dieu neantmoins qui aloüe les affections pour les effects, benit ses saintes intentions, & les recongneur de mesmes que si elles eussent esté executées. Il n'estoit aagé que de dixhuiët ans, & il n'y auoit que dix mois depuis son election au Cardinalat, lors qu'il fut accueilly d'une fièvre lente, & d'une extreme foiblesse, causée (ainsi que dirent les Medecins) des grandes abstinences, veilles, & autres mortifications qu'il auoit pratiquées dès l'aage de huit ans. En quoy si nous le voulions blasmer, il nous faudroit de pareil air reprendre tous les grands Saints, qui pressez de la vehemence de leur zele, ont saintement hai leurs ames & leurs vies, pour les conseruer en l'eternité. Se voyant neantmoins flectir tous les iours de cette mortelle langueur, qui auoit en peu de temps rauagé

toutes les forces de sa ieunesse, il fit assembler quatre fameux Medecins, pour consulter de sa maladie; lesquels iugerent luy estre necessaire de changer d'air, & d'aller demeurer pour quelque temps delà le Rhone à Villeneuve. Ce qui le rendit ioyeux, d'autant que la vaine pompe, & les ceremonies de la Cour luy estoient à grand fardeau, & ennuy. Mais ce changement d'air ne le soulagea pas beaucoup, le temps de son decez estant desia venu à son periode: il languit en ce lieu cinq mois, sa fièvre le minant tousiours, & ramant secretement sa desfaiëte. Pendant lequel temps il print vn bain par ordonnance des Medecins, l'eau duquel (apres y auoir esté baigné) guerit plusieurs malades. Le iour de Saint Iean Baptiste il recogneut en luy les manquemens de la nature, dont il commença à desespérer de sa guerison,

guerison , sans se donner neant-
moins aucun desespoir , qui peust
offenser sa constance , & sa pieté. Il
ne desista iamaïs de dire tous les
iours son Office ; que si par fois les
ardeurs languoureuses de sa fièvre
luy attachoyent la langue, en sorte
qu'il ne peust prononcer les mots,
il le faisoit dire aupres de luy , pen-
dant lequel temps sans parler de la
bouche , il pouſſoit mille sanglots,
& autant d'affections sacre-sainctes
du cœur, ſuyuies de deux ruisseaux
continuels de larmes. Tous les der-
niers iours de sa maladie il receuoit
le sacré viatique , prenant ainsi vn
avant-goust des eternelles delices
du Paradis , apres lequel il haleroit
d'vn extreme desir. Et deux fois le
iour il se reconcilioit , ſçauoir au
matin, & au soir, fondant les restes
de sa vie en larmes , pour lauer les
petites imperfections de son ame.

En fin , sentant que son heure
derniere

derniere approchoit, & alloit tantost sonner en l'horologe du Ciel, il se voulut donner vn peu de loisir de penser à ses amis, à ses serui-
reurs, & à la sepulture de son corps, destinant le reste pour penser seulement à Dieu, & au seiour de son ame. Il fit donc son testament, auquel il ordonna entre autres choses, que s'il mouroit hors de la Cour du Pape, son corps fust porté à Paris, pour estre enseuely au Cemetiere Saint Innocent, avec les pauvres; que s'il mouroit aux environs d'Avignon, il vouloit estre enseuely au Cemetiere Saint Michel, vulgairement appelé le Cemetiere des pauvres, où est à present l'Eglise dediée à sa memoire. De plus, il ordonna que son corps fust seulement couuert d'vn drap de bureau, marqué d'vne Croix rouge; & qu'il n'y eust que trois cierges allumez à son enterrement, à l'honneur de
de

de la Sainte Trinité , deux à la
teste , & vn aux pieds ; nommant
trois Cardinaux pour ses Execu-
teurs testamentaires. Ce faict , &
apres auoir recompensé ses serui-
teurs selon son pouuoir, il demanda
le Sacrement de l'extreme Onctiõ,
qu'il receut fort deuotement , pour
se fortifier aux approches de la
mort , qu'il sembloit brauer par sa
constance , estonnant ceux qui s'e-
stoyent preparez pour l'y faire re-
soudre. Depuis, comme on void vn
petit poussin s'efforcer à rompre sa
coque pour voir le iour , & iouyr
de la liberté , on remarquoit cette
sainte ame se pousser par esclans
hors du corps, & se guinder de tout
son effort sur l'aile de son amour
vers le Ciel. Ah ! disoit il, qu'il me
tarde , & que les momens de cette
miserable vie me semblent en-
nuyeux , & extremement longs &
insupportables ! *ô utinam ! ô utinam !*
ô quand !

ô quand ! ô ! sera-ce bien tost ? quand me verray-ie desgagé des liens de cette miserable captivité ?

Cependant vne pensée luy vint, qu'il estoit obligé de satisfaire à quelque deuoir enuers ses domestiques ; pource, apres auoir faict congédier tous les estrangers , & commandé qu'on fermast les portes de la maison , il appella tous ses domestiques ensemble dans sa chambre, lesquels il pria tous de luy dire s'ils estoient contens de la petite recompense qu'il leur auoit faicte. Et comme ils tesmoignoient toute sorte de contentement, il leur dit qu'ils auoyent vn autre maistre, qui feroit valoir les seruices qu'ils luy auoyent rendus pour son amour , à vn prix d'immortalité. Au demeurant, il les pria tous de luy octroyer vne requeste deuant que mourir, qu'ils pouuoient luy accorder, qui contenoit deux chefs : le premier, qu'il

qu'il les coniueroit , que comme il les auoit cordialement aimez en Dieu, & pour Dieu, qu'ils s'entr'aimassent aussi tous sincerement , & se secourussent les vns les autres en leurs necessitez. Pour l'autre chef, qu'il ne le leur vouloit dire, qu'il n'eust parole d'eux, qu'il ne seroit point escondit. A quoy tous ayans respondu d'un pareil courage, & affection, qu'ils effectueroyent fidelement son commandement. Alors portant doucement sa veuë, & ses mains au Ciel, il demeura quelque espace de temps sans parler , puis il leur dit: Mes freres bien-aimez, i'ay le cœur entamé de douleur d'une grande faute que i'ay commise à l'endroit de vous tous , qui vous preschois souuent l'humilité , & n'en auois point: d'autant que vous & moy estans pestris d'une mesme bouë , racheptez d'un mesme prix, destinez à vne mesme gloire , au lieu

lieu de vous recognoistre mes freres, ie vous ay tenus pour mes seruiteurs, offensant la charité que ie vous deuois, & l'humilité qui me commandoit de vous servir plustost à l'imitation de mon Sauueur, qui m'en auoit laissé l'exemple. Je ne doute point en outre, que mes actions desreglées ne vous ayent souuentefois offensez, & peutestre donné occasion d'offenser la bonté de mon Dieu; dequoy ie desire tout maintenant vous faire satisfaction, vous suppliant à ioinctes mains de me pardonner. Et s'adressant à Monsieur Claquin, qui auoit esté son Precepteur à Paris; Leuez (luy dit-il) Monsieur, cette natte, & prenez la ceinture que vous y treuuez, & l'un apres l'autre donnez-m'en la discipline, & frappez sur vostre seruiteur, pendant que ie me confesseray à Dieu de ces fautes, à fin qu'il me les pardonne.

donne. Jamais on ne veid gens plus
estonnez d'entendre ces discours.
Monsieur Claquin luy vouloit re-
pliquer, mais il ne voulut le laisser
parler, luy disant: Vous m'avez pro-
mis de le faire, & ie vous en prie,
& coniure derechef. Et quoy, me
voudriez-vous refuser cette mise-
ricorde, & m'espargner par cruau-
té? Non, frappez seulement, ce ne
sera que sur vn corps mort: ce qui
le contraignit à prendre la ceintu-
re, qui est encore aujourdhuy au
Conuent des Celestins en Aui-
gnon, & la doublant, commen-
cerent tous (fondus en larmes)
l'vn apres l'autre de frapper sur luy,
pendant qu'il disoit son *Confiteor*.
Et Monsieur Claquin donna (à
sa requeste) l'absolution, après
laquelle il dit tout hault: *Ha,*
mon Dieu! ie vous remercie de tant
de douceur, dont vous usez en mon
endroit, de m'auoir reconcilié avec mes
freres,

freres, que j'ay mescogneu iusques à present. Et les pria tous de luy donner le baiser de paix : ce qu'ils firent, depuis le premier iusques au dernier. Cette action, & ce miracle d'humilité, avec lequel nostre Bien-heureux voulut clorre, comme avec vn fermaillet d'or, les autres merueilles de sa vie, frappa tellement au cœur de ses domestiques, qu'ils penserent tous fondre en larmes dans sa chambre. Monsieur Claquin le pria de leur donner sa benediction à tous : ce qu'il fit, leur souhaitant l'amour, la paix, & les saintes graces du Ciel.

Aussi tost son Confesseur arriua, lequel il pria de ne l'abandonner : car son heure estoit proche. Et de fait, il se treuua bien tost saisy d'un grand assoupissement, qui le conuioit à dormir, & le deuoit conduire au sommeil de la mort. Mais son Confesseur luy ayant dict qu'il ne
faloit

faloit plus dormir , ains plustost s'esueiller, & se preparer à la rencontre de l'Espoux celeste. Alors ce Bien-heureux s'esueillant comme d'un profond sommeil, *Allons donc*, dit-il, *est-ce temps ?* Et le Confesseur luy ayant respondu que ce seroit bien tost : *Ha !* disoit-il, *bon I E S V S, quand sera-ce ? quand me monstrerez-vous la beauté de vostre visage ? Soleil de ma vie, quand vous verray-ie ?* Et tournant sa face, il apperceut son frere André, lequel depuis fut Euesque de Cambray, auquel il fit de belles remonstrances de bien & vertueusement vivre, qui porterent fort auant dans son cœur, & y allumerent vn beau feu d'amour de la saincteté qu'il rechercha le reste de ses iours, se montrant frere de mœurs, & de vertus du Bien-heureux Pierre, comme il l'estoit de sang, & de naissance. Il luy recommanda aussi
sa

sa bien-aimée sœur Ieâne , le priant de faire tant, qu'elle receust le petit Traicté du voyage spirituel qu'il auoit dressé & escrit de sa main, en sa faueur. Et l'embrassa pour la dernière fois , le laissant, & tous les assistans en larmes. A l'instant se recueillant en son interieur, il commença à donner en proye ce peu qui luy restoit de vie aux flammes de la diuine amour , anticipant l'accès de la mort par l'excès de ses esclans amoureux, qui arrachoyent de viue force ce benit esprit de son corps. On luy entendoit rouler doucement de piteux soupirs, & pousser à foule, quoy qu'à voix basse, des desirs enflammez de se ioindre bien tost & sans delay à son Dieu, reïterant souuent ces mots, *O utinam ! o utinam ! fizio*. En fin, comme il sembloit ne plus respirer, son Confesseur l'exhorta de se souuenir continuellement de son

I E

IESVS, & de la Vierge Marie. Ce qui luy fit encore proferer ces mots entendus d'un chacun, *Se pourroit-il faire qu'à present i'oubliaffe un si bon Seigneur, & une si bonne Mere?* Il dit en suite qu'on luy leust les passions de Sainte Tecle, & de Sainte Agnes, & comme on acheuoit, esleuant ses yeux au Ciel, il dit tenant son Crucifix: *In manus tuas, Domine, commendo spiritum meum.* Lesquelles paroles furent suyues de quelques doux & comme delicieux sospirs, apres lesquels il ferma les yeux, & sa belle ame quittant le monde, s'enuola dans le seiour bien-heureux de l'immortalité, laissant le visage de son corps serein, riant, & luisant par merueille. Son heureux trespas arriua le 2. de Iuillet au point du iour, de l'an 1387. & de son aage le dixhuitiesme accomply moins dixhuit iours.

Il estoit de riche taille, surpassant

fant en hauteur presque tous ceux de son aage, il auoit le front large & tendu, le visage tousiours ferein & iouial, & d'une contenance Angelique, vn peu long, passe & des-teint; le nez pointu, & vn peu aquil-lin; les yeux bien fendus, pers, & comme de couleur celeste; les che-veux blonds, sa bouche petite, & coralline; le menton pointu, & assez court. Son col estoit long, auquel paroissoient fort visiblement les nerfs des deux costez, tant il estoit maigre & extenué, à raison de ses grandes austeritez; les mains longues, menuës, & fort belles; tous les membres du corps bien propor-tionnez. L'on tient par tradition, que son pourtraict au vif est celuy qui fut tiré sur luy peu auant sa mort, qui se void encore aux Ce-lestins d'Avignon. Il espendoit de son corps vne odeur admirable, qui faisoit croire à plusieurs que ses habits

habits estoient parfumez , ou qu'il auoit accoustumé de se couvrir de musc & d'ambre, pour cacher quelque imperfection de nature. Cette odeur continuë encore auourd'huy en son chef, & en ses ossements , marque sans doute de l'admirable pureté de son corps. Elle se fit encore sentir avec vne douceur extraordinaire , les trois iours durant, qu'il demeura sans estre inhumé : pendant lequel temps tous ceux qui vindrent à foule d'Auignon pour le voir, recognoissans en son corps tant de tesmoignages du bon-heur que son ame possédoit au Ciel , ne sçauoyent à qui ouvrir plustost leur cœur , ou au dueil de sa mort, ou à la conioüissance de sa gloire. Quelques vns proposerent de faire peindre son visage de couleur viue , ainsi que l'on obseruoit entre les Grands , lors de leur enterrement. Mais le Confesseur du

D

Bien-heureux ne le voulut permettre, disant qu'il l'auoit prié auant son trespas, que son corps ne fust point ouuert, ny son visage fardé de peintures, mesmes qu'il n'en estoit nullement besoin, puis qu'on voyoit qu'un pinceau diuin auoit donné le teint à son visage.

Le Pape ayant apprins son decez bien-heureux, ne se peut tenir de plorer, & dire: *Cette bien-heureuse ame appaisera le courroux du Ciel, & moyennera la paix à l'Eglise, il la faut sçuyre.* Il print la peine de passer le Rhone, & de venir visiter son corps, & l'estuy sacré de cette belle ame, duquel on disoit tant de merueilles. Il le veid, & luy donna de l'eau benite; & flairant cette odeur douce & precieuse par delà tous les aromates; & voyant la beauté, & comme l'image de la felicité resplandue sur ce visage, protesta que Dieu estoit admirable en ses Saints, mer-
tant

tant leur mort à vn prix d'honneur qui pourroit faire enuie de mourir. Mais voicy vn cas estrange, qui arriua comme le Pape arrestoit fixement ses yeux sur ce corps, transporté des loüanges & des felicitez du defunct, il commença petit à petit à ouurir ses yeux, & œillader (ce sembloit) le Pape, qui se sentit touché en l'ame de ce regard, & plein de grandes apprehensions, ne voulut repasser le Rhone ce iour là, mais il se retira dans les Chartreux de Villeneuve, où il passa toute la nuit en prieres, à fin qu'il pleust à Dieu destourner les orages de son Eglise; se ressouuenant de ce que nostre Bien-heureux luy auoit communiqué peu auparauant sa mort.

Le lendemain le Pape commanda que ce corps venerable fust transporté en Auignon, où il estoit destiné par le testamēt du defunct,

& attendu de tous les Citoyens en singuliere deuotion. Les lampes nourries de baume, & d'autres huiles aromatiques, sentent bon allumées, mais elles parfument encore mieux esteintes. La douce memoire des bons exemples, & des belles vertus du Bien-heureux Pierre se fit sentir mieux que iamais par toute cette Ville, comme vn espanchement d'un precieux parfum, qui attira tout vn monde de gens qui vint au rencôtre de ce saint corps. La foule fut bien si grande, que deux iours se passerent, auant qu'il peust arriuer au lieu où il estoit destiné. Il fut à l'entrée de la Ville mis reposer dans la Chapelle de l'Hospital du pont du Rhone, aux pieds duquel se vindrent ietter tous les pauvres qui y estoient malades, & furent tous gueris. Ce qui eschauffa tellement la deuotion de la populace, que comme l'on vou-

loit

loit pourfuyure à le porter au Cemetiere Saint Michel, qui est le Cemetiere des pauvres, il accourut vers le corps vne si grande multitude de personnes, & particuliere-ment de malades affligez de toute sorte de maladies, qui par l'atouchement du saint corps s'en retournoyent visiblement gueris, qu'on fut contraint de differer l'enterrement, & faire mettre le corps en vne maison proche le Cemetiere de Saint Michel avec fortes gardes; & resolution de preuenir la populace pour l'enseuelir du matin, craignant qu'elle ne fist quelque scandale, comme en apparence elle s'y dispoisoit. Mais on ne peut point surprendre la ferueur du peuple, toute la nuit on charria les malades dans le Cemetiere, tellement que le lendemain il falut vser de force pour escarter la foule, & donner passage au corps, iusques

dans la Chapelle de Saint Michel, où la Messe fut celebrée par vn Cardinal. Le iour croissant, le peuple s'augmentoit, & affluoit de toutes parts. Vn riche Marchand travaillé des gouttes, s'estant fait faire voye sur les espaules de plusieurs seruiteurs pour aborder le corps, & au premier attouchement ayant esté entierement desliuré de son mal, dōna vne sainte alarme à tout ce peuple, qui eust tantost abattu les murailles de la Chapelle, pour voir, & toucher à son ayse ce corps. Le Pape entendant tout ce qui se passoit, fit commandement au General de son Infanterie, d'y enuoyer tant de soldats armez, qu'ils peussent faire retirer le peuple, iusqu'à ce que le saint corps fust mis en terre. Les ceremonies funbrales acheuées, les seruiteurs qui emportoient le drap de bureau, duquel estoit couuert le saint corps, & les

les cussins, furent deualisez par le peuple, qui mit tout cela en vn million de lambeaux. Le cercueil de bois, dans lequel on l'auoit porté, fut aussi brisé en pieces, à qui en auroit.

On pensoit que les saintes Reliques du Bien-heureux Cardinal retirées de la veüe du peuple, & cachées en terre, cet excez de ferueur se refroidiroit; mais Dieu qui chérit les os, & les cendres de ses humbles seruiteurs, & qui se rit des superbes Mauséoles, qui dans le iaspe, & le porphyre enferment des corps, dont les ames sont enseuelies dans la tombe d'Enfer; voulut rendre glorieux le sepulchre que s^{on} seruiteur auoit par humilité choisy parmy les pauvres. Les extremies chaleurs, la faim, la soif, la nuit, les armes, les menaces, les coups ne peurent iamais faire retirer le peuple. Plusieurs malades qui coucherēt prez

de son tombeau, n'ayant pour couverture que le Ciel, s'en retournerent gueris. Vn payfan, ayant prins par deuotion vne poignée de la terre qui couuroit le corps, fut incontinent (comme il arriue en pareil cas) suyui de tout le reste du peuple; chacun s'en charge à l'enuy, & s'y precipite pour en auoir sa part: de maniere que le saint corps en peu de temps fut descouuert. Le Capitaine qui auoit esté estably dans le Cemetiere avec cinquante soldats, pour empescher le desordre, ne pouuant plus resister à la fougue de ce peuple, & craignant qu'en fin il ne se partageast le corps, courut hastiuement demander secours aux parens du defunct. Et il falut qu'un Auditeur du Palais du Pape s'y transportast, iusqu'à ce que par son autorité le corps fust recouuert, & vne grille de fer mise sur le sepulchre. Mais cela ne seruit que

que pour allumer d'auantage la deuotion du peuple, le concours duquel non seulement de la Ville, mais de tous les endroits circonuoisins, fut inestimable; & en suite vn nombre infiny de prodiges, & de guerisons miraculeuses de toutes sortes de maladies. Ce qui se verifie par le grand Registre qui est dans le Thresor des Celestins d'Auignon en trois gros Volumes, sceulez authentiquement, & recueillis par autorité Apostolique, pour la canonization de nostre Bien-heureux, ausquels il se treuve de calcul arresté deux mille quatre cents soixante & seize miracles, entre lesquels il y a quarantedeux morts resuscitez, & ce seulement les deux premieres années apres son decez, sçauoir 1388. & 1389. sans faire mention d'autres six Registres, qui contiennent plus de trois mille miracles depuis les deux

D 5

années ia mentionnées , & sans compter ceux qui se sont faicts depuis, & se font iournellement, dont le nombre môte presques à l'infini.

C'est ce qui luy a communément acquis par tout la reputation de nouveau Thaumaturge , & de grand faiseur de miracles. Et c'est ce qui inuita tout le peuple d'Auignon à le choisir, & inuoquer d'un commun consentement pour protecteur & tutelaire de la Ville, & à parler incontinent de luy dresser vne Eglise au lieu où il auoit esté enterré ; lequel dessein fut incontinent suyuy de l'exécution. En quoy la liberalité du peuple parut si grande, que le Pape fut contraint de deputer trois Cardinaux pour receuoir les offrandes ; dont on eut les moyens de bastir non seulement l'Eglise projetée à l'honneur du Bien-heureux Pierre , mais encore vn Monastere de Religieux

Ce

Celestins , pour en prendre le soin. Les Dames y fondoyent leurs bras-selets, carcans, bagues & ioyaux ; & le reste des offrandes estoit en telle quantité , qu'on fut contraint de faire vn grand crible (qui se void encore aujourd'huy) pour separer la petite monoye d'auec les pieces d'argent , pour payer les ouuriers. Toute la fabrique du Monastere, & des Eglises qui furent basties , est tres-superbe & magnifique , tant pour l'estoffe , que pour la manufacture ; à laquelle contribuerent encor liberalement (comme aussi pour la dotation du Monastere) le Pape, le Roy de France Charles VI. qui fut prié par le Pape d'en porter le nom de Fondateur, le Duc d'Orleans son frere , les freres de nostre Bien-heureux , & quelques autres qui sont recognus pour insignes bien-fauteurs de cette Maison Religieuse.

Mais apres tout cela , si faut-il aduoüer que les deuotiōs des hommes sont bien changeantes , & sujettes à inconstance; ce sont de vray des brillantes estoiles , mais errantes, elles vont, elles viennent, & s'en vont , haussans , baissans en action, & en estime , selon les diuerses rencontres. La grande deuotion du peuple d'Auignon enuers les Reliques du Bien-heureux Pierre, s'estoit par traict de temps alentie, & fort diminuée; mais voicy vn miracle extraordinaire , & des plus remarquables qui se lisent en toutes les vies des Saints , arriué l'an 1432. qui l'esleua derechef à vne haute creüe, & fut cause de la celebration de la Feste de nostre Bien-heureux: Vn ieune garçon aagé de dix à douze ans , estoit monté avec quelques siens compagnons sur la plus haute tour du Palais d'Auignon, nommée Trouïllas, bastie sur le

le roc , & haute de plus de cent coudées , pour y desnicher des oyseaux ; lequel , ainsi qu'il se cuidoit auancer pour atteindre au nid , le pied luy grillant , & ne treuant à quoy se prendre , cheut du haut en bas , apres auoir heurté sur vn grand canal qui se iettoit dehors du mur , qui le renuoya de plein vol sur le roc , où il se froissa , & brisa tous les membres. A ce piteux spectacle se fit vn grand concours de peuple. Le pere infortuné de l'enfant en estant aduertý , sur le champ se mit à genoux , & haussant les yeux & les mains au Ciel , s'escria par grande affection , & avec larmes pitoyables : Monseigneur Saint Pierre de Luxembourg , soyez-moy secourable. Puis se mettant sur pieds , remply d'vne confiance admirable , & de l'esperance du secours qu'il se promettoit du Bien-heureux qu'il auoit inuocé , prend vn sac , (se
doubtant

doubtant bien, considérée la cheute de si haut, du piteux estat de son fils) & s'en va la droicte voye audict lieu. Où estant arriué, il perdit asseürément la cognoissance de son enfant, fors qu'il le recogneut à la couleur de ses habits, quoy que deslabrez, & ensanglantez : car au demeurant il n'y auoit membre d'iceluy presque tenant à soy, ny entier, & la ceruelle de sa teste se tenoit espanchée par grumeaux au rocher. Ce nonobstant il eut bien le courage, quoy que ce ne fust pas sans beaucoup de larmes, & de piteux sanglots, de ramasser dans son sac toutes les pieces de ce corps. Puis chargeant sur ses espaules ce faix douloureux, qui luy pesoit plus que s'il eust porté cette haute tour, que son fils auoit mesurée de sa cheute, il s'achemina vers l'Eglise du Bien-heureux, trainant apres soy vne populace infinie, laquelle il
exci

excitoit avec les cris pitoyables, par lesquels il imploroit le secours du Saint. Estant arriué avec grande peine prez du tombeau, il estendit reueremment sa charge dans le sac mesme sur iceluy, & se tournant deuers le peuple, & à ioinctes mains, teste nue, la face ternie & baignée dans vne mer de pleurs, il les coniuira tous par la charité commune des Chrestiens, que chacun fist son deuoir de prier Dieu pour son enfant. Cependant tous les Religieux Celestins aduertis de ce qui se passoit, arriuerent chantans l'Antienne accoustumée du Saint, & se meirent en oraison, à ce que le secours esperé fust obtenu. Comme tous estoient en attente, voyla qu'on entend ie ne sçay quel son extraordinaire, qui dura bien vn bon quart d'heure, & esucilla grandement l'attention & l'esperance de tout le peuple.

Les

Les plus spirituels se figuroyent que c'estoyent les Anges qui travailloyēt à l'agencement des membres de l'enfant. Quoy que ce fust, à la fin de ce son bruyant on veid l'enfant remuer dans le sac, regimber des pieds, & sortant les bras & la teste dehors, crier à haute voix en son langage: *Esténe, Esténe, iou non pode baué l'oussel, creze: ben lou nis es combat ou sol*: cuidant encor estre sur la tour, & parler à vñ sien compagnon appelé Estienne. Mais se voyant en si belle compagnie, il demeura bien estonné, & plus que luy encor son pere, & tout le peuple, qui esperdu de ioye & d'admiration, s'escria: *Miracle, miracle!* Le pere incontinent print entre ses bras son fils, & comme il estoit bien aduisé, se craignant de quelque oppression du peuple, il le plaça sur le grand Autel à la veüe d'vn chacun. Mais le peuple non content de ce, voulut

voulut voir s'il y auoit indice de fracture en son corps, specialement en sa teste, qui auoit esté toute brisée ; tellement qu'il le falut mettre nud, & ne se parut aucune fracture, ny contusion. Prodige non gueres iamais veu, ny ouy, qui esmeut tout ce peuple à rendre graces à Dieu, qui est admirable en ses Saints : & en suite duquel, toute la Ville d'Auignon resolut en vne Assemblée generale , qu'en perpetuelle memoire du miracle, & pour l'honneur du Bien-heureux Pierre de Luxembourg , l'on celebreroit sa Feste le cinquiesme Iuillet tous les ans, les boutiques fermées. Ce qui s'observe depuis inuiolablement, avec feux de ioye par toutes les rues de la Ville, & autres tesmoignages de resioüissance publique.

Ce seroit chose peut-estre ennuyeuse de raconter quantité d'autres grands & solennels miracles, qui

qui ont suyui cettuy-cy, & ont rendu la memoire de nostre Bien-heureux recommandable non seulement en France, mais encore en Italie, & en Espagne, nommément aux Villes de Barcelonne & Perpignan, où sa Feste est encor celebrée. Vne perle semble seulement manquer à sa couronne, ou vne couronne à sa digne memoire, c'est l'honneur de la canonization que le Saint Siege ne luy a pas encore donné, quoy que communément on iuge l'auoir singulierement merité. Mais à fin que le Lecteur soit instruit de ce qui s'est passé en cet affaire, il doit sçauoir qu'en l'année 1527. le Cardinal de Medicis ayant esté esleu Pape, & en haine du schisme sus-mentionné, ayant fait effacer du catalogue des Papes nostre Clement VII. qui est enterré aux Celestins d'Auignon, & prins le nom de Clement VII. succedant à
Adrian

Adrian V I. informé qu'il fut par le Cardinal de Clermont , Legat pour sa Saincteté en Auignon , de la saincteté de vie de nostre Bien-heureux , & des merueilles que Dieu operoit par son intercession, il expedia vne Bulle, par laquelle il permettoit que le corps & Reliques du Bien-heureux Pierre fussent leuées des lieux sous-terrains, où elles repositoient, & releuées en lieu eminent , pour estre venerées par les Chrestiens ; & qu'il fust inuocé comme Bien-heureux, en attendant sa canonization complete. Depuis on n'a point procedé plus outre à la canonization , quoy que long temps auparauant la Beatitude les procédures en eussent esté faictes. L'an 1389. par le commandement du Pape Clement , les preuues receües , & l'ottroy donné que le rapport seroit faict par les Illustrißimes Cardinaux Commissaires

saïres du procedé. De plus, au Concile de Constance en l'an 1414. où apres la deposition de trois Papes, Martin V. fut esleu, l'Illustrissime Pierre Cardinal de Saint Chrysogone, selon la charge qu'il auoit du Duc de Bourgongne, Regent en France, durant la maladie de Charles V. & minorité du Dauphin, requit qu'il fust procedé à la canonization de nostre Bien-heureux, sur les preuues qui estoient ia authentiquement faictes. Ce que le Pape accorda, & à ces fins furēt deputez trois Cardinaux, & en suite plusieurs Verbaux dressez. Mais là dessus le Concile estant licentié, l'effect de la canonization fut pour lors empesché. En fin, depuis au Concile de Basle, l'an 1431. on proceda encore vne fois à cette canonization tant desirée, par l'adueu du Concile, à la requeste de l'Empereur, du Roy de France, & des Princes

Princes qui assistoyent au Concile, où l'affaire encore ne peut point estre terminé, le Concile estant licentié.

Mais si bien les oracles de la volonté de Dieu, pour quelque secret de sa prouidence, ne sont point encore sortis de la bouche de son Eglise, pour le declarer Saint: ils ont esté neantmoins manifestez en plusieurs autres manieres, & puissamment presumez en plusieurs argumens, qui ne nous laissent point doubter de la gloire qu'il possede dans le Ciel. Car outre la declaration authentique de Clement VII. souuerain Pontife de l'année 1527. par laquelle il permet qu'il soit inuqué comme Bien-heureux, & que ses Reliques soyent esleuées pour estre venerées de tous. D'abondant, les preuues authentiques de sa sainte vie, le nombre infiny de tant de miracles faicts apres sa mort

mort autour de son venerable tombeau, & qui se font iournellement par son intercession ; l'odeur admirable de ses saintes Reliques , sans aucun artifice, ny ayde de nature ; la voix du peuple qui l'appelle Saint, & le tient tel depuis deux cents & trente ans ; les Eglises basties à son honneur, en Auignon, en Espagne, en Alemagne, à Paris ; la continuelle visite des pelerins , qui rendent leurs vœux à son tombeau, & y reçoivent de singuliers benefices par sa faueur ; sont argumens irrefragables de sa sainteté, & felicité. Il nous doit certainement rester, apres avoir bien consideré les incomparables vertus de ce Bienheureux, plus de honte, que de doute de la riche coronne de gloire qu'il a acquise dans le Ciel ; ou du moins vne sainte ialousie de posseder vn semblable bonheur ; nous aydans en cela de
l'exem

l'exemplaire de sa vie toute excellente, pour fortifier les foiblesses de nostre deuotion, & l'enflammer à la conqueste d'une gloire & felicité immortelle.

Il estoit ieune d'ans, riche de biens, comblé d'honneurs, accomply de perfections, & auantagé liberalement de tous les presens de la Nature, & de la Fortune; pouuant (s'il eust voulu) iouir en liberté, & sans peine de ce que les autres recherchent avec tant d'auidité, & de trauail. Mais son ambition sainte aspirant à de plus nobles grandeurs, luy fit mespriser ces vains amusemens du monde, & tous ces fatras de terre & de boüe, pour se consigner entre les bras de sa chere deuotion. Ce qui deuroit faire monter le rouge sur le visage de ceux, qui autant vuides d'honneur, qu'esloignez de sa pieté, font rempart & defense de leur ieunesse,

pour

pour couvrir leurs vices , ou treuvent impossible de servir Dieu parmi les delices & les grandeurs du siecle ; comme si c'estoyent des tyrans insurmontables de la vertu, & de l'innocence. Non, il n'est point si difficile qu'on pense, de passer parmi le monde immonde sans tacher son innocence ; & de s'escouler à trauers, & par dessus tous les obstacles qui nous ferment la porte au Paradis de la deuotion.

Fin de la vie du Bien-heureux PIERRE
- DE LUXEMBOURG.

LE



LE VOYAGE SPIRITUEL DV PELERIN CATHOLIQUE:

Dressé par le Bien-heureux PIERRE
DE LUXEMBOURG, Car-
dinal, & Euesque de Mets, &c.

A V A N T - P R O P O S,

*Et comme l'entrée du voyage, par la demon-
stration du mal-heur de ceux qui ne ten-
dent à Dieu, & ne voyagent au Ciel: avec
la proposition des trois iournées necessaires
pour retourner à Dieu, & au chemin du
Ciel, apres s'en estre fouruoyé.*

T O V T E S les fois que ie
pense à la vie que i'ay me-
né, depuis que ie cognois
le bien, & le mal; ie ne trouue que

E

peché, & temps perdu : ou si i'ay faict aucuns biens, ils ne sont point dignes de guerdon : car ie les ay faict negligemment, sans amour, & m'est aduis (ie m'en doubte) que tout ne vaille rien. Helas ! ma vie dōcques est sans fruit ; & Dieu dit en l'Euangile, que l'arbre qui ne portera bon fruit, sera coupé, & ietté au feu. Helas ! tel suis-ie, dont ie crains grandement apres cette vie estre mis à mort eternelle, & ietté au feu d'Enfer avec mes pechez, & avec les ennemis. Helas ! que de bien i'ay perdu pour nourrir ma charogne, qui a plus despendu, que gagné. Certes ie ne suis pas digne d'estre dit & appelé homme ; pour autant que i'ay mené vne vie orde, dont i'ay honte de viure. Or deurois-ie pleurer tout le temps à venir, pour recouurer le temps perdu.

Helas ! ame pecheresse, ennemie
de

de bons propos, & vuide de tous biens, que songes-tu ? Ne sçais-tu pas bien que tu mourras ? tu ne sçais pourtant quand, ny comment. Ne sçais-tu pas que les iugemens de Dieu approchent ? O journée pleine de tenebres, d'angoisses, de tribulations, de cris, de brayemens, de gemissemens, de peur, d'eclipses, de tonnerres, de tempeste, d'ire, & de plusieurs grandes horribilitez ! O que ce te seront dures nouuelles, & ameres ! O quelle tristesse ! ô quelle douleur ! Et que songes tu doncques, ame tiède, & froide, sans amour ? Dors-tu, ou si tu veilles ? Que fais-tu, dis ame ? Helas ! que tu es endormie, quand tu ne t'esveilles à vn si grand tonnerre. Tu ne dors pas certes, comme il me semble, ains tu es morte. Helas ! arbre sec, digne d'estre coupé, & mis au feu, dis-moy : As-tu point de fruit ? Ouy, peux-tu dire, mais tref-

mauvais , & pourri ; c'est le peché amer , & puant. Helas ! tu as si mal vescu , quand tu as laissé les commandemens de Dieu , & as obeï au monde ; & non pas du tout au monde , ains aussi à la chair , & à l'ennemy. Dieu t'a créé à son image , & t'a racheté , te promettant Paradis ; & tu luy as fait ce despit de plus obeir à ses trois ennemis , qu'à luy-mesme ; & toutesfois c'est celuy , sans lequel tu ne peux viure. Helas ! ce n'est peu de chose que cela , combien qu'il te le semble. Helas ! que diras-tu , quand Dieu te demandera le temps perdu , qu'il t'a presté , pour l'employer à son service ? Helas ! cuides-tu qu'il soit ores temps de rire , iouïr , bourder , & mocquer ? Certes nenný ; ains de plorer , de planter , & de moissonner en bonnes œuvres ; & apres cette vie sera le temps de iouïr , & s'esbattre.

Or

Or pouruoyes-toy doncques
dés maintenant, car il te faudra rendre compte de chaque heure, & de chaque moment de temps que tu auras vescu, depuis la cognoissance du bien, & du mal, iusques à l'heure de la mort, au Iugement de Dieu deuant tout le monde. Et là sera recherché tout ce que tu auras pensé, dit, ou faict contre la volonté de Dieu; & te sera remonstré tout le bien que tu auras laissé à faire, que tu deusses auoir faict, si par penitence il ne t'a esté pardonné. Hé! que de grand nombre de pechez tu seras enuironné, si tu ne les pleures maintenant, & effaces par contrition, confession, & satisfaction. Lors misericorde se reposant, Iustice regnera de sorte, que prieres, seruiques, promesses, dons, force, excuses, beau parler, & penitence aucune ne te pourront ayder. Alors le iuste Iuge desmesurément cour-

roucé , sera prest pour punir en grande aspreté sans misericorde les pecheurs , les profonds abysses d'Enfer seront ouuerts pour les engloutir , où plus de cent mille tormens leur seront appareillez , & à dextre verront tous les pechez qu'ils auront faict , dont ils auront grand' honte. A la fenestre ils verront les ennemis laids, & horribles, s'attendans tout auoir, & attendans que la sentence du Iuge soit iettée sur les heretiques, & pecheurs, à fin qu'avec des chaines de fer ardentes ils les puissent trainer avec eux en Enfer. Par dehors ils verront tout le monde en feu & flamme, & par dedans leurs consciences seront ardentes & bruslantes. Helas ! si alors tu es du nombre des pecheurs, en quelle part iras-tu ? Certes en nulle part ; à vn chacun il te faudra apparoir, vueilles, ou non, & attendre la douloureuse sentence.

Helas !

Helas! que feras tu doncques? Que ie feray? Je trembleray, crois-ie, comme la fucille en l'arbre: car desia ie commence à m'espouuanter.

Or ne te desespere point, ains retourne à celuy que tu as offensé, luy demandant humblement pardon en bonne esperance de sa misericorde; & il te receura volontiers, car il reçoit de bon cœur les pecheurs retournans à luy par la voye de penitence: qui est vn chemin seulement de trois iournées, pour tout le voyage spirituel, que tu auras à faire d'icy en Paradis, comme plus ample-

ment pourras voir

cy apres.

* * *



LA PREMIERE

Iournée

*Du voyage spirituel, pour revenir à Dieu,
& se remettre au chemin du Ciel.*

SA I N C T Pierre dit que nous sommes tous pelerins en ce monde , & allons iour & nuict sans arrester en nostre pais celeste. Comme donc les pelerins parlent volontiers ensemble pour recreation, en allant leur chemin ; ainsi en paracheuant nostre pelerinage de Paradis, nous deuiferons quelque peu , car le chemin est fort , & si n'auons à cheminer que trois iournées : dont l'vne est Contrition, l'autre Confession, & la derniere Satisfaction , selon que le nous dit Moïse: *Ibimus viam trium dierum*

dierum in solitudinem. La premiere doncques est Contrition, laquelle a trois lieuës de petit chemin, dont l'vne est douleur de cœur, de ce que par son peché on a deseruy estre pendu au gibet d'Enfer: l'autre lieuë est desplaisance, de ce qu'on a perdu le Royaume des Cieux: la derniere est douleur d'auoir courroucé Dieu. Vn bon che- mineur deuroit bien tost aller ces trois lieuës.

Si vn homme prins en son larrecin, condamné à mort, estoit mené au gibet, & le Roy, l'ayant rencontré, luy demandast: Amy, où te mene-on? & qu'il respondist: Sire, on me mene pendre pour mon larrecin, & iustement, car ie l'ay bien merité. Et le Roy luy dist: L'ay pitié de toy, parquoy si tu te veux douloir de ce que tu as gagné telle punition, me promettant que tu n'y retourneras plus, ie te deliureray.

E 5

Je croy qu'il en seroit bien tost dolent, par ce moyen il auroit cheminé la premiere lieüe.

Vn riche homme destrouffé des brigands, demeuré pauvre & nud, fut rencōtré pareillement du Roy, qui luy demanda : Amy, comment t'est-il ? Sire, mal, car i'ay esté desrobbé en vostre Terre, & ay perdu tout mon auoir. Et le Roy luy dit : Amy, sois dolent de ta perte, & ie te rendray encore plus. Je croy qu'il en seroit tantost plus dolent que ioyeux. Ainsi le deueroit faire le pecheur, Dieu luy disant à toute heure : Prends au cœur doleance d'auoir par ton peché perdu Paradis, & ie te le rendray.

Mais tu me demanderas : I'ay perdu ma virginité, comme la me rendra la contrition, & confession ? Et ie te réspons, que si tu as perdu cinq sols., & ie te rends douze blancs, tu as biē recouuert ta perte.

Regarde

Regarde bien vn hanap de marbre brisé, il a perdu la beauté de son integrité, il pourra toutesfois en telle maniere estre refaict, & relié, qu'il sera plus beau que deuant, à cause de l'or, & l'argent dont il sera enuironné, & enrichy. Pareillement, as tu perdu ta virginité? La beauté d'icelle ne peut estre recouuverte, mais tu la peux reparer, & orner de si nobles vertus, qu'elle sera meilleure, & plus riche qu'auparuant, à l'exemple des Maries, Magdaleine, & celle d'Egypte, lesquelles s'ornerent de vertus si richement, qu'elles valurēt mieux apres que deuant. Si tu le fais ainsi, Paradis te sera rendu, ayant deüement cheminé la seconde lieüe de cette iournée.

D'auantage, vn Euesque auoit vn Clerc, auquel il deuoit donner vn bon Benefice, pour le bon seruice qu'il luy auoir faict. Ce neant-

moins ledict Clerc le laissa, & seruit vn autre, dont il perdit l'amour du premier, qui toutesfois luy dit : Tu m'as courroucé, mais si tu en veux estre dolent, ie te pardonneray, & te donneray le Benefice promis. N'en deuroit-il pas estre dolent? Je troy qu'ouy. Ainsi est-il de toy, tu auois seruy Dieu, & il auoit en propos de te donner Paradis; mais tu l'as courroucé par ton peché, ayes-en contrition, & ta paix est faicte, & faisant la paix, Paradis te sera donné.

Voyla la troisieme lieue de cete iournée, & icy tu dois faire ton giste, & te reposer. Tu dois toutesfois auoir plus grande douleur d'auoir perdu l'amour de Dieu ton bon Seigneur. Si tu as traouillé pour vn homme appellé Pierre, & quand viendra le vespre tu ailles demander ta iournée à Iean, il te respondra: Pierre, pour qui tu as
tra

travaillé, te payera, non pas moy. N'as tu pas ouy dire, que celuy paye qui a mis en besogne? Ainsi fera Dieu à la mort, ou au Jugement à l'homme, qui se sera repenty seulement pour la peur de l'Enfer, ou pour auoir perdu Paradis. Et Dieu luy dira: Va en Enfer, & y prens ton loyer: car c'est pour peur de luy, & non pour l'amour de moy que tu as laissé de mal faire. Ou il dira: Dis à Paradis qu'il te secoure, s'il peut, ie ne suis point tenu de t'ayder à ton besoin, veu que tu n'as fait le bien pour l'amour de moy, ains seulement pour auoir Paradis, ou pour peur de l'Enfer. Par ainsi fais bien pour l'amour de Dieu, & non point pour crainte de damnation.

Quand doncques tu auras marché ces trois petites lieües, tu pourras te reposer à la fin de la troisieme, c'est à dire, qu'il faut estre dolent

dolent de ce qu'on a perdu Paradis, & deſeruy l'Enfer, mais ſpecialement par deſſus toutes choſes, de ce qu'on a perdu l'amour de Dieu par ſon peché. On doit chercher contrition au pluſtoſt qu'on la peut auoir, & non pas faire ainſi qu'un homme qui attend à ſe repentir iuſqu'à la mort, & cependant il faiſoit, & diſoit force maux ſur cette eſperance, diſant qu'à la mort il ſe repentiroit. La mort venue, il crioit tant qu'il pouuoit : *Contrition, contrition, où es-tu maintenant allée?* mais il ne la peut oncques trouuer. Et ie crois que ce fut vn vray traiçt de la Juſtice diuine : car ainſi que dit ſainct Gregoire, c'eſt bien raiſon que Dieu oublie à la mort celuy, qui en ſa vie & ſanté l'a oublié. Helas ! repentōs nous dōcques, tandis que nous ſōmes ioyeux, & ſains, & Dieu volontiers nous pardonnera. A tant pour la premiere iournée.

L A



LA SECONDE

Iournée

*Du voyage spirituel, pour reuenir à Dieu,
& se remettre au chemin du Ciel.*

LA seconde iournée de Paradis est Confession. Peu de gens sçauēt bien cheminer cette iournée, sans se fouruoyer: & n'est pas merueille, car ne peut estre bon clerc qui va à l'escole mal volontiers, ny bon ouurier qui hait son mestier. Le bon clerc se leue de nuit pour estudier, ainsi deuons-nous faire pour apprendre cette science. Ainsi faisoit Dauid, à son dire : *le me leuois à la minuit,* dit il, *pour me confesser à toy, mon Dieu.* Ce qui est contre ceux qui vont à confesse sans aduis. La droicte voye
de

de confession est telle : Je me confesse à Dieu tout-puissant , à la benoite Vierge Marie , à tous les Saints, & Saintes, & à vous, Sire, qui estes au lieu de Dieu pour ouyr mes pechez.

Ce premier mot, *le me confesse*, clost au pecheur l'Enfer, & luy ouvre le Paradis , qui luy est fermé pour son peché , fait sa paix avec Dieu , & ferme la bouche au Prestre : dont on lit à ce propos vn exemple. Vn riche homme, pere du Curé de la Ville, dit vilenie à vn pauvre homme , qui sur le champ ne s'en peut venger , ains attendit que le riche homme s'en allast vne fois tout seul esbattre pour voir ses bleds, qui estoient aux champs. Le pauvre qui n'auoit point oublié l'outrage qu'on luy auoit fait , dès qu'il le veid , print son cousteau, & le tua , puis s'en retourna , & ne sceut-on qui auoit fait ce meurtre,

tre. Aduint apres vn long temps que ce pauvre eut repentance de son peché, & s'en alla confesser à son Curé, qui estoit fils de ce riche homme, qu'il auoit tué. Et ainsi qu'il se confessoit, le Curé apperceut qu'il auoit aucuns pechez en sa conscience, qu'il n'osoit dire, ny confesser, & luy dit : Mon amy, dis hardimēt tous tes pechez: car il n'y en a aucun si grand, que Dieu ne soit plus grand pardonneur, quand on l'en prie, & qu'on luy en requiert pardon. Et aussi de tout ce que ie pourray, ie t'ayderay, & te pardonneray. Adonc dit le pauvre homme: Ah! Sire, ie suis le mauuais qui ay meurtry vostre pere en telle maniere, & pour telle cause: si m'en confesse à Dieu, & à vous, & vous en requiers pardon, & absolution. Adonc le sang du Prestre se mua par nature, mais il n'en fit point de semblant, & pardonna au pauvre

pauvre homme la mort de son pere , & depuis luy monstra plus grands signes d'amour qu'auparavant, & tant que sa femme s'en aperceut , & luy demanda par plusieurs fois , que c'estoit à dire que le Curé le venoit si souuent voir, & luy monstroit plus grand signe d'amour qu'il n'auoit accoustumé. Et tant de fois le luy demanda , que comme fol & mal aduisé , il luy conta toute la verité du faict. Or aduint que peu de temps apres il se courrouça à sa femme, & la voulut battre ; & elle s'escria , & saillit en pleine rue, criant à haute voix : Ah ! ah ! larron , & meurtrier, il me veut tuer & meürtrir , ainsi qu'il a faict le pere du Curé , & ie le sçay : car il s'en est confessé à luy , & il luy a donné penitence. Adonc les enfans , & parens du trespaslé oyans cecy , coururent aux bastons , & espées pour tuer le pauvre homme.

Qui

Qui se sentant en danger , monta hastiuement sur vne sienne iument, & s'enfuit. En fuyant il rencontra le Curé à cheual dehors la Ville, qui luy dit: Beau fils, comme te va? où vas tu si hastiuement? Il luy conta en bref la cause pourquoy il fuyoit. Ah! dit le Prestre, bel amy, desoends de ta iument, & monte sur mon cheual, qui va plus fort, à fin que tu puisses eschapper mes parens, qui te cherchent. Adonc le pauvre homme monta sur le cheual du Curé, & s'enfuit. Incontinent lesdicts amis, & parens vindrent, qui coururent apres l'autre pour le mettre à mort; & rencontrerent le Curé leur frere, & luy dirent: Ah! faux traistre, vous nous avez bien celé le meurtre de nostre pere, lequel vous sçauiez bien, comme ce paillard meurtrier qui s'enfuit, le vous auoit dit en confession. Ah! beaux Seigneurs, dit le
Curé,

Curé, vous auez grand tort. Et qui vous a dit cela ? Je n'en sçay rien, cela sçay-ie bien qu'il est vn des preud'hommes, qui soit en toute la Parroisse. Ils respondirent : Vous mentez, vous le sçauiez bien, mais vous le nous auez tousiours celé, & si l'auiez gardé ; encores plus, car vous luy auez baillé vostre cheual, pour mieux eschapper de nos mains, & auez prins sa iument. Le Prestre excusant tousiours le bon homme, fut mené à ce point, que les paroles monterent tellement à courroux, qu'ils le tuerent. Et ainsi pouuez-vous voir clairement, & cognoistre par cet exemple, que ce mot, *Je me confesse*, clost la bouche du Prestre.

Or oyez pourquoy l'on dit, *A Dieu tout-puissant, à la benoite Vierge Marie, & à tous les Saints, & Saintes de Paradis. Nostre Seigneur, Roy & Empereur de tout le monde, a deux Cours,*

Cours, l'une de Justice, l'autre de misericorde ; & le Diable n'y ose mettre la main sur quelqu'un, iusques à ce que Dieu le luy liure par Justice ; qui vient alors en la Cour de Justice, pour accuser le pecheur, & Justice luy respond : Je ne te crois point, car tu es menteur. J'ay de bons tesmoins, fait le Diable, & dignes de foy, sans nul reproche, c'est à sçauoir, toute la Trinité, la Vierge Marie, tous les Saints, & Saintes de Paradis, avec son Ange, deuant lequel il a faict ces pechez que ie dis ; lesquels tesmoins ne viendroyent point icy pour moy, si toy-mesme ne les y appelles. Quand doncques Justice appelle Dieu, Nostre Dame, les Saints, & Saintes de Paradis, & le bon Ange en tesmoins, elle treuve estre ainsi que le Diable dit. Si dit derechef le Diable : Si ie n'ay assez de tesmoins de ceux que i'ay nommé, i'en

i'en appelle à tesmoin sa propre conscience, & vous prie que la conjuriez, & mettiez à serment, qu'elle en die la verité. Dame Justice entend parler la propre conscience du pecheur, laquelle dit que veritablement il est ainsi, & que pour rien elle ne le sçauroit excuser. Alors dit Justice au pecheur: Puis qu'ainsi est que Dieu, Nostre Dame, & tous les Saints, & Saintes de Paradis, ton Ange, avec ta propre conscience, tesmoignent d'un accord que tu as commis peché mortel, & en ce peché tu es mort sans t'en repentir, tu dois estre damné eternellement: car les tesmoins que l'ennemy a produit, sont suffisans, & conuient necessairement que ie iette sentence de damnation perdurable sur toy; car Dieu dit par le Prophete, que l'ame qui aura peché, mourra, & sera damnée. Si ne sçay quel conseil
te

te bailler, si tu n'appelles à la Cour de misericorde, & mets tant toy, que toutes tes choses en sa main.

Donc le pecheur doit appeller à la Cour de misericorde, tant qu'il est en cette meschante vie, & se doit tost aller confesser, & doit appeller la grace de Dieu : car l'ennemy le poursuivra, luy enuoyant des Aduocats pour empescher sa confession. Le premier sera mauuaise vergogne de dire son peché, qui dira ainsi au pecheur : Ne dis point ton peché, ce seroit grande honte à toy, si on sçauoit que tu fisses vn si vilain outrage, & si abominable. Auquel Aduocat le pecheur doit respondre, & dire : Je le diray, & le descouriray pleinement, purement, & nettement, sans celer aucune chose ; car il est escrit : Qui couurira & celera son peché, Dieu le descourira au iour du Iugement deuant les ennemis, deuant les

les Saints, & Saintes, & deuant tout le monde.

Cet Aduocat ainsi vaincu, viendra l'autre nommé hypocrisie, & dira : Garde-toy bien de dire ton peché à ton Confesseur, car il tient à present grand conte de toy ; & si tu le luy dis, parauanture il osterà son cœur de toy, & iamais n'en tiendra si grand conte. Ne crois point cet Aduocat, car il est faux. Et sçaches de vray, que tous bons Confesseurs aiment mieux le pecheur, & pecheresse apres, que deuant ; & de tant qu'il se confesse de plus grands, & plus abominables pechez, de tant l'ayme-il encore mieux, comme appert par l'exemple cy-dessus rapporté, qui parle d'un pauvre homme qui tua le pere de son Curé. Les bons Confesseurs sont de la nature des bons Anges, lesquels de tant qu'ils voyent un grand pecheur se conuertir, de tant
font

font plus grand' chere au Ciel,
comme le dit Nostre Seigneur en
l'Euangile ; ainsi font les Confes-
seurs , & Dieu mesme. Vous auez
l'exemple en l'Euangile d'un hom-
me qui auoit cent brebis, mais il en
perdit vne; il laissa les quatre vingts
dixneuf , & alla querir celle-là qui
estoit perdue au desert , & si tost
qu'il l'eut trouuée , il la mit sur ses
espaules , & l'apporta en sa maison,
disant à ses amis, & voisins : Menez
ioye avec moy , car i'auois perdu
ma brebis , & ie l'ay trouuée. Ainsi
est-il de Dieu , quand il trouue le
pecheur par vraye confession, il fait
plus grande ioye d'iceluy, ou d'icel-
le , & mene plus grande feste que
de quatre vingts & dixneuf iustes,
qui ne firent iamais penitence. Si tu
veux doncques estre bien-aimé de
ton Confesseur , confesse-toy har-
diment , & descouure tout ton pe-
ché pleinement , & il te confessera,

F

confortera, aydera, & conseillera à son pouuoir, & tiendra plus grand conte de toy qu'auparauant.

Après que par cette maniere tu auras vaincu tel Adueur, le Diable t'enuoyera le troisieme, c'est à sçauoir, esperance de longuement viure, qui dira: Mon amy, ou amie, tu es ores assez ieune, tu te confesseras assez à temps. Auquel tu dois respondre: Je me confesseray tout maintenant, car ie n'ay point de demain.

Après celuy-cy viendra le quart, appellé mauuaise peur de faire penitence trop grande, & dira: Ne dis point ton peché, car il est trop grand, & le Confesseur t'en baillera trop grieue penitence, laquelle tu ne pourrois faire, & vaudroit pis que deuant. Auquel tu dois respondre ce que Salomon dit: Qui doubtera icy en ce monde vn peu de peine, & de penitence à faire, il en aura tant

tant à souffrir ailleurs, c'est à dire, en l'autre monde, qu'il ne le pourra porter: car il conuient que le pecheur soit icy puny par penitence, ou ailleurs. Dis donques tous tes pechez, car si tu en caches aucuns par le conseil de ces Aduocats, tu perds ta cause en la Cour de la misericorde; & si tu dis tout, tu es quitte: car Nostre Seigneur, Nostre Dame, Saint qui soit en Paradis, Diable qui soit en Enfer, ou ailleurs, n'auront iamais memoire, ny souuenance de ton peché, comme le promet Dieu par le Prophete Ezechiel: *Non recordabor amplius iniquitatis eorum*. Bien malheureux sera le pecheur, qui n'osera dire son peché à vn homme mortel, qui est pecheur comme luy, quand en l'autre siecle deuant toute la Cour de Paradis, il luy sera reproché. Malheureux sera celuy qui aimera mieux estre en penitence, & en tor-

ment à tousioursmais & perpetuellement, qu'un, ou deux, dix, ou douze ans. Si tu auois douze playes mortelles, & les onze fussent guaries, & ne fisses conte de la douzieme, elle pourriroit, & te feroit mourir. Ainsi le peché, que tu laisserois esciemment à confesser, & dire tout le dernier, pourriroit tellement ton ame, que tu mourrois spirituellement. Voyla pourquoy on dit: *Je me confesse à Dieu, & à la Vierge Marie, aux Saints, & Saintes de Paradis, & à vous, Sire.*

Vous deuez sçauoir que cette iournée a trois lieues, comme l'autre: la premiere est Confession, qui doit estre entiere: la seconde, qu'elle doit estre de bonne volonté, sans contrainte, comme dit David: *Voluntarie sacrificabo tibi, & confitebor nomini tuo.* La troisieme est bonne esperance, que le pecheur doit auoir, que Dieu peut, & veut pardonner les

les pechez : car comme dit Sainct Augustin , Dieu est plus prest de nous pardonner , que nous ne sommes de luy demander pardon. Et à la fin de cette lieüe le pecheur se peut hoster , & non point és deux autres , c'est à dire , il peut reposer en esperance d'auoir pardon , & non pas faire comme Iudas , disant : J'ay peché , en trahissant le sang-innocent. Il se confessa volontairement , & dit entierement son mesfaiet , & fit satisfaction , car il rendit les trente deniers : mais il n'alla pas cette lieüe , car il se desespera ; & aussi fit Cain , qui dit : Mon peché est plus grand que la misericorde de Dieu. Là où il deuoit dire : Mes pechez sont tres-grands , mais la misericorde de Dieu est encores plus grande ; & luy erier mercy. Et tous deux certainement eussent obtenu pardon , & misericorde.



LA TROISIÈME

Iournée

*Du voyage spirituel, pour reuenir à Dieu,
& se remettre au chemin du Ciel.*

QV'EST-CE que satisfaction, sans laquelle on ne peut paruenir en Paradis? Cette iournée a trois lieues, comme les autres: la première est restituer l'autrui prins à tort: car saint Augustin dit, que le peché n'est point pardonné, si le mesfait n'est restitué. Doncques il faut rendre ce qu'on tient mauuaiselement de l'autrui. Et qui a osté à Dieu quelque ame, c'est à dire, qui a attrait vne ame à peché par soy, ou par son exemple, il la luy conuient rendre. Mais tu diras: l'ay esté ieune, & me suis
gou

gouuerné par finesse & dol, tant que j'ay peu; & me suis montré ez Eglises, & plusieurs autres places deuant les hommes, & deuant les femmes, dont plusieurs ont peché par mon mauvais exemple, & attivement. Comment les pourray-je tous retirer de leurs pechez, car ie ne les cognois point tous, & aussi ie n'oserois retourner vers ceux qui ont peché par moy: car par aduantage ie serois enflammé d'eux en telle maniere, que ie cherrois d'en estre chef en peché, ou ie les y ferois rechoir; & pour ce me semble que ce feroit grand peril de retourner deuers eux. Que feray-je donc? Feray-je crier par les Eglises, & par les marchez, que tous ceux, & celles qui par moy, & mon fait ont peché, se repentent, & fassent penitence?

Nenny, mais si vous pouuez, ostez de peché ceux que vous auez

osté à Dieu, & c'est le plus seur, Et si
ne les en pouuez oster, au moins
mettez peine d'en retirer aucuns
autres, & les rendre à Dieu, au lieu
de ceux que vous luy auez osté.
Exemple. Vous devez à vn homme
cinq sols, il n'est point de nécessité
que luy rendiez ces cinq sols mes-
mes qu'il vous a presté, si vous ne
les auez, mais il vous faut ren-
dre autres cinq sols au lieu, ou la
valeur. Et pource que tu ne sçais,
combien de gens tu as attrait à pe-
ché, tu te dois donner peine par
bonne doctrine, & bon exemple de
retirer autant de gens de peché
que tu pourras, & les conuertir à
Dieu par bon exemple, ou autre-
ment. Et si tu ne peux conuertir les
gens par paroles, ny par exem-
ple, ny par quelque autre bien, au
moins prie souuent pour eux. Si le
Roy faisoit vn noble disner, avec
Edict

Edict que qui ameneroit quant & soy le plus de gens , il seroit le mieux venu , & seroit celuy auquel il donneroit le plus grand don ; ie crois que chacun mettroit peine d'amener à ce disner autant belle compagnie de gens qu'il luy seroit possible , pour l'amour du Roy , & pour auoir le plus grand don. Ainsi est il de Dieu : car il fait crier par tout le monde par ses messagers les Apostres , & Prophetes , par les Docteurs , & Prescheurs , que celuy qui amenera plus d'ames au disner de Paradis par son bon exemple , & doctrine , sera le mieux aymé , & celuy à qui nostre Seigneur fera plus grande retribution. Pour cette cause ie t'admoneste de ce faire , & prie Dieu souuent , en disant : Sire Dieu , vueillez par vostre benigne grace illuminer mon cœur , & mon entendement , & me donner cognoissance , en quelle maniere ie pourray

F 5

viure pour plus attraire d'ames à vostre amour.

Qui a courroucé autrui, il le doit appaiser, & luy crier mercy, & donner bon exemple à tous d'oresnauant, & aussi restituer le bon renom à celuy, à qui il l'a soustrait par son parler. Et s'il estoit ainsi, que tu eusses osté à quelque personne aucuns biens mondains, ou temporels par mauuaistié, de droict il faudroit qu'ils fussent rendus, & toutesfois le monde les donne. A plus forte raison, & mieux les biens spirituels que Dieu donne, se deuroient restituer. Si tu me dis, on ne peut restituer vne fole parole quand elle est dite, veu qu'on ne la pourroit iamais reuoquer. Je m'accorde à cela, ce nonobstant tu n'en seras iamais quitte iusques à tant que de toute ta puissance, en toute maniere que tu sçauras & pourras, tu te seras desdit de tes fausses paroles

roles deuant ceux à qui tu les auras dites, & pour ceux lesquels tu sçauras ne le pouuoir croire, tu es tenu de dire, & prononcer és Eglises, ou ailleurs, que tu as dit contre telle personne telle parole, & que tu as menty, & qu'en luy tu ne sçais, & ne sceus, & ne vis oncques, que bien, & que à dessein tu l'as controuuée pour le blasmer. Et ainsi tu auras cheminé la premiere lieuë.

La seconde est, pleurer & plaindre ses pechez, ou faire aumosne, ou penitence, ou autre bien, pour auoir pardon de ses pechez, selon le conseil de son bon Confesseur.

La troisieme lieuë est, pardonner à ceux qui t'ont mesfait, ou fait desplaisir : car si tu ne leur pardonnes, le temps viendra que tu pardonnerois volontiers. Voire-mais tu me pourrois dire : Comment pourrois-je pardonner à celuy qui m'a battu, blessé, & fait dommage, ou

scandalisé à tort, ou à mauuaise cause, & encores de iour en iour se mocque de moy, en me blasmant & diffamant tant qu'il peut, & ie ne luy dis ny fis oncques vn seul desplaisir? S'il y auoit vn homme qui deust au Roy mille liures, & le Roy le tint en prison, luy disant, si tu ne me payes ce que tu me dois tu seras pendu, & luy n'ayāt dequoy payer, le Roy luy dist, vn tel te doit cinq sols, qui est mauuais payeur, & te coustera beaucoup plus à plaidoyer que la debte ne vaut, & pource quitte luy les cinq sols qu'il te doit, & ie te quitteray les mille liures que tu me dois, & si tu ne le fais, ie te feray pendre, ne le feroit-il pas? Je crois qu'ouy. Ainsi est-il, à spirituellement parler, de nous, car nous sommes grandement endebtez, & grandement obligez enuers Dieu, le Roy des Roys; & faut que nous le payons, ou nous serons pendus
au

nant la doctrine dessusdite, qu'il est venu par ces trois lieues & iournées iusques à Dieu, c'est à dire, qu'il est en estat de grace, il se doit garder de rechoir, en prenant de soy-mesme vne maniere de viure, ainsi que s'ensuit, ou semblable. Toutes les nuits te leueras au plus pres de minuit que tu pourras, & quand seras esueillé, leueras tes yeux en haut de tout ton cœur, & adoreras de tout ton cœur ton doux maistre, Dieu & Redempteur Iesus-Christ estant en la Croix, & feras le signe de la mesme Croix en ton front, & puis en ta paulme, laquelle baiseras, en disant: Nous t'adorõs, Sire Dieu, Iesus-Christ, car par ta sainte Croix tu as racheté le monde. Et quand tu seras leué, tu te mettras à genoux si humblement que tu pourras, & salueras nostre Seigneur, en disant au moins Pater noster, & Aue Maria, à trait, & intelligiblement. Apres, tu diras

diras tes matines, & en disant tes heures, chasse tant que tu pourras les pensées mondaines, & joins à Dieu ton cœur deuotement. Tes matines dites, tu penseras à la passion de Iesus-Christ de tout ton cœur, en sentant les peines qu'il a souffert pour toy, en le remerciant des graces qu'il t'a fait. Apres, tu te recommanderas tres-deuotement à nostre Dame, & aux autres Saints de ta deuotion. Et apres, selon les nuits qui seront longues, & selon ta deuotion, tu feras vne fois ou deux, que de nuit que de iour la priere qui s'ensuit.

Premierement tu prieras Dieu pour l'Eglise, & pour les Prelats, & hommes d'icelle, pour les Princes de la terre, & pour tout le peuple qui leur est commis; apres pour tous ceux à qui tu es tenu, & aussi pour toutes les creatures qui sont en tribulation, pour les trespassez, auxquels

quels nous sommes tous tenus, c'est à sçauoir pour ceux seulement qui sont en Purgatoire. Tu ne diras trop grand' foison d'oraisons, ains t'acoustumeras à souuent penser à aucunes pensées qui s'ensuiuent: Premièrement à la bonté de Dieu, & à ta mauuaistié; apres tu penseras à la gloire que tu veux auoir, & à la peine que tu as deseruy. Item à l'heure de la mort, & au iour du Iugement. Cela faict, tu te recoucheras vn peu, & te reposeras. Et quand tu seras releué, prens de l'eau beniste, & puis va à l'Eglise, & dés que tu entreras en icelle, regarde l'Image de Iesus Christ des yeux de ton corps & de ton cœur; apres, prens de l'eau beniste, & te mets à genoux, en disant, *Veni Creator Spiritus*, ou ton *Pater noster*, puis prens ton siege en l'Eglise le plus priué que tu pourras, & là dis Prime, Tierce, Sexte, & None, sans oublier la Passion

lion de ton doux Sauveur en disant
ses heures. A chascune Messe que
tu ouyras, dis ton *Confiteor* tout bas;
si tu le sçais : & toutes les Festes
commandées assiste entierement à
la grande Messe, & aux Vespres
pour le moins, en te recommandât
aux Saints & Saintes desquels est
feste, & le demeurant de la feste
employe le à toutes œuvres spiri-
tuelles. Et quant est de te confesser,
mets ton ame en la cure d'un Con-
fesseur qui ait science, & qui soit
homme de bonne conscience, car
s'il a soin de son ame, il aura souue-
nance de la tienne. Et s'il est tel que
ie dis, obey luy pour ton bien, com-
me au Vicaire de Dieu. Tu te con-
fesseras chacune sepmaine vne fois,
si tu peux : mais si tu rechois en au-
cun peché mortel, lequel tu ne dois
pas longuement nourrir, confesse
t'en incontinent, & ne te couche
point en tel estat, s'il t'est aucune-
ment

ment possible. Reuenü en ta maison ne sois auouement oysieux. Ne t'arreste point à ton huys sur la rue, ny en la fenestre, ains sois tousiours occupé à quelque chose, que l'enemy ne te puisse tenter: car il tente plus facilement les oysieux que les laborieux.

Quant aussi à ieusner, ieusner par discretion est bonne œuvre, mais sans discretion ne vaut rien, ains est fort perilleux: parquoy en prendras conseil de ton Confesseur. Saches outre plus, que ieusne sans aumosne est comme lampe sans huyle & sans feu; & pourtant, ce que l'on restraint à son corps doit estre donné aux pauures. Si te dois abstenir de peché, ou ce seroit le ieusne au diable, qui tousiours ieusne, & incessamment fait mal. Tu ne mangeras que deux fois le iour, si ce n'est pour cause de maladie, ou pour autre raisonnable cause. Disne
bien,

bien ; & soupe legerement. Vie d'Ange est, ne rien manger ; vne fois le iour, vie de Saint ; deux fois, vie d'homme ; mais plus, aſſeurément c'est vie de beste. Iamais ne mangé que n'ayes dit le *Benedicite* premièrement, & graces tantost apres le repas, & parle peu à ton manger, si ce n'est de Dieu. Tu peux vser de paroles nécessaires ou profitables, que si tu t'apperçois auoir dit paroles oyseuses, repens t'en sur le cháp, proposant & disant qu'une autre fois tu t'en garderas. Et ne dis iamais d'autrui ce que tu ne voudrois qu'on dist de toy pour raison. Tu dois dire ou pēser aucune chose de bien, à fin que ton esprit puisse prendre son repos avec le corps. Quand tu auras dit graces, tu t'en iras en ta chambre, & diras Nonne, puis tu estudiēras aucunes bonnes escritures salutaires à ton ame. Et en quelque lieu que tu sois, parle le moins

moins que tu pourras : car on ne peut longuement parler sans pecher.

Va peu souuent par la ville, & quand tu y seras, ou y auras affaire de necessité, va ton chemin, le chef abbaisé, sans arraisonner aucun, s'il n'est de necessité. Si l'on parle à toy, respons en bref, & humblement, & reuiens en ta maison le plustost que tu pourras. Mange peu, ou rien, dehors ta maison. Ayes peu d'acointances aux personnes, si ce n'est aux personnes deuotes, & encores bien esprouuées. Sois piteux sur tes prochains, si tu veux que Dieu le soit sur toy, & leur ayde en choses qui seront selon pieté & charité, en leur donnant ioyeulement de tes biens pour l'amour de Dieu, selon que tu auras dequoy. Si tu as quelque chose à faire qui te touche, fais la par le conseil d'une bonne personne: & te souuienne que tu ne peux rien cacher

cher de ce que tu fais ou penses, que Dieu ne le voye clairement. Ordonne en telle maniere ta conscience & tes besognes, que quand tu seras malade tu n'ayes aucune cause de penser qu'à ton createur. Tu te vestiras simplement de simple couleur, ou moyëne, & ayes en abomination toute curiosité & vanité.

Le vespre venu , tu diras tes vespres & vigiles de morts , si tu les sçais, & le peux faire , c'est à sçauoir sur la sepmaine à trois pseumes & trois leçons. Et apres soupper, quand tu auras rendu graces à Dieu, tu te retireras en ta chambre assez tost, & clorras ton huys apres toy. Ainsi dois-tu faire , specialement de tes sens, qui ont esté occupez le iour en plusieurs lieux , & choses mondaines, lesquels te faut retirer & rassembler avec toy, & clorre l'huys de ta conscience, & te mettre avec
ton

ton Createur seulement, & ne dois parler iufques au lendemain, si ce n'est vn mot ou deux de grande necessité, ou de grand profit.

Après tu diras Complies, & puis te tiendras comme en Chapitre, & appelleras tes cinq sens de nature, & fais que chacun te rende compte de son office, comment il aura usé la iournée. S'il a bien fait, loües-en Dieu, d'où tous biens viennent, s'il a mal fait, accuse-toy deuant Dieu humblement de toutes tes fautes, & t'en confesse le plustost que tu pourras. Et comme qu'il en soit, ne laisse point qu'une fois le iour, à tout le moins, tu ne penses à ta conscience; & si tu le fais ainsi, tu feras garny de la vertu d'humilité, & l'auras avec toy. Après, tu t'agenouilleras humblement, & salueras la sainte Trinité, disant la Pater-nostre cinq fois, ou au moins trois fois. Tu salueras aussi la Vierge Marie,

Marie, & recommanderas ton ame
& ton corps à la garde de Dieu &
d'elle. Parcillement tu salueras ton
Ange d'une bonne deuotion, à fin
qu'il soit soigneux & plus enclin à
te garder puis signe-toy, & prens de
l'eau beniste, & repose-toy en la
main de Dieu.

Quant est du coucher, s'il se peut
faire, tu coucheras tout seul, &
n'osteras point ta chemise, quelle
qu'elle soit, ains l'aualeras au long
de toy en ton liét, tant qu'elle se
pourra estêdre, encores seroit meil-
leur coucher vestu. Tu mettras à
point ta couuerture, mais tu ne re-
mueras point la paille de ton liét, ny
la ceste, si tu n'es malade. Si te dois
endormir en aucunes bonnes pen-
sées. Et à fin que tu n'oublies point
ceste ordonnance, ie veux que tu la
lises chascune sepmaine vne fois, si
faire se peut.

Adresse

Adresse pour la deuotion & aduancement en la voye du Ciel.

SOis souuent en oraison ou de bouche ou de cœur. Dix choses aydent à auoir deuotion.

LA PREMIERE est la pureté de conscience, ainsi que celuy qui veut prier vn grand Seigneur pour quelque grande besogne, doit garder quand il vient deuant luy, qu'en nulle chose il luy apparaisse desplaisant. Pareillement la personne qui veut aller à l'oraison, doit euitier qu'elle n'ait aucune tache de peché desplaisant à Dieu, qui sçait & void clairement les cœurs de tous. Dont S. Bernard dit : Toutes les fois que nous allons à l'oraison, nous allons à la Cour du Ciel, en laquelle le Roy de gloire est adoré, & la Vierge Marie Royne du Ciel & de la terre. Si deuons apparoir en grande
reue

reuerence, & en grande treueur & humilité, en grande pureté & netteté de cœur, à fin que nulle chose apparoiſſe en nous qui puiſſe deſplaire à Dieu, qui eſt ſi grand Seigneur; car S. Iean, bouche d'or, dit: Quand tu fais oraiſon, fais que tu ſois tel, comme celuy qui a à parler à Dieu. Purge doncques auparavant ta conſcience de toutes ordures de peché à ton pouuoit, & t'humilie, apres fais ta requeſte, autrement tu ne ſeras point exaucé.

LA SECONDE choſe eſt, que l'hōme doit chercher vn lieu ſecrēt auquel il ne ſoit point veu, à fin qu'il ne ſoit deſtourné, ou que le vent de vaine gloire ne luy oſte le fruit de ſon oraiſon. Nous en auōs l'exemple de Ieſus-Chriſt, qui s'eſloigna de ſes diſciples quād il voulut prier Dieu ſon Pere; ainſi fit Moyſe, qui monta en la montagne ainſi l'Ange trouua la Vierge Marie.

G

toute seule, quand il la salua. Sainct François auoit de coustume quand il vouloit prier, de s'en aller si profond dans vn bois, que s'il eust crié bien fort les compagnons ne l'eussent peu ouyr, à fin qu'il peust plus hardiment parler à Dieu, & luy dire son intention. Et de ce nous auons l'exemple en nous mesmes, car si quelqu'un a à parler à vn autre, il luy parle plus volontiers quand il le trouue seul qu'accompagné. Sois doncques en lieu secret si tu peux; car le fils de Dieu est ainsi que l'amy, qui ne veut point reueler les secrets de son amy.

LA TROISIEME chose est, qu'il doit ietter lors toutes pensées terriennes & mondaines hors de son cœur, à fin que toute l'intention de sa pensée puisse estre en son oraison; car le cœur est loin de celuy qui occupe au monde ses pensées, comme dit Dieu par Esaïe. Ce peuple

ple m'honore des leures seulement, car leur cœur est bien loin de moy. Et pour ceste occasion il est dit: Qui mange, chasse les mouches de sa viande & de son boire. Tout ainsi doit-on chasser de son oraison toutes les pensées mōdaines. L'oraison est comme vn doux oignement, ou vne bonne viande, & les foles pensées sont les mouches: car comme la bonne viande & le bon boire, ou le bon oignement, sont empirez & gastez quand la mouche s'y sied, pareillement par les pensées vaines & mondaines les oraisons sont gastées, & faictes de nulle valeur. Veuilles-les doncques chasser hors de toy.

LA QUATRIESME chose est, qu'il doit de tout son cœur, les mains estendues, appeller le Saint Esprit, à ce qu'il luy vueille donner grace de deuotion: car vne oraison sans deuotion est viande sans sel,

qui n'a point de faueur. Mets doncques peine de l'auoir, & fais ce qui est en tøy, & ce que tu ne pourras faire Dieu le fera. Et si Dieu te donne la grace de pleurer, moyennant la peine que tu y mettras, pleure : car les larmes sont comme le bon vin, duquel la bonne personne deuote enyure Dieu en oraison en telle maniere, qu'il ne luy sçait refuser chose qu'il luy demande, comme appert par Saint Pierre, & la Magdeleine, qui en grande contrition de cœur, & en pleurant, demanderent pardon à Dieu, & Dieu leur pardonna tous leurs pechez. Les larmes sont de si grande vertu, qu'une seule larme peut impetrer de Dieu tout ce que les Anges & tous les Saints de Paradis ne pourroyent faire; c'est à sçauoir quand le pecheur mesme pleure pour ses pechez : dont il est escrit au Psautier, que le plus plaissant sacrifice que le pecheur

pecheur puisse faire à Dieu est, qu'il soit contrit & repentant de ses pechez, & qu'il s'humilie deuant Dieu, c'est à sçauoir en pleurant: car quand la larme du pecheur penitent est offerte à Dieu d'un cœur humble & deuot, elle transperce le Ciel par sa vertu, & monte iusqu'au throsno de la Majesté diuine. Et n'y a Ange, ny Archange, qui puisse, ny ose l'arrester iusques à tant qu'elle soit venue deuant la face de Dieu, & qu'elle ait impetré ce qu'elle veut pour son salut, car l'oraison trempée en larmes, selon S. Augustin, transperce le cœur de Iesus-Christ, & le soumet à pieté, & l'attire & encline à l'aymer & muer sa sentence iudiciaire, & radresse le pecheur parfaitement à Dieu.

LA CINQVIESME chose est, qu'il doit regarder toutes ses fautes & ses pechez dont il a courroucé Dieu, & ainsi sa fragilité attire à

pleurer, & le pleur rend la pensée pure, & peut impetrer de Dieu ce qu'elle demande, & qu'elle veut.

LA SIXIESME chose qu'il doit regarder, est l'estat de ceste presente misere, où il y a tant de perils, qu'il n'y a homme qui les peust racôter: car on y est tousiours en tentation de la chair, des vanitez mondaines, & des fallaces des ennemis, en dormant, en veillant, estant debout, en se taisant, en parlant, en labourant, en reposant, & priant, en ouurant, au moustier ou au marché. Et si doit-on penser q̃ la chair & le monde assaillent fort leurs ennemis. Et pour ce la personne doit bien prendre garde qu'elle ne soit point amie du monde ny de la chair: car tous ceux qui ayment le monde sont ennemis de Dieu, comme dit Saint Iaques. Je m'esmerueille comme l'homme peut estre seur & ioyeux, qui bien regarde les perils de ce monde: car
ce

ce monde est comme vne chartre
où nous sommes emprisonnez pour
nos pechez, & ne sçauons comme
nous en fortirons, si nous ferons
damnez ou sauuez. Nous deuons
ce neantmoins tousiours craindre
que ne soyons damnez. Ce seroit
grande merueille, si le larron chan-
toit qu rioit quand on le meneroit
pendre. Ne le croiroit-on pas estre
forcené? Encores s'ōmes-nous plus
hors du sens, & plus abusez, que ne
sont les larrons: attendu que nous
allons au gibet d'Enfer, & à la dam-
nation à iamais perdurable, en
chantant, dansant, riant, & faisant
grande feste. Nous sommes icy
cōme en la haute mer, le voile ten-
du, & le vent à souhait, & nous en
allons tous les iours à grandes ion-
nées vers le Paradis ou vers l'Enfer
& ne sçauons auquel, ne si nous
sommes pres ou loin du port, & in-
cessamment, soit en dormant &

veillant, en chantant, en riant, en dansant, en faisant grand' chere, soit en gemissant & pleurant, & menant grande doleance de nos pechez iour & nuict, approchons du port hastiuement sans arrester; & si nous semble que nous ne bougeons, ou bien peu, comme ceux qui sont en la mer. Et pource, qui bien regarderoit ce monde, & le peril qui y est, il auroit plus de sujet de pleurer que de rire. Car si la personne regarde le Ciel, il void le doux pais de son Pere & de ses amis, & de son doux Createur, qui desire fort sa venüe, d'où il est encores bien loin pour ses pechez, & en grand peril de fouruoyer: & en ce a sujet de pleurer. Et s'il regarde la terre, il void la matiere dont il est fait, & en laquelle il retournera quand il trespassera de ce monde à la fin de sa vie: & en ce il a sujet de pleurer. Et s'il regarde à la droite, il void les
prospe

prosperitez & richesses de ce monde abuseur & deceuable , qui le meine & attrait à la damnation ; & en ce il a sujet de pleurer. Et s'il regarde à la gauche, il void les tribulations & les maux que les mauuais font souffrir aux bons ; & en ce il a sujet de pleurer. Et s'il regarde derriere soy, il void le temps qu'il a perdu en vanité & en peché, qu'il eust deu auoir despendu en bonnes oeures ; & en ce il a sujet de pleurer. Et s'il regarde deuant soy, il void la mort qui vient , & ne sçait quand il moustra , ny de quelle mort, ny en quel lieu, ny en quel estat ; & en ce il a sujet de pleurer. Et s'il regarde dedans de soy, il se void enuironné de tant de perils , & si ne sçait ce qu'il doit deuenir, & attend la dure sentence que le Iuge droiturier jettera au iour du Iugement sur les pecheurs, dont il est du nombre, s'il ne s'amende ; & en ce il a sujet de

pleurer. Attẽdons doncques nostre fin en larmes, en pleurs, en penitence : & appellons le S. Esprit en oraison, qu'il nous ayde & defende de tous ces perils & miseres.

LA SEPTIESME chose est, qu'il doit regarder l'estat où il sera à la mort, quand tous ses membres auront du tout perdu leurs offices, & l'ame issant du corps, viendra sur elle son Seigneur & son Iuge demesurément courroucé à luy pour ses pechez. Et s'il n'est adoncques vray repentant de toutes ses fautes & pechez, il verra l'Enfer tout ouvert pour l'engloutir, & ses pechez à la dextre qui l'accuseront, & les ennemis à la fenestre qui le voudront emporter, & horriblement crieront sur luy. Pensez doncques souvent à ces choses icy, & sans cesser. Je sçay bien que si tu as sens, tu despriseras legerement les choses mondaines, & t'attrairas à deuotion:

tion : car à la mort les vanitez de ce monde, c'est à sçauoir honneurs, richesses, beauté, force, science, & delices mondaines greueront plus qu'elles n'ayderont. Nul pourra ayder la personne, ny aucunement secourir, ny amis, ny parés, ny pere, ny mere, ny aumosne, ny oraisō, ny penitence, ny priere de Saint qui soit en Paradis, ny aucun bien quel qu'il soit, le pourront aucunement garder, s'il est prins en peché mortel, qu'il ne soit perpetuellement damné en Enfer avec tous les diables, qui le tourmenteront sans fin, & sans luy donner vn seul moment de repos. Doncques chascun doit bien prier Dieu qu'il luy doint grace de bien faire, & bien viure, & d'y mettre peine : car la bonne vie meine à la bonne fin. Et Saint Augustin dit que celuy qui aura bien vescu, ne mourra ia mal.

LA HVICTIESME chose est,

G 6

qu'il doit regarder la grande humilité de nostre benoist Sauueur & redempteur Iesus-Christ, & ce qu'il souffrit pour nous donner exemple; car combien qu'il fust Seigneur du Ciel & de la terre, si voulut-il pour nous naistre d'une femme, & voulut estre pauvre, & deietté, & desprisé, & soudenir tant de persecutions & de vilenies, que l'on ne les scauroit raconter, ny dire. Et depuis l'heure qu'il nasquit iusques à l'heure qu'il souffrit mort & passion en l'arbre de la Croix pour nous, il ne voulut auoir aucun honneur ny richesses, ny delices, ains peine, travail, & toute pauvreté. Et en ce il nous donna exemple, que celuy qui veut aller à Dieu, doit plus aymer la tribulation en ce monde que les delices: car les delices nourrissent les vices, & meinent l'ame en Enfer, là où les tribulations & tentations meinent l'ame à l'expurgement, & l'espreu

l'espreuuent pour la mettre en Paradis. Parquoy il appert, que la personne sur toutes choses doit desirer estre haye du monde sans l'auoir merité, car nostre Seigneur dit: Vous serez bien-heureux quand le monde vous haïra & mesprisera. Et nostre Seigneur au iour du Iugement dira à ceux qui auront ainsi esté mocquez au monde: Vous estes ceux qui fustes au monde avec moy en tentations & tribulations: & pourtant, venez avec moy, car vostre loyer est grand au Ciel. Or prions Dieu qu'il nous doint puissance de les bien porter.

LA NEVFVIESME chose est, qu'il doit regarder comme Iesus-Christ mourut pour nous honteusement, & avec grande confusion: & comme pour nous il fut battu, frappé, mené, lié, nauré, mocqué, & couronné d'espines, qui luy entroyent en la teste iusqu'à la cervelle.

uelle. Et ainsi regarde toute la Passion & ses tourmens, & la patience, & le grand amour qu'il nous monstra: car l'homme ne peut monstter plus grand amour à son amy, que voulant mourir pour luy. Dont dit Sainct Bernard: Si mon cœur estoit noyé en larmes, si mes yeux estoient fontaines, & mes cheueux ruisseaux, & tout en moy courust comme riuere, qui iamais ne cessast ny faillist, si ne pourrois-je suffisamment pleurer la Passion de mon Createur & Redempteur Iesus-Christ, laquelle il souffrit pour moy.

LA DIXIÈME ET DERNIÈRE chose est, qu'on doit mettre son cœur, & les yeux de son entendement à regarder les joyes que Dieu a appareillé à ceux qui l'ayment. Et doit-on contempler la Vierge Marie, Royne de tout le monde, environnée d'Anges & d'Archanges avec son noble Conuent des Vierges,

ges, toutes vestues si richement & si noblement , que cœur aucun ne pourroit dire, ny penser la cœriesme, ny la millesme partie de la beauté que la moindre de ces Vierges a. Là sont les Prophetes & les Martyrs, qui sont comme Roys, Princes, & grands Seigneurs , & autres Saints & Saintes sans nombre. O qu'ils sont richement parez ! & que ce sera grande ioye & grande lieffe de voir ceste noble cōpagnie! Mais que sera-ce de voir apres le Roy en son maintien & estat , duquel la beauté est si grande , que tous les habitâs du Ciel ne se pourront saouler de le regarder ? Saint Bernard dit que la beauté du Roy, & la douceur du païs du Ciel, est si grande , que si vn homme estoit asseuré en ce monde icy de viure mille ans fort ieune, ioyeux, en grād honneur & auoir ; & avec ce qu'il fust seur d'auoir sa vie en delices, &

en

*Autres adresses pour s'advancer en la
voye du Ciel, & se garder de four-
voyer d'icelle, & rethoir au mal, don-
nées à sa sœur, Madame Jeanne de
Luxembourg, & comprinses en di-
verses considerations, très-propres pour
les ames plus espurées.*

I. CONSIDERATION.

TRES-CHERE SOEVR, sur toutes choses regardez bien ce que vous auez esté, & serez, d'où vous venez, où vous estes, & où vous allez. Souuienne-vous, & vous prenez garde que nostre chair n'est que mort d'homme, & vne charogne puante & orde; & viande aux vers. Pensez souuent que vous n'estes qu'un ver issant de terre, & qu'en terre vous faut retourner. Souuienne-vous que vous estes tous les iours, & aussi de iour en iour,

iour, d'heure en heure, en peril de choir en ce tant horrible & espouuantable abyfme d'Enfer pour vos pechez. Allez à la mort & au grand Iugement. A l'heure, regardez qui vous a enuoyé au monde. Pensez & vous rememorez pourquoy, & quelles choses vous y deuez faire, & où vous irez loger la premiere nuit au partir de ce siecle: car vous irez ou en Paradis, ou en Purgatoire, ou en Enfer: & si vous allez en Paradis, vous serez honteuse, si vous n'estes si bien ornée de vertu que les autres que vous y trouuerez. Et si vous allez en Purgatoire chargée de pechez, vous aurez de peine & tourment plus qu'on ne scauroit dire ny penser.

Soyez aduisée que vous mourrez plustost que vous ne pensez & ne cuidez. Les iours des hommes sont briefs, & passent cōme ombre. Soyez certaine, que tout ce que
vous

vous avez trouué au monde vous l'y laisserez, c'est à sçauoir richesses, honneurs, puissances, delices & soulas ; il vous faudra laisser tout , & n'emporterez rien , fors vos bien-faicts. Et ainsi que viuent ceux qui à present sont , ainsi souloyent viure ceux qui sont morts par cy deuant ; ainsi mourront tous ceux qui à present viuent. Aduisez bien à cecy, & foyez sur vostre garde , car vous ne sçauiez l'heure de la mort. Apprenez doncques à estre humble & debonnaire, & portez toutes les aduersitez doucement en patience pour l'amour de Dieu , qui en a tant porté pour l'amour de vous. Fuyez le monde tant que vous pourrez , & toutes choses mondaines, & ensuyuez ceux qui ensuyuent Dieu , & n'ayez pas fiance en ceux qui prennent volontiers , & reçoient les dons, car les dons aueuglent le sage homme ; mais ayez fiance en celuy
en qui

en qui est la loyauté, c'est à dire, qui en toutes choses cherche le salut des ames.

N'oyez-point des choses oyseuses, ny choses qui puissent empescher vostre salut. Soyez volontiers aymée de ceux qui volontiers aiment Dieu. Apprenez les commandemens de Dieu & de la Sainte Eglise, & ne les outrepassez pour rien qui soit. Soyez tousiours véritable, & ne mentez pour chose qu'en doive aduenir : car si vous auez à souffrir pour dire vray, vostre loyer en sera plus grand au Ciel. Baillez à toutes gens bon exemple. Oyez tous les iours messe, si vous pouuez. Soyez souuent en oraison, & plus souuent de cœur que de bouche. L'oraison briefue transperce le Ciel, pourueu qu'elle soit dite de bon cœur. Ne priez point expressement pour chose qui n'est point nécessaire au corps ny à l'ame.

l'ame. Attrayez toutes personnes à bien faire par doctrine & exemple de bonne vie, tant que vous pourrez. Pensez souuent à la Passion de Iesus-Christ. Desirez souuent auoir à souffrir pour luy, ainsi qu'il a souffert pour vous, autrement vous ne pourrez vaincre ny surmonter vos ennemis.

Soyez sobre au boire & au mager, car c'est la santé du corps & de l'ame. Cherchez tousiours la paix de Dieu, encor que tout le monde en deuroit estre courroucé : car on ne peut pas bien plaire au monde & à Dieu ensemble. Si vous cheez d'un bon propos en un mauuais, allez hastiuement à confesse, & amendez vostre vie. Et quoy que vous oyez ou voyez, tournez tout au meilleur : & tout ce qui vous aduient, pensez que Dieu le sçait, ou souffre pour vostre salut. Si la tentation vous vient, pensez que Dieu le fait

le fait pour vous esprouuer, ou l'ennemy pour vous deceuoir. Si vous vous tenez bien, vous ferez à Dieu plaisir; & si vous cheez, si vous vous releuez par confession au plustost, en vous humiliant & proposant de vous en amender vne autre fois, si la tétation reuenoit: & si vous auez victoire, vous en deuez louer Dieu, & porter amiablement tout le mal & l'iniure qu'on vous fera. Et receuez toutes mauuaitiez par bonne maniere sans vous courroucer. Soyez certaine à ceux qui ayment verité, & contraire à ceux qui sont contre verité. Aymez ce que Dieu ayme, & haïssez ce que Dieu hait, & faites paix avecques tous, si vous le pouuez, sauue vostre conscience. Faites plante de penitence, & acquerez les vertus en faisant les bonnes œuures cy dessus mentionnées.

II. CON

II. CONSIDERATION.

GRaces & paix à I E s v s, qui est
le vray & parfaict consolateur
& confort des vrays desirans. Tres-
chere & tres-aymée Sœur, & fille
en Iesus-Christ, vous avez desir
d'estre bonne, & de la part de
nostre Dieu I E s v s, & de son es-
pouse l'Eglise Catholique & Ro-
maine. Saint Augustin dit, que
pour la saincteté & bonté de vie
faut deux choses; la premiere est la
bonne volonté & bon desir de bien:
car sans la bonne volonté on ne fait
aucun bien. L'accomplissement du
bon desir est aymer Dieu deuant
routes choses, & plus que nulles
autres choses, & son prochain com-
me soy-mesme. Ainsi le dit Saint
Augustin au commencement de sa
reigle.

Matres-chere fille, j'ay entendu
la perilleuse peine & bataille en la-
quelle

quelle vous auez esté mise , dont
i'ay au cœur grand soucy , car il me
desplairoit trop ; & qui plus est , il
desplairoit souverainement à Dieu
si vous recheez en ces vanitez du
monde , qui sont perilleuses , dece-
uables , desplaisantes à Dieu , & si
contraires au bien de l'ame. Vous
auez grand desir d'estre d'avantage
bonne, & ne vous en pouuez excu-
ser , car Dieu vous a donné tant de
causes de bien faire, que toutes ex-
cusations vous en sont ostées. Pre-
mierement vous auez grand sens
naturel , qui est le noble iardin des
vertus, où elles sont plantées; & par
iceluy pouuez cognoistre & sçauoir
que les curiositez & ioluetez, & les
vaines compagnies, passent comme
tout le reste, & faut mourir ieune,
ou deuenir vieil. Et quand on est
mort, tout est passé, & ne demeure
que peine & douleur à ceux qui
meurent sans amendement; & quand
on

on est vieil , toutes ces pensées s'en sont allées avec le vent. Vous sçavez toutes ces choses, & les pouuez de vous-mesmes considerer. Et pource vous n'avez aucune excuse que ne puissiez estre bonne , sainte & iuste , & que ne puissiez seruir à Dieu à toutes heures. Que sont deuenus tous les sermons que vous avez ouy tout le temps passé ? Les sermons ressemblent les armeures, lesquelles on garde pour se defendre quand on est assailli. Quand des ieunes gens se moquent de vous, souuenez-vous comme on se moquoit de Iesus-Christ & de ses benoists Saints; car Iesus-Christ voulut estre mocqué, à fin qu'il nous apprist à souffrir les derisions & mocqueries du monde. Vous avez la raison en vous, qui vous dit quelles choses vous deuez faire, ou laisser. Croyez la raison , & non pas vostre sensualité bestiale : car qui

H

croit son corps, deuiant beste. Vous auez en vous-mesme Dieu, qui vous admoneste nuit & iour par inspiration, ce que vous sentez en vous, & sçauiez bien que ie dis vray.

Si vous estes tentée, pensez d'y resister: car qui n'a aucune aduersité, ou tentation, il ne sçait s'il a aucune vertu en soy. Quand on a en soy grande inclination de faire vne chose defendue de Dieu, & on ne la veut pas faire pour l'amour de Dieu, c'est signe qu'on aime Dieu. Et celuy qui a plus de tentations, & occasions de mal faire, & s'en garde pour l'amour de Dieu, c'est le plus aimé de Dieu. Entre les espines trouue on de belles fleurs? Entre les mondains trouue on les Saints, & Saintes? Tres chere fille, Dieu vous garde vne belle corône. Ne perdez pas le grand bien que Dieu vous veut faire, & pensez d'estre humble, debonnaire, amiable,

ble, attrempée, & au parler prudente, & en tous vos faicts ferme, constante, & diligente à dire vostre seruice; iamais ne foyez oiseuse, à fin que la tentation ne vous assaille: car l'ennemy volontiers tente les personnes oisives. Priez volontiers pour les trespassez, & dites souuent vos Vigiles, & vos sept Pseaumes, & dites vostre Office de bon cœur, & non par vsage. Mettez vostre esperance en I E S V S- C H R I S T, qui est le vray espoux des saintes ames. Hantez les saintes femmes & deuotes, & fuyez comme venin les compagnies mondaines; & quand il vous y faudra estre, ayez le cœur à Dieu, & gardez-vous de reprendre le diabolique estat que vous auez laissé. Montrez de faict ce que vous auez commencé d'estre par la grace de Dieu, & non par legereté de ieunesse: car si vous reprenez l'estat mondain, mal vous en vien-

dra ; dont ie serois trop courroucé.

Aymez Dieu en toutes vos oeuvres. Le saint Esprit qui habite en vous, vous vueille mettre en son escole, & faire vraye disciple de Iesus Christ, & vous disposer d'aller au glorieux Royaume de Paradis. Mais cela desplaist par trop aux ennemis de vostre salut, c'est à sçauoir au monde, à la chair, & à l'ennemy d'Enfer. Et parce que l'ennemy d'Enfer a grand peur de vous perdre, il vous fait traualier par ses deux pervers seruiteurs, le monde & la chair, mais Dieu les gaignera, puis que vous cherchez conseil ; & vous priez vueillez en vsor. Il est aysé de le vous donner, car les saintes Escriptions, & les exemples des Saints, vous apprendront ce que vous deuez faire. Le Saint Prophete dit : Fais le mal, & cherche le bien, & suis-le. Or vous qui auez entendement, notez bien ces paroles

les que Iesus-Christ dit : Qui veut venir apres moy , il doit se renier soy mesme. Gardez bien que vous ne soyez ingrate devant Dieu , qui vous a commencé à faire tant de graces. Et si l'ennemy, le monde, & vostre chair vous assaillent, quelles merueilles? Les accoustumances ne sont pas loin de vous. Mais si vous sçavez les maux que font les femmes mondaines, vous auriez grand' honte de porter l'estat qui vous a tant pleu autresfois. Ne sçauons nous pas ce q' les saints Docteurs disent des femmes qui se desordonnent tant honteusement par habits, & autres choses? Ils disent qu'elles sont les armeures du diable , car le diable est en elles, & fait par elles ce qu'il ne peut faire par soy mesme. Et le S. Esprit est, & habite avec les saintes femmes, & honnestes. Et vous auez honte d'estre temple & hostel de Dieu? Il n'a que faire de

vous, chasteaux des ennemis: car les femmes obstinées, bien iolies, & curieuses, sont les chasteaux des ennemis d'Enfer, où les ennemis se logent; & par lesquelles ils asssemblent les pauvres gens sans prudence.

N'ayez pas honte d'estre vestue honnestement, sans aucune diabolique curiosité pour l'amour de Jesus-Christ, car il n'eut pas honte de pendre en la Croix tout nud pour vous. Et apprenez à viure sans peché mortel: puis laissez parler qui voudra parler: car si vous avez bonne ame & bonne volonté, la parole d'autrui ne vous peut rien greuer. Qui ne vous voudra voir en sa compagnie en habit honneste, il n'est pas digne, que ny vous, ny aucunes bonnes femmes, l'accompagnent. Tres-chere fille si vous scauiez le grand amour que Dieu a aux femmes chastes, nettes, pures, & constantes, vous prendriez plus grand

grand plaisir d'auoir & d'ouyr les tribulations & imperfections du monde, que d'auoir tous les honneurs d'iceluy. Quel amour peut auoir l'homme à Iesus-Christ, qui ne peut endurer le parler pour l'amour de luy ? Comment pourrez vous souffrir la mort, si vous ne pouuez souffrir les paroles ? Je ne doute point, si vous auez le bon desir que ie cuide estre en vous, qu'en vous il fructifiera : car selonc les desirs sont les œuures, & quand les desirs sont charnels ou mondains, ils font faire force choses sauuages, & quand ils sont d'une amoureuse charité qu'on a à Dieu & à son prochain, ils fructifient les beaux fruits de toute honnesteté. Bref, tous les membres sont sujets aux desirs ; & quand le desir est d'honorer Dieu, & sauuer son ame, tous les offices du corps portent & fructifient de si belles œuures, que toutes les bon-

nes gens qui les voyent, & en oyent parler, y prennent grand plaisir. Or il appert, comme la racine de tout bien est le bon desir & plaisir qui en vous fructifiera. Certes, si vous avez bon desir il ne se pourra celer, non plus que le feu aux estouppes seches. Tres-chere fille, aduisez comment ce desir profitera.

Soyez attrempée, peu parlante, sage, & discrete, & pensez souuent comme il vous faut mourir. Et tout ainsi que la beauté des fleurs passe legerement, ainsi fait la beauté de la ieunesse. J'ay esperance que Dieu vous fera beaucoup de biens, s'il ne tient à vous. Vous vous plaignez, que vous avez plus de peine que quand vous seruiez le monde. Bien sçay-ie que le monde vous hayt, mais plus volontiers sçaurois-ie si vous hayssiez le monde, ainsi qu'il fait bon le hayr : car c'est chose qui est plaisante à Dieu quand on le sert
de

de bon cœur. Si vous voulez sauuer
vostre ame, il faut deuotement ser-
uir Dieu. Estes-vous esmerueillée si
le monde vous hayt? Ceste hayne
n'est point nouuelle, c'est vne chan-
son commune, que Dieu veut estre
seruy & honoré sans peché. Nul vit
sans aduersité, specialemēt au com-
mencement, car l'ennemy pour-
chasse empeschement & persecu-
tions à ceux & celles qui laissent les
pechez, & commencent vne vie
bonne, iuste, sainte, & honneste,
mais tout se conuertit en merite, en
profit, & en gloire, aux vrayz perfe-
uerans. Le monde & l'ennemy vous
font beaucoup de maux: mais gar-
dez que vostre corps ne vous en
face d'auantage. Je le vous escriis
pour vous en aduiser, afin qu'y met-
tiez le frein de raison, & de la crain-
te, & doute d'Enfer, car le plus grād
amy que l'ennemy d'Enfer ait, est
nostre corps: On le doit bien parer

honteusement & honnestement, car les vestemens furent trouvez pour couvrir la vergogne de la chair humaine; non pas pour la faire vendre, ou pour estre achetée & conuoitée.

Si vous sçavez tant faire que vous soyez maistresse de vous-mesme, rien ne vous greuera. Car où vous cuidez que le monde & l'ennemy vous facent mal, c'est vous-mesme, pour la racine du grand orgueil & des peruerfes accoustumances qui encores ne sont point mortifiées en vous, & ie vous en appelle à tesmoing. Mais si vous mettez peine de retirer vostre vie, & de couper les branches inutiles & infertiles, & mettez peine d'entrer en vostre terre; nostre benoist Sauueur Iesus-Christ vous aydera, n'en doutez point, c'est à sçauoir, si vous mettez peine d'oublier vos ennemis, & les gens du monde, qui d'un commun

commun accord persecutent l'ame, ne desirans son salut. Mais l'ame sage & bien aduisée a plus d'ayde & de confort, que n'a le corps: car elle a la raison, qui tousiours ramentroit au corps comment le monde ne vaut rien, ny les promesses: ce qui appert, car il faut mourir, & tout laisser. Apres, vous auez les exemples des Saints & Saintes, qui de faict ont laissé toutes vanitez & miserables curiositez pour l'amour de Dieu: car ny pere, ny mere, ny homme, ny femme, ne vous doiuent incliner à porter sur vostre corps chose dont Dieu soit offensé.

Les deshonorables & outrageuses curiositez des femmes, sont cause de plus de pechez mortels qu'on ne pourroit dire: car selon l'estat auquel elles se monstrent, elles se presentent à estre conuoitées. Helas! si ces ieunes femmes sçauoyent les maux dont elles sont cause, plustost

leurs cheueux deuroyent souffrir d'ardre sur leurs chefs deuant tout le monde , que de les porter ainsi qu'elles les portent. En cecy les exemples des saintes femmes vous apprennōt. Helas! Sainte Elisabeth d'Hongrie , mariée au Roy de Turlinge , ne voulut porter habits iolis pour toutes les prieres de son mary: si elle eust peu, maintesfois elle eust desfiguré ses cheueux , son chef , & son corps de ses habillemens. Si ces ieunes femmes estoient sages, leurs visages rougiroyent de honte quād elles sont ainsi desordonnées. Mais pource qu'elles ne se gouuernent pas par raison ny par exemples, elles sont auengées, & cuident que honte soit honneur , & reputent ceste honte vray honneur. La sainte Escriture reconfortant l'ame qui laisse les curiositez miserables des femmes , dit merueilles des maux qui en sont venus, lesquels il seroit trop long

long à raconter, partant ie m'en tay à present. Et aussi l'Escripture sainte raconte les honneurs & les noblesses des honnestes femmes qui ont esté, lesquelles reputoyent toutes les curiositez vne idolatrie, & vie deshonneste. Iesus-Christ ayde à l'ame quand elle se veut ayder. Aduisez, tres-chere fille, quels habits souloyent porter au temps passé les saintes femmes qui suiuyoient Iesus-Christ, & vous apprendrez assez quel habit vous devez porter.

Et ainsi il appert clairement, que la femme qui desire son salut, a grand confort contre les ennemis qui tousiours l'assailent, c'est à sçauoir la raison, l'exemple des Saints & Saintes de Paradis, l'Escripture sainte, & soy-mesme. Et quand l'ame qui desire son salut sçait prendre l'ayde de ces quatre, ou de l'un de ces quatre, l'ennemy est tantost vaincu & desconfit en son fort.

Or

Or aduisez, si pere, ou mere, ou amis, ou toutes les superfluites mondaines, vous doiuent retirer de cecy. Certes nenny. Et si vous auez des aduersitez, elles sont petites, au regard du bien que Dieu vous fera. Si vous perseuererez, & si vous pouuez vaincre les inclinations & accoustumances des compagnies de ieunesse, vous trouuerez nouveau soulas, & nouvelles plaissances. Car quand les creatures viennent à l'accoustumance de Dieu, & de la vraye honnesteté, tous les pechez & dissolutions leur desplaisent, & toutes honnestetez leur sont delectables.

III. CONSIDERATION.

PRiez Dieu pour ceux qui vous sont contraires: car Iesus-Christ souffre que vous ayez des aduertitez, à fin que vous appreniez à batailler, & que le bien que Dieu a mis en vous soit cognu. Tres-chere fille,

filles, pensez à viure sagement & discrettement. Parlez peu, & ne respondes point à toutes les paroles que vous ouyrez: & soyez diligente à garder vostre hostel. Fuyez toutes legeretez, & craignez Dieu sur toutes choses: ayez le, & seruez le diligemment, & si vous auez beaucoup de peines, elles ne sont que temporelles; dont ie vous prie que vous soyez attentue aux ioyes spirituelles, lesquelles sonternelles. Aduisez ce que vous cherchez en ce monde; si vous cherchez Paradis, il vous faut endurer des peines; car l'Apostre dit, qu'il faut que les iustes qui veulent viure iustement & deuotement, endurent & souffrent peine. La raison est, parce que la peine que souffrent les iustes en ce monde, est leur Purgatoire: & pource les sages & deuotes ames doiuent endurer & souffrir tout ioyeusement.

Tres

Tres-aymée fille, prenez l'ayde & force de sâpience, & ostez toutes les superfluites, & pensez deuotement de plaire à Dieu, qui est le vray espoux de toutes les âmes deuotes, & prenez les œuvres de lumière & de toute honnesteté : & attendez plus de merite, que vous n'aurez de peine. Je croy & sçay que vous auez plus d'aduersitez, que ie ne sçauois dire ny escrire; mais la peur d'Enfer, & le desir de Paradis, font endurer toutes les aduersitez. Vous estes ieune, & i'ay grande compassion de vous; car ie sçay que les parens & amis de vostre corps, c'est à sçauoir le monde, & la chair, vous font, & feront assez de peine : mais les amis de vostre âme ne vous feront pas peine; car tant plus grande peine vous aurez, tant plus aurez-vous de ioye en gloire. Et maintes fois Dieu tente ses creatures pour les faire cognoistre à chascun; car il veut que son

son nom soit hardimēt & constamment manifesté & loué , & il luy plaist que ceux qui l'ayment, ayent à souffrir. Et quand és grandes aduersitez on sçait garder son propos pour l'amour de Dieu , c'est signe qu'on ayme Dieu.

Helas ! ma tres-chere fille, ie sçay la grande tristesse & affliction en laquelle vous estes , dont i'ay grande compassion , pour la peur que i'ay que l'ennemy ne vienne à sa peruerse & mauuaise intention , car sçachez, sans en douter, que toute la persecution que vous auez , est par le pourchas de l'ennemy; ce qui appert clairement, car si ceux qui vous persecutent aymoyent & craignoiēt Dieu sur toutes les choses de ce monde , ils auroyent ioye , quand vous voudriez viure humblement & deuotement : mais pource qu'ils n'ont cognoissance de Dieu en aucune maniere, ils aymont l'ennemy
d'Enfer,

d'Enfer, qui leur fait faire ce qu'il ne peut faire, à fin que vous renonciez à servir Dieu: car il luy desplaist que tant ieune femme comme vous estes, vous le fuyiez, de peur qu'il a que quelque autre ne prenne pied à vous. Doncques, pour vous mener à impatience, il vous procure les aduersitez que vous auez. Ma treschere fille, Dieu le souffre, à fin que vous appreniez à estre humble, patiente, & souffrante; car vous ne pourriez paruenir aux grands biens & merites que Dieu vous garde, si vous n'estiez telle que Dieu vous voulust sur toutes choses.

Soyez en toute condition patiente, comme les Saints & Saintes de Paradis ont esté patiens & agreables à Dieu; car en patiemment souffrant les aduersitez pour l'amour de Dieu, on est sœur & frere aux benoists Martyrs; & par pauureté on est compagnon aux benoists Apostres;

Apostres ; & par sobriété on est
compagnon & semblable aux be-
noists Confesseurs ; & par debon-
nairté on est pair & compagnon
avec tous les benoists Saints &
Saintes de Paradis ; & par Charité,
Foy, & Esperance, on est enfant de
Dieu. Gardez-vous bien d'estre im-
patiente ; car tous biens que Dieu a
commencé en vous, seroyent per-
dus. J'ay grande esperance de vostre
bien, car puis que Dieu souffre que
vous soyez persecutée, c'est vn cer-
tain signe de vostre salut. Sçachez
que Dieu vous aime, & n'en dou-
tez point. Ceste tristesse se conuer-
tira en liesse. Vostre Pere, Iesus
Christ, qui a créé vostre ame, ne
vous a point delaisée, car il est le
vray espoux de toutes les saintes
ames. Parquoy si vous luy voulez
plaire, souffrez toutes les adversitez
patiemment ; & de tant plus que
ceux qui vous persecutent mettent
plus

plus de peine à vous faire du des-
plaisir, mettez d'autant plus de dili-
gence de tout souffrir; & ne prenez
rien à cœur de tout ce qu'ils vous
disent; & pour leurs dures & rudes
paroles respondes leur humble-
ment & reueremment, en rendant
tousiours de l'honneur pour la vi-
lenie receüe, & bien pour mal. Ainsi
le conseille l'Apostre S. Paul, voire
Iesus Christ; & si vous le faites ainsi,
rien ne vous sera grief à tolerer de
tout ce que dit est. Et finalement ie
croys & pense que vous viendrez à
l'estat que vous desirez. Et si ainsi
estoit, que tout le monde vous per-
secutast; si vous auez Dieu pour
vous, tout ira bien.

O ma tres-chere fille, pensez
combien de vilenies, combien de
persecutions, combien d'iniures ont
souffert les Saints & Saintes. Il
me souuient de Sainte Anastasie,
laquelle, pource qu'elle estoit hum-
ble,

ble, honneste, & deuote, & des plus grandes de Rome, ses amis & ses parens la mirent en vne obscure prison, où il n'y auoit aucune lumiere, & toutesfois Dieu l'en deliura quand il eut assez attendu. Dieu souffre que les deuotes creatures soyent traueillées, à fin que leur humilité, patience, & obeyssance, soiēt mieux cognuës. I'ay esperance que Dieu vous fera cognoistre qu'il vous a esleüe, & qu'il fera pour vo^r beaucoup de biens. Appelez Dieu souuent à vostre ayde, & sa benoïste Mere, & tous les benoïsts Saincts & Sainctes de Paradis. Et dites à Iesus-Christ qu'il face son bon plaisir en vous, soumettant vostre vouloir au sien. Qui ne sçait seruir Dieu, fors qu'en prosperité, ne sert pas à Dieu, ains au monde, qui ne vaut rien. Gardez-vous bien de prendre l'estat mondain, car vous serriés trop grand honneur à l'enemy,

nemy, & trop grande vilenie à Iesus Christ. Et s'il est ainsi que vous repreniez l'estat du monde, mal vous en viendra. Et vous souuienne de ce que ie vous escriis, & ayez bon aduis, pour ne point delaisser nostre benoist Sauueur & Redempteur Iesus Christ, mais seruez le amiablement, deuotemēt, feruement, & humblement: & fuyez toutes legeres compagnies. Mettez en vostre cœur l'image de la mort, laquelle est tant horrible; & aussi qu'il y a plus de peines en Enfer, qu'il n'y a de gouttes d'eau en la mer. Si vous craignez bien Dieu, tous biens vous viendront. Les tristesses que vous auez sont des tentations, mais quand vous vous trouuez ainsi, mettez vous en oraison si vous en auez le temps, & dites ce Pseaume, *In te Domine speravi*, &c. Et vous aurez plus grand merite enuers Dieu, que si vous n'estiez point tentée. Gardez vous

vous d'estre oyseuse, soyez tousiours en quelque bonne œuvre, ou à faire vostre mesnage, ou à prier Dieu, ou à lire, ou à escrire, à lire vostre Psautier, ou dire Vigiles de morts, & ainsi l'ennemy ne vous pourra greuer. Mais ceux qui ne font aucun bien, & sont oyseux, se presentent aux tétations de l'ennemy d'Enfer. Viuez tousiours en esperance que Dieu vous fera force biens.

Pensez comme le bon arbre est cognu au bon fruit; & par la bonne œuvre le bon ouvrier, & pour bien, & fort, & vaillamment batailler, les cheualiers sont honorez. Les deuotes creatures, qui tous les iours fructifient les bons fruits de pieté, charité, & discrete deuotion, sont les bons arbres. Les iustes creatures sont les bōs & sages ouvrier, qui accomplissent les commandemens de Dieu de iour en iour; & ceux qui sont constans en leurs œuvres,

œuvres , persecutions , & bon propos que Dieu leur a donné, & parce cognus & approuvez de luy , qui tous les iours combattent contre le monde & l'ennemy , & à l'encontre d'eux-mesmes , & perseverent iusques à la fin , sont les vrais Cheualiers de Iesus-Christ, & seront honnorez , non pas des honneurs qui passent avec le vent , ainsi que sont les honneurs mondains, mais seront honnorez perpetuellement avec leur Prince Iesus-Christ. Les honestes & deuotes creatures sont agreables à toutes bonnes personnes , & plaisantes à voir , & de tres-bonne odeur deuant les Anges de Dieu, & deuant la benoiste Trinité, & la Cour de Paradis. Tres-çhere fille , gardez que ne ressembliez à l'arbre qui est tres-beau en temps de fleurs , & le fruit ne vaut rien. Vous auez beau commencement, & porterez beau fruit , si le vent d'orgueil

d'orgueil ne le fait cheoir, ou si la froidure de deuotion ne le fait engeler, ou si la bruine sensuelle ne le fait pourrir. La creature raisonnable & iuste, qui est le bon arbre, fait venir à maturité le fruit par prudence, par attrempance, par iustice, par ferme constance, par profonde humilité, & par amoureuse charité.

IV. CONSIDERATION.

Gardez-vous du monde qui tire, & de la chair qui est fort encline à peché. Meslez-vous peu du monde, & des gens, de quelque estat qu'ils soyent, si ce n'estoit au cas qu'un plus grand bien en deust venir. Et vous souuienne du grand amour que Dieu vous a monstre, quand il vous a appelle en la fleur de ieunesse. Je remercie Dieu maintes fois, & le dois faire, quand je puis trouuer par quelque coniecture qu'il m'ayme. Et quand on apper-

soit quelqu'un qui veut laisser ce miserable monde, & le fuyr, n'est pas preud'homme celuy qui ne le veut ayder, s'il le peut faire. Grand honneur est pour ceux & celles qui veulent laisser les deshonestes, diaboliques & miserables deceptions. Et pourtant, ma tres-chere fille, s'il y a confort, ou conseil, que ie puisse vous donner, ne m'espargnez en rien, car ie le dois faire : & tant que vous voudrez perseuerer, ie ferois conscience de vous faillir à chose qui fust vtile & profitable à vostre salut. Vous estes ieune d'âge, & pource prenez sens des anciens de mœurs. Et soyez attempée & prudente, car l'attempée, prudence, simplessesolitaire, humilité, & discrete conversation, sont merueilleusement agréables à Dieu es ieunes gens. Faites doncques qu'elles soyent en vous.

Ma tres-chere fille, si vous sçauiez

uiez les grands seruices & plaisirs que vous pouuez faire à Iesus-Christ, par les bons exemples que vous pouuez donner, vous mettriez grand' peine à le seruir : toutesfois ie vous aduertis comme celle de laquelle ie desire tres-cordialement le salut, que vous n'oubliez pas à faire trois choses nouuelles. La premiere, que vous ayez tousiours le reuerencement de Dieu deuant vos yeux. La seconde, que vous oubliiez toutes les vaines compagnies de plus que vous pourrez, car le plaisir mondain est trop contraire au salut de l'esprit. La troisieme, que vous ne oubliez vostre grand sens naturel, & vostre sapience acquise. Ne soyez pas oiseuse, ains employez-vous tousiours en bonnes ceuures. Et ainsi pourrez vous aller tousiours de bien en mieux, & de vertu en vertu. Et pour dire la verité, vous estes plus tenue

d'aymer Dieu, qu'on ne pourroit
escrire, ou dire. Et si vous ne seruez
Dieu loyaument, n'en mettez la
faute sur autre, car il ne riens à au-
tre personne du monde, fors qu'à
vous. Vous avez suffisamment des
biens de fortune, & si avez encores
des grands biens de nature, car vous
avez le sens & l'entendement d'une
prudence naturelle bien ordonnée;
s'il y a à dire, Dieu le parfaiera par sa
grace. Et qui met plus grande dili-
gence à vous garder de peché, plus
merite-il d'estre receu à la grace de
Dieu. Ayez, & desirez les choses
qui font trouuer Dieu. Si vous sca-
viez l'amour que Dieu porte à la
jeunesse bien ordonnée, toute la
puissance créée ne vous retiendroit de
seruir & aymer Dieu. Or faites donc-
ques tant que l'amour de Dieu soit
renouellé en vous par ferveur de
deuotion, par humilité, & par sage
discretion, & mettez en oeuvre les
saincts

saincts & b^os desirs que Dieu vous a donné, & laissez regner & habiter Dieu en vous : car ie sçay bien que qui veut faire la maison de vous, veut mettre toutes tenebres hors de vostre conscience, si vous le laissez faire, & le voulez croire. Tres-chere fille, ce seroit vn trop grand peril & douleur, si vous oubliez Dieu qui vous a fait tant de graces. Et c'est chose merueilleuse comment des hommes & femmes qui ont du sens & du sçauoir, peuvent tant aymer ce monde, qui est si plein de desloyauté & de deceuâce. Hélas ! quand la mort est venue, quel confort, quelle ayde, & quel soulas peut faire le monde à la pauvre creature, qui de toute sa miserable ieunesse & liesse l'a seruy, & de sa vieillesse ? Que grande douleur à la mort ! car quand le monde s'est seruy de l'homme, il le laisse au besoin, c'est à l'article de la mort, &

luy oste or, argent, chasteaux, maisons, & tous les autres biens temporels; & ne luy laisse qu'un petit lin-
can viols & usé, rompu, & deschié, & son long & son large de terre bien estroittement, en recompense de son seruice. La mort est le terme & la fin de tous les honneurs, & de toutes les plaisances. A la mort que trouue le corps qui a esté si bien paré, & si bien nourry, si bien couché, & si bien vestu? Il trouue la terre pour le couvrir, & les vers pour le manger. O matres, chere fille, si les sepultures de tous ceux & celles qui sont morts, estoient ouuertes, & vous allissiez voir les belles ieunes femmes, & les beaux ieunes hommes, qui ont esté là enseu-
lis, que trouueriez-vous? Vous trouueriez un tas de charny & à regarder, & trois fois, ce sont les grands chre-
tiens, qui voient leur corps attend de iour en iour à se défaire. *Quelle*

Quelle chose trouuera la femme
du monde, priuée de Dieu? Horri-
ble vision des ennemis ords & hi-
deux à ouyr, tenebres sans lumiere,
& peines sans terminer. Helas! ma
fille, combien est grande ceste dou-
leur, pour vn petit de ioye mondai-
ne, endurer de telles peines qui ne
peuent prendre fin. O que sages
sont ceux & celles qui sçauent fuyr
ce monde miserable & deceuable,
& diligemment chercher Iesus-
Christ. Ils trouuent les Anges qui
sont si beaux à regarder & à voir,
que nos yeux ne les pourroyent
voir ny regarder en ceste vie mor-
telle sans miracle. Ils trouuent les
compagnies des ieunes & des an-
ciens, qui sont entrez en Paradis de-
puis la Passion glorieuse de Iesus-
Christ. Il y a tant de lieues & de so-
yeuses que elles ne peuent estre
d'opries ny enuies en ce mon-
de cy. Ils y trouuent la vision de
208

Dieu clairement, & si cognoissent le Pere, le Fils, & le S. Esprit. Et pour tout comprendre en bref, ils trouvent l'accomplissement des saints desirs, qui n'est, & ne peut estre en ce monde, & maintesfois vous l'auez ouy dire & prescher. Or concluez, ma tres-chere fille, la grande patience & prudence que c'est, que de laisser ce monde miserable, & de cordialement seruir Dieu.

Or vous pourriez dire: Helas! ie ne puis. Ne cherchez des excuses, car Iesus Christ ne demande que vostre puissance, avec l'ayde qu'il vous fera, si vous voulez. Prenez l'humilité pour fondement, la sobriété, attrempance, & honnesteté, pour ornement. Prenez la iustice pour vous bien employer, & la constance & patience pour vous bien defendre. Prenez la contemplation & fouuenance des benefices de Dieu, & des vies des Saints & Saintes

Sainctes de Paradis, & des biens des Martyrs pour soulas. Prenez la diligence pour fuir l'oyfuité; prenez l'amoureuse charité & les deuotes oraisons pour l'ayde de Dieu. Pensez à la grande desloyauté du monde, & ne vous y fiez. Aymez Iesus-Christ & sa benoiste, glorieuse & sacrée mere: appelez tous les benoists Saincts & Sainctes de Paradis à vostre ayde. Pensez & aduisez à la vie des Saincts tant que vous soyez semblable à eux. Pour ceste cause ont esté escrites les vies des Saincts de Paradis de l'ancienne loy, & de la nouuelle, à fin que nous, nos maintiens, nos mœurs, nos faicts, & nos dicts, soyent faits semblables aux leurs, & si vous le faites ainsi, Dieu sera content de vous. Es pensez de tellement viure, que Iesus-Christ soit content de vous. Il ne vous peut chaloir du monde, car tout le mal que nous auons vient

de nostre chair. Si vous sçavez Dieu
en vostre volonté, confessez que
c'est par vous. Cognoissez quelle
vous estes, & que vous deviendrez
entre que vous n'estes, car Iesus
veut estre desiré. Apprenez à fuir
ce meschant monde, qui ne vaut
rien, & vous affermissiez en l'amour
de Dieu. L'humble pauvreté des
Apostres, la confiance des Martyrs,
& la charité de Iesus, soit donnée à
vostre esprit.

V. CONSIDERATION.

Mes chere fille, j'ay bien en-
tendu que l'ennemy par beau-
coup de manieres vous veut tirer à
son party: mais j'ay fiance que Iesus-
Christ vous donnera confort & ay-
de par le moyen de vostre bonne
prudence & constance, car non-
obstant que l'ennemy, le monde, &
la chair humaine ayent si grande
puissance au temps present, que peu
de

de gens leur ſçauent reſiſter pour les fortes tentations qu'ils ſouſtiennent ; toutesſois vñ peu de charité & de bonne prudence peut facilement deſconſtre ces trois ennemis. Et ſi vous demandez comment cela ſe peut faire ; ie vous reſpons que la charité lie ſi fort à Jeſus-Chriſt, qu'à grand'peine le lien eſt rompu ; & la prudence & ſapience fait ayſément cognoiſtre leurs fraudes ; & les fins auxquels ils tendent , car iamais les ſages ne laiſſeroient les promeſſes de Jeſus-Chriſt pour les promeſſes de ces trois-là que nous cognoiſſons eſtre frauduleux ; & trompeurs.

L'ennemy promet vñe longue vie, & fauſſe eſperance d'amendement, en diſant ; tu es ieune ; tu r'amaenderas quand tu ſeras bien vieil, ou autreſois : & toutesſois il procure la mort de ceux & celles qui ſont en peché mortel : ainſi qu'il appert

I 6

par les batailles qu'il procure de
jour en jour, & a fait ainsi depuis le
commencement du monde. Ainsi
le diable qui est chef des menson-
gers, fait l'opposite de ce qu'il pro-
met, & conseille le monde, qui est
son loyal serviteur; car quand il ne
peut decouvrir par soy, il fait toutter
par le monde. Et le premier assault
du monde est sous couleur de bien:
car le monde dit: Nous avons espe-
rance d'estre aussi bien sauvez que
vous. Il se faut gouverner selon
l'estat de ses amis, & ainsi que nos
pere & mere ont fait. Il faut passer
la jeunesse ioyeusement. Il faut
prendre quelque consolation. Qui
voudroit croire telles gens n'auroit
iamais ioye. La chair & le corps
oyent volontiers tel damnable con-
seil, & le retiennent si fort, que peu
de gens y sçauent contredire. Mais
quand l'amour de Iesus-Christ est
au cœur, auquel est la charité, &
quand

quand l'ame a vn petit de bonne prudence, & de bonne sapience, l'homme résiste facilement aux dicts du monde, & du diable, qui luy promettent longue vie.

Le monde vous conseille de prendre vos soulas, qui plaisent tant à la chair. Et que ferez-vous, si vous les prenez? Il les vous faudra laisser, car il ne peut venir si peu de fièvre, ou de maladie, qu'on ne perde la promesse de ces trois deceuables ennemis. Et adonc dira la prudence: Quand bien il n'y auroit de Paradis, ny d'Enfer, si seroit-ce vne chose miserable d'obeir, & faire ce que cette orde, vile, sale, & puante chair, & ce puant monde conseille. Encore plus dira la prudence: Adieu aux conditions de la miserable chair, & du monde. Le monde & la chair ne sont pas contents de faire cheoir l'homme en vn petit mal, ains le veulent faire cheoir d'vn

d'un plus grand en vn plus grand.
 Et pourtant c'est grande folie de
 s'y fier. Que plus ait la prudence
 à la chair, & au monde de luy es-
 bahie que vous ne cognoissiez vos
 misérables conditions; car toutes
 les choses que vous prizez, sont à
 blasmer: vous cuidez par vos grands
 paremens estre réputée belle, mais
 si ne hastes vous pas, ains les orne-
 mens qui sont sur vous: car vous
 sçauiez bien que vostre corps n'est
 que fiente & ordure. Or c'est donc
 tres-grande folie de se fier à ce
 monde, & de luy seruir. Et pour
 secourir toutes recommanda-
 tions; & consolations mondaines, ie
 prends la mort, à laquelle ny le
 monde, ny la chair ne peuvent re-
 sister, mais la peult bien per-
 ruer. Et par ces vertus, de la pru-
 dence, n'est pas sans sens, & sans
 sçauoir, qui par moy, & par mon
 conseil se sçait gouverner. Quelle
 chose

chose est en ce monde plus belle,
 que viure par prudence, & par as-
 sureté, honnestement, chaste-
 ment, & humblement, faire ce qu'on
 doit par patience, ce qu'appartient
 à ordonner toutes les ceuures à
 l'honneur de Dieu, & au profit de
 l'ame. Et quand la creature sçait ser-
 uir Dieu, & fuir les vanitez de ce
 monde, & de la chair, l'ennemy n'en
 est point bien aise, pource adonc il
 srouue, & pourpense plus forts as-
 sauts par les mesdisans, detracteurs,
 & enuieux; & tasche de vaincre par
 pauureté. Mais la charité dit: Il n'y
 a pauureté, mort, aduersité, ny
 maladie, qui me sceust separer de
 l'amour de Iesus-Christ, qui est
 descendu en terre pour me sauuer,
 & pardonner mes pechiez. On doit
 aimer, craindre, & seruir, qui ne
 veut faillir à aucun besoin. Si Dieu
 souffre que ie sois tenté, c'est pour
 m'apprendre à resister contre la ten-
 tation

tation mondaine : car pour m'esprouver, il souffre que j'aye de la peine, c'est pour m'accompagner des saints Martyrs. Si Dieu souffre que j'aye de la tristesse, c'est pour me donner liesse, & pourtant le doit-on bien aimer. Je vous prie que vous y vutillez aduiser, car c'est vne souveraine prudence, de se garder de ces trois ennemis, & d'aimer celuy, sans lequel on ne peut bien mourir. Il n'y a aucune deuotion sans discretion. Prenez constance, prudence, iustice, attrempance, & charité pour vostre conseil, & tout ira bien.

Scachez, ma tres-chere fille, sans rien douter, que ceux qui sont les mieux aimez de Iesus-Christ, & ausquels il promet plus grande gloire en son Royaume de Paradis, sont ceux, & celles, ausquels il enuoye plus de tribulations, & des grandes tentatiōs, & plus de peines de

de toutes parts. Soyez forte, & ne doutez de rien, car Iesus-Christ ne vous faudra point, mais aidez-vous; & ie vous supplie, ne perdez point constance, ains de tant plus que vous auez d'ennuis, & de desplaisances, attendez d'autant plus grande beauté deuant la face de Iesus-Christ. Et aduisez de ne craindre ce meschant monde deceuable; & pour homme, ou femme qui viene, ne laissez point à faire le salut de vostre ame; ny pour les parens ne laissez à vous disposer en paix de vostre conscience: si vous faites autrement, Dieu en aura du desplaisir. La cause pourquoy Dieu souffre que les iustes ont tant de peines, tant de dommages, & de persecutions, c'est pource qu'ils honorent, & aiment trop les mondains, & les craignent trop: car par la crainte des mondains ils laissent à faire plusieurs biens; ce qui desplaist grandement

dement à Dieu. Celuy est à craindre, qui peut punir l'ame & le corps à sa volonté. Grand defaut est aux iustes qui seront sauuez, quand ils ne sont si hardis à seruir Dieu, comme sont les damnez à seruir les Princes de toutes les iniquitez, & de tous les maux. Les mauuais & peruers, hommes, & femmes, ne laissent à mal faire pour les iustes, & les iustes laissent à bien faire pour les mauuais. Grande confusion. Helas ! bien se doit plaindre de vous le doux Iesus, qui void, & cognoist qu'il a de si foibles seruiteurs, luy qui est Prince de toute bonté & iustice, & qui promet tant de biens à ceux, & à celles qui le seruent loyalement. Là où le Prince d'Enfer, qui ne fait que songer mal à des si constants seruiteurs à mesfaire. Certes, ma tres-chere fille, la cause de tous les grands maux qui sont au monde, est pource que l'en-

nemy

nemy est seruy de la plus grande partie du monde, & Iesus-Christ pauvement, & foiblement : car l'experience apprend la grande hardiesse qu'on a à mal faire, & dire; & la grande foiblesse qu'on a à bien faire.

Tres-chere fille, ce n'est point que ie doive croire, que vous laissez à seruir Dieu pour le monde, mais à fin que vostre conscience ait vn petit de reconfort, & à fin que vostre entendement vueille contemner & despriser ce miserable & corruptible monde, qui est si faux & desloyal, & qui si meschamment & pauvement recompense tous les supposts, & seruiteurs; & aussi pour esmouvoir en vous la ferueur de la charité, & de la force; car en lisant les Escritures, qui racontent, comment les Saints, & Saintes ont desprisé ce monde, & constamment seruy

Iesus

Iesus-Christ, l'homme se doit disposer à prendre nouvelle ferueur, constance, & plaifance à bien pourfuyre les œuvres qui meinent au Royaume des Cieux. Et sur toutes choses ayez vostre intention & vostre desir à Dieu, & ne l'oubliez aucunement : car pour le bien de vostre ame, & pour l'amour que Dieu a enuers vous, encores ne vous a-il pas prins, pour autant que vostre martyre n'est encores accompli, ny vostre couronne parfaite, ny le nombre des merites qu'il veut que vous ayez, consommé & parfait. Faites tant, que la santé de vostre ame croisse, & efforcez-vous tant, que vous ayez nouvelle foy, & nouvelle charité, sans rien craindre.

Vous devez sçauoir que Dieu nous commande que nous perfectionnions au bien, à fin que croissions en son amour, & à fin que les vertus foyent

soyent parfaites en nous : car ainsi que vous voyez que les arbres , & les enfans viennent de foiblesse à force par longue nourriture , & par longue perseuerance ; ainsi en continuant les vertus , la bonne vie prend sa perfection. Et comme le fruit vient à maturité sur l'arbre , ainsi les sens des deuotes gens doivent meurir , & vetir en parfaite deuotion. Les vertus sont plantées en vous , mais elles sont encore trop tendres , & pourtant Dieu veut qu'elles soyent fermes & parfaites , auant que vous mouriez. Apprenez donc à estre humble , car c'est la fondation de toutes les vertus , & leur garde. Soyez charitable , & debonnaire : car la charité est la mere de toutes les vertus. Pensez d'auoir paisible conscience , car Iesus Christ est le pere des paisibles. Helas ! au iourd'huy il n'y a homme , ny femme qui souffre grands domages ,
& grands

& grands opprobres, fors ceux, & celles qui veulent loyaument servir Dieu. Et n'est pas sans cause, que Dieu leur laisse auoir tant de maux, car le bien qu'il leur garde est inestimable. Entre les signes du vray amour, que Dieu montre à ses amis en cette miserable vie, est qu'il souffre qu'ils soyent trauallez: ce qui appert merueilleusement par les exemples des Saints, & Saintes de Paradis, qui ont eue tant de torment en ce monde. Parquoy ne soyez esbahie, ny esmerueillée de rien: car la condition du monde, & des mondains, est de faillir au besoin, & en temps de necessité; & en temps de prosperité promettent grands seruices. Apprenez à cognoistre le monde, vous estes à l'escole, où à tout le moins vous cognoissiez quelques gens il faut aimer; vous le voyez par experience.

Tres-chere fille, prenez la confiance,

stance, & l'esperance des Saints, & Saintes de Paradis, qui pour l'amour de Iesus-Christ ont du tout laissé l'amour de ce meschant monde. Et le vray amoureux, & piteux Iesus-Christ vous pouruoyra du tout, & sera vostre Aduocat, vostre defenseur, vostre refuge, vostre soulas, vostre beatitude, & tous biens vous seront donnez, n'en doutez point: car la vraye consolation de vostre ame est Iesus-Christ, qui tant souuent parle à vous en toutes les places que vous foyez. Et si vos bonnes pensées vous faillent, entendez la diuine Sapience, qui si souuent dit à vostre ame: Pourquoy fais-tu cecy? que ne te gardes-tu de telles choses? Et si vous la voulez croire, vous profiterez de bien en mieux. Pensez, ma tres-chere fille, de bien & loyalement aimer, seruir, & honorer Dieu: Et si le monde vous fait beau semblant, ne vous y fiez

fiez point. Sous la douceur du miel est aucunes fois prins vn grand venin. Certes on ne sent point le venin, quand on le prend, mais tantost apres on s'en repent. Aussi quand on est avec les mondains, pour l'heure on n'apperçoit pas le grand mal qui en vient, mais bien tost apres on s'apperçoit bien du grand venin qui est fiché au cœur.

VI. CONSIDERATION.

TRes, chere fille, ne perdez pas le beau commencement que Dieu vous a donné, & ne mettez point vostre prudence naturelle és choses qui vont à neant, ains és vertus morales. Quelle chose est plus plaisante en ce monde, que de voir des ieunes femmes sobres, humbles, prudentes, arrempeés, constantes, sages & discrettes, qui scauent diuiser leur temps, & l'employer en bonnes ceſtures, en la vie
actiue,

actiue , & en la vie contemplatiue? Et ne doutez point : le temps n'est iamais long à gens sages (au moins à gens qui ne sont point malades) car le sage trouue tousiours assez en soy iustement à besoigner. La vie actiue donnera assés à faire à des gens qui ayment leur mesnage. La vie contemplatiue embesoigne fort les chambrieres , car qui veut viure en contemplation il faut qu'il pense souuent à Dieu & à ses Saints : il faut chercher, prier, seruir, & honorer Dieu; & faut penser maintenant à l'Enfer , maintenât au Purgatoire, maintenant au Paradis, maintenant à viure , maintenant à mourir. Ces deux sont tousiours ensemble, & ne laissent point perdre le temps.

Toutesfois la vie actiue est tresconuenable aux gensmariez pour l'obligation du mariage : car il faut ayder à sauuer sa partie, & garder la loyauté qui est promise : & toutes

K

prouidentes & prudentes femmes doiuent garder la paix de leurs maris , & tous prudents hommes la paix de leurs femmes. Ils doiuent prier Dieu l'un pour l'autre, ils doiuent se supporter & ayder l'un l'autre. Quant est des vertus qui appartiennent au saint mariage , il les faut bien aduiser , car il faut la prudence pour sçauoir ordonner & diuiser son temps; car on doit prendre du temps pour estre à l'Eglise, & du temps pour ordonner son hostel , à ce que le mary n'ait aucune cause de laisser son hostel. Il faut auoir l'attrempance pour sçauoir parler quand il est temps, & aussi pour moderer ses habits , & tout son maintien. Il faut la force & constance pour sçauoir souffrir de sa partie humblement. Il faut la iustice pour sçauoir prier Dieu. On luy doit la charité, honneur & reuerence ; & à sa partie vne raisonnable obedi-

ce

ce & loyauté ; & à ses voisins le bon exemple de toute amiable honnesteté. Il faut la charité , & aymer Dieu sur toutes choses, confesser ses pechez , viure & conuerſer honneſtement & iuſtement. Et pour ce que premierement le mariage fut ordonné pour auoir lignée, on doit deſirer auoir lignée , & des enfans pour ſeruir & honorer Dieu , & pour remplir le Paradis, non pas l'Enfer : car mieux vaut n'auoir aucuns enfans, que les auoir mauuais. Trop doit deſplaire à vn ſage pere, & à vne ſage mere, quand par eux croiſt le nombre des damnez.

Tres-chere fille, ce ſont les venerables vertus leſquelles appartiennent au iuſte & ſainct mariage, avec humilité , qui touſiours y veut & doit eſtre , & tellement ordonnée, qu'on ne donne à ſa partie cauſe de courroux , & qu'on ait grande patience. Et qui bien fait ſon deuoir il

acquiert le loyer de la vie contemplative, car ils ne peuvent rien l'un sans l'autre. Ma très-chère sœur, ie vous supplie de cœur, que sagement vous mettiez peine & diligence d'acquiescer ces vertus, & de pourchasser à les continuer, en vivant de bien en mieux. Gardez-vous des vanitez de la jeunesse, & de toutes vaines compagnies. Et si vous avez un peu de peine, les mérites, & les loyers que Dieu vous garde sont grands. Soyez humble, & sans feintise. Ne vous esbahissez point si vous estes froide, car Dieu le veut, & le souffre, à fin que vous cognoissiez quelle vous estes; & que vous sçachiez que tous les biens viennent de Iesus Christ, qui est perseveramment à vostre aide. Vous me direz : Je ne sçay aimer Dieu, ie ne sçay quand ie l'aime. A quoy ie vous responds, que si vous n'aimiez Dieu, vous n'auriez pas

pas les desirs que vous auez ; & si Dieu ne vous aimoit point , il ne vous donneroit ces desirs.

Et si vous me demandez , comment vous sçaurez si vous aimez Dieu ; ie vous responds , que vous le pouuez sçauoir par l'humble esperance , & par la charitable creance en trois manieres. La premiere est , quand on haït tous les pechez en soy , & en autrui ; & quand on fuit toutes les occasions qui peuuent incliner , & amener à peché. Secon-
dement , on le sçait par le plaisir qu'on a à faire les œuvres , lesquelles on est tenu de faire. Mais ces choses sont entendues sagement , à fin qu'on ne repute la chose mau-
uaise , ainsi qu'il aduient souuent aux gens de dangereuse consci-
ence. Et ie sçay que pour vostre bon profit Dieu souffre que vous ayez peine ; mais pour affaires que vous ayez , ny pour peine , ny pour aduer-

sité que vous aduienne, ne perdez l'esperance de Iesus Christ: car vous sçauiez bien que le loyal amy de Dieu est espreuüé par grands affaires, & grandes aduersitez; & qu'apres les grandes aduersitez Dieu donne les grands comforts, & les grands soulas. Soycez constante, & ne prenez à cœur chose que l'ennemy vous dise. Les paroles des mondains ne sont que vent, & la vraye humilité les abbat, & met à neant.

Prenez au cœur le bon conseil des choses que vous deuez faire, & prenez vn cœur ferme & plein de prudence, & de bonne discretion, & n'oubliez point Dieu. Appelez-le deuotement en vos necessitez, & ie sçay bien qu'il vous aidera, n'en doutez point. Vous direz vos Heures deuotement, & proposerez vostre volonté, en priant Dieu, à ce qu'il vous laisse dispenser tous les biens qu'il vous donne, à sa louange,

ge , & à sa gloire , & au profit de ceux & celles qu'il aime; protestant que autrement vous n'en voulez vsfer, & que vous ne les voulez dependre autrement qu'à l'augmentation de son honneur & loüange. Et ainsi vous viurez selon la vraye reigle de saint Augustin , selon Iesus Christ , & selon les benits Apostres : car les regles sont faictes pour sçauoir viure selon la volonté de Iesus Christ. Et pourtant taschez d'auoir cette volonté. Faites bien & constamment vos besoignes , & ce que vous ne pouuez faire, commettez-le à Dieu, qui est le vray refuge de tous ceux & celles qui ont esperance en luy. Ma tres-chere sœur & fille , ne vous troublez de chose qui vous soit dictée, car on ne vous sçauroit faire entendre le plaisir que vous faites à Dieu , si vous auez vraye patience. Croyez fermement sans en rien douter que

routes les aduersitez que Dieu souffre que vous ayez, sont pour le grand amour qu'il veut faire à vostre ame. Helas! ma chere fille, pensez aux peines qu'ont souffert les benits Saincts, & Sainctes de Paradis. C'est la plus brieue voye par laquelle les saincts Apostres & les saincts Martyrs, les Confesseurs, & les sainctes Vierges & Vefues sont allez en Paradis. C'est l'eschelle pour monter deuant la benite Trinité, & à la compagnie de tous les Saincts & Sainctes de Paradis. Qui ne sçait souffrir, ou endurer vn petit de peine en ce miserable monde, est en trop grand peril de son ame, & hors d'esperance & de sauvement; il commence ia à faire son Enfer, il commence ia les peines perpetuelles.

Soyez pleine d'esperance, car tout viendra à abondance de ioye & plaifance, & de tant que vous estes

estes plus tentée, d'autant plus fort mettez vostre cœur en Dieu ; car ceux que Dieu ayme plus parfaitement, il souffre qu'ils soyent plus trauallez iusques à la mort. Et de tant que les tribulations ou tentations sont plus fortes , de tant est Dieu plus pres des creatures qui mettent en luy leur fiance. Aduisez quelle peine vous avez : selon la condition des tribulations il faut chercher le remede. Si les peines que vous avez viennent des paroles du monde , le remede est leger à trouuer : Car quand les creatures sçauent leurs conditions, & sçauent qu'elles sont pures , nettes & innocentes, la chose qu'on leur met sus se peut legerement appaiser, puis que Dieu cognoit que l'on est. Si les aduersitez viennent de l'ennemy, Dieu ne souffrira point qu'elles soyent si griefues que la creature n'y puisse resister. Si elles viennent

des creatures, ou des dangers de nature, on se doit aduifer qu'on face conscience de chose de laquelle on la doit faire. Retranchez les tentations interieures, & tenez-vous en la foy de la sainte Eglise, & appelés tousiours Iesus-Christ & sa douce mere, avec vraye esperance qu'il vous aydera, & tant plus il attendra à faire vostre volonté, tant plus grands biens vous garde-il. Viuez en ceste foy. Que pouuez-vous faire de tant de dommages temporels? Ce que vous n'en pourrez améder, remettez-le à Dieu. Et si de vostre gré vous vous desaisissez de vostre droict, encores sera-il meilleur. Et si vous vouliez declarer vos douleurs & afflictions à aucunes personnes discrettes, vous en seriez plus en paix, & vous causeroit tres-grande consolation, car le S. Esprit est avec ceux qui par charité se complaignét l'un l'autre. Doncques, ma tres-
chere

chere sœur, foyez humble, amiable,
debonnaire, charitable, pleine de
foy & d'esperance, & obeïssante à la
saincte mere l'Eglise Romaine; &
ainsi pourrez acquerir la gloire eter-
nelle de Paradis, où vous conduise
le Pere, le Fils, & le Saint Esprit.
Amen.

F I N.

APPROBATION.

JEan Claude Deville Docteur en Sainte Theologie, Chanoyne en l'Eglise S. Paul de Lyon; & député à l'Approbation des Liures en ce Diocèse par Monseigneur Deays Symon de Marquemont, Illustrissime & Reuerendissime Archeuesque de Lyon: Faisons foy auoir veu ce present Liure intitulé *le Voyage Spirituel du Pelerin Catholique*, dressé par le B. PIERRE DE LUXEMBOURG Cardinal, Euesque de Mets, & Protecteur de la Ville d'Avignon: Et n'y auoir trouué rien contre la Sainte doctrine de l'Eglise Catholique, Apostolique & Romaine, ny cõtre ces bonnes mœurs. Au Cloistre S. Paul de Lyon ce 7. Octobre 1624.

DEVILLE.

CONSENTEMENT.


VEu l'Approbation du Docteur en Theologie, ie n'empesche pour le Roy que le present Liure intitulé *le Voyage Spirituel du Pelerin Catholique*, soit imprimé. A Lyon ce 14. Sept. 1624.

PVGET, Procureur du Roy.

PERMISSION.

IL est permis à Antoine Chard marchand Libraire à Lyon, d'imprimer le susdit Liure: Avec deffenses en tel cas requises. Fait à Lyon ce 14. Septembre 1624.

DV SAVZAY.



58

